

## मत्तीए ओसरो चाव था

आव पोस्तोको येसुए उसिस मत्तीए ओसरो ज़। नो मिँ ड़ादा सरकारए उधूँल लिद सिर्मा स्योःन्या येन ओदोऽयाव (मर्कूस २:१३-१४; लूका ५:२७-३२)। आलाव सर्सिउ पाँ भरी यहूदीरालाई नो ड़ादाकिन 'हुरिऽया' है यालिऽयाव दाऊदए ओथोलाव याराजा ख्रीस, येसुए ओक्याँत ज़ योःके लिद थरैद्यासिउ लिऽया। फरी 'स्वर्गताव राज्या जेऽाक ज़ हुद ले' लिद येसुए ओरासथैऽयाव चाव था यहूदीराए जूँनी वाज़ माताद, मानुवाताव प्राईँ जातलाव मिँराए याजूँनी ब लिऽया लिद सरैःसिउ लिऽया (मत्ती ८:११; १२:२१; २४:१४; २८:१८-२०)।

येसुए ओसाखा पुर्खार

(लूका ३:२३-३८)

1 येसु ख्रीस\* अब्राहाम सोनो दाऊदनी निथोनी ज़ हुके। नोराए यामिनर आवर ज़,  
 2 अब्राहामए ओज़ा इसहाक,  
 इसहाकए ओज़ा याकूब,  
 याकूबए ओज़ा यहूदा, यहूदाए छुत ओदाज्यु भाइर मनी याल्यो।  
 3 यहूदाए ओज्या तामार बातनी दुई भाइ ताकिनी। तोबोए उमिन फारेस, तोबोए उमिन जाहेर।  
 फारेसए ओज़ा हेसोन,  
 हेसोनए ओज़ा आराम,  
 4 आरामए ओज़ा अम्मीनादाब,  
 अम्मीनादाबए ओज़ा नहसोन,  
 नहसोनए ओज़ा सल्मोन,  
 5 सल्मोनए फरी ओज्या राहाबनी बोअजलाई दैक्यो।  
 बोअजए मनी ओज्या रूथनी ओबेदलाई दैक्यो।

\* 1:1 1:1 ख्रीसए ओअर्थ – परमेस्वरए खतैद उपरींच मिँ।

ओबेदए ओज़ा यिसै,  
 6यिसैए ओज़ा दाऊद राजा।  
 दाऊदए उरियाए ओज़्या बातनी सोलोमनलाई दैक्यो।  
 7सोलोमनए ओज़ा रहबाम,  
 रहबामए ओज़ा अबिया,  
 अबियाए ओज़ा आसा,  
 8आसाए ओज़ा यहोसापात,  
 यहोसापातए ओज़ा यहोराम,  
 यहोरामए ओज़ा उज़्जिया,  
 9उज़्जियाए ओज़ा योताम,  
 योतामए ओज़ा आहाज,  
 आहाजए ओज़ा हिजकिया,  
 10हिजकियाए ओज़ा मनस्से,  
 मनस्सेए ओज़ा अमोन,  
 अमोनए ओज़ा योसिया,  
 11योसियाए ओज़ा यकोनियास। यकोनियासए छुत ओभाइर मनी  
 याल्यो। नो बेलाक ज़ इस्राएलीरालाई बेबिलोनदा क्योःद  
 यारालाँकेर।  
 12बेबिलोनल ज़ यकोनियासए ओज़ा सालतिएल जर्मिके।  
 नकिन सालतिएलए ओज़ा यरूबाबेल,  
 13यरूबाबेलए ओज़ा अबिउद,  
 अबिउदए ओज़ा एल्याकीम,  
 एल्याकीमए ओज़ा आजोर,  
 14आजोरए ओज़ा सादोक,  
 सादोकए ओज़ा आखिम,  
 आखिमए ओज़ा एलिउद,  
 15एलिउदए ओज़ा एलाजार,  
 एलाजारए ओज़ा मत्तान,

मत्तानए ओज़ा याकूब,  
 16याकूबए ओज़ा योसेफ,  
 योसेफए ओज़्या मरियमनी ज़ येसु जर्मिके। नोलाई ज़ ख्रीस है  
 दोज़यार।

17है जैद अब्राहामकिन दाऊद राजा पै चौध पिरी ताके। दाऊद  
 राजाकिन बेबिलोनदा क्योःद यारालाँवक पै ब चौध पिरी ज़ ताके।  
 नकिन ख्रीस ओजर्मिउक पै ब चौध पिरी ज़ ताके।

येसु उजर्मिउ

(लूका २:१-७)

18येसु ख्रीस उजर्मिउ इतावनी ज़ — येसुए ओआमा मरियमलाई  
 भर्जा योसेफत निद यानैज़याव। नोनी बिह्या निमादोद ज़ मरियम  
 परमेस्वरए छैव उपुरुसनी ज़ा दैन्या ताद उलिज़याव। 19 नो  
 मरियमलाई निज़याव योसेफ धर्मी मिँ ओतावए मरियम ज़ा  
 दैन्या ताद उलिज़याव सैद ओपाहा झाःद मायाद अलगज़ा रासो  
 ओपैँज्याव। 20 निताव जैव ओपैँज्याक ज़ तछा उमँल परमेस्वरए  
 ओचाकर्या हुद, “नँ दाऊदए ओथोलाव योसेफ, मरियमलाई रैन्या  
 ताछेनी। नो उफूलाव ज़ा ते परमेस्वरए छैव उपुरुसनिकाव ची।  
 21 नो ओज़ा खेपा तारिज़या। नोए उमिन ‘येसु’<sup>†</sup> नैदियो, काराव ल्यो  
 ताकिन नोए उमींरालाई यादोव पापनी यारासुरिज़याव।”

22आव भरी परमेस्वरए अगमबत्तालाई सरो उपरीव मिताव ज़  
 योके। नोए अइ लिद सर्द ओनैज़याव,

23“तोबो कन्या लुज़ा गर्बवती ताद खेपा ज़ा तोबो दैरिज़याव।

होए उमिन इम्मानुएल नैद्यान्या लेर।”

होए ओअर्थ — परमेस्वर गेस ज़ लिज़या।

24है जैद योसेफ सैसिद परमेस्वरए ओचाकर्याए है ओदोव मिताव  
 ओज़्या मरियमलाई रैक्यो। 25 खाली मरियमए ज़ा ओमादैवा

† 1:21 1:21 येसुए ओअर्थ — परमेस्वरए बाँचैसिज़याव। 1:23 1:23 यसै ७:१४

पै निक्याँ मासदैकिनी। ओदैवत फरी नो भाउज़ाए उमिन येसु नैदिक्यो।

## 2

भाउज़ा येसुलाई खिम्हुव जैसीर

1 राजा हेरोदए ओपालाक येसु यहूदिया खन्दलाव बेथलेहेम नाखारल ज़ जर्मिके। उजर्मिउ छीनी जैसीर पुर्ब त०नी यरूसलेमल हुद, 2 “जर्मिउ यहूदीराए याराजा काङ्क उलिज़्याव? नोलाई सरेसून्या सोरो पुर्बल गेरँके। है जैद नोलाई धो गेदोया लिद हुद गेले,” है यारादोकेर। 3 नो पाँ राजा हेरोदए थैद उयुँर आँचा पाँचा ताके। हिताव ज़ यरूसलेमलाव लिज़्याव भरी ब राजाए उयुँ स्यासो ज़ ताके। 4 है जैद राजा हेरोदए ओदेसलाव लिज़्याव घेप्पा घेप्पा पुजारीर सोनो सासूत्री भरी ब दुपद, “नो धर्मसासूत्रलाव सर्सिउ ख्रीस जर्मिन्या पो काङ्क उलिज़्याव?” है लिद यासुधिक्यो। 5 नोराए, “यहूदियालाव बेथलेहेमल ज़ ताव परिन्या। अगमबक्ताए ब अइ लिद सर्द नैव,

6 “अ यहूदिया खन्दलाव बेथलेहेम,

नँ यहूदिया भरिलाव घेपपारानी नँ नमिन ज़िम्ज़ा माले।

नँनी ज़ तोबो याडैताव हुद डामीं इस्राएलीराए यार्गे गावला तान्या ले।”

7 राजा हेरोदए आव भरी थैद जैसीरालाई अलगज़ा खुल्द, “नो सोरो खाक जेरँव?” है दाद थरैद, 8 नोरालाई, “बाचिकेदा, नो जर्मिउ भाउज़ालाई बनै चावस खिम्च्यो। जेदैवत डालाई मनी है दाव ताके। डा ब बाद नोलाई धो डादोरिज़्या,” है दाद बेथलेहेमदा यापरीक्यो। 9 नोर राजाए ओपाँ भैःद याबाज़्याक फरी नो पुर्बलाव यारँव सोरो याडा याडा बाद नो भाउज़ा जर्मिद उलिज़्याव पोक ज़ अदिके। 10 नो सोरोलाई रँःद बनै रेंए रेंए, 11 नो झिमल ज़ पसिकेर। नल नो भाउज़ालाई ओआमा मरियमस उलिज़्याव दैद ओडाक फुलुप्सिद

धो दाद यासुन्दुसर फैद सुनर धुपर बनै चाव चाव यासी डरोर ब चरैःकेर।

12हाः बेलाक ज़ तछा यामँल परमेस्वरए, “जे हेरोदए ल्योदा फरी ओल्द ताबाच्यो,” है ओरादोज़याव रँःकेर। है जैद नोर हेरोदए ओल्योलाव घ्याँ माबाद तँनिकाव घ्याँ यादेसदा ओल्द बाकेर।

भाउज़ा येसुलाई इजिपदा यामोनाव

13नो जैसीर याबाव छीनी तछा योसेफए उमँल मनी परमेस्वरए ओचाकर्या हुद, “नँ सोद हतपूत ज़ भाउज़ा सोनो ओआमालाई लाँद इजिपदा धोंःचिके। फरी ‘हुचिके’ है डामादाचिवा पै होड ज़ लिच्यो। हेरोद राजाए नो भाउज़ालाई खिम्द सैःव पैज्याव,” है दोक्यो।

14हाःत ज़ योसेफ सैसिद रील ज़ नो भाउज़ालाई ओआमास इजिपदा निलाँक्यो। 15 हेरोद ओमासिवा पै होड ज़ लिकेर। है जैद नत ज़ परमेस्वरए अगमबक्तालाई सरो उपरींव पाँ योःके। नोए ओसरो आव ज़, “डाज़ा इजिपनी खुल्द रैद डानै।”

हेरोदए भाउज़ा येसुलाई सैःव ओपैंव

16नो जैसीर याबाव छीनी, ‘जैसीराए ते याछकैनाव ची ओल्यो’ लिन्या सैद हेरोद बनै रसिद बेथलेहेम सोनो नजीलाव खेपा ताद लिज्याव भाउज़ार नेरिमकिन मेदाडाव भरी ओपोःस ज़ सैःव यापरींक्यो। नो ओरासैःव, जैसीराए ड़ादा सोरो यारँःव गोइँनी ज़।

17 नत ज़ यर्मिया अगमबक्ताए ओसरो पाँ योःके। नोए ओसरो आव ज़,

18“रामाल चिर्लनी बिर्ल थासूज्या।

राहेल ओज़ाराए जूँनी घरो ज़ लिज्या।

प्राइँ यासिधुवए सभैःद ब मासभैःधुर।”

इजिपनी पुलुसूद नासरतल यालिनाव

19हेरोद राजा उसिउ छीनी योसेफ इजिपल उलिज्याक ज़ तछा

उमँल परमेस्वरए ओचाकर्या फरी हुद, <sup>20</sup> “नँ सोद भाउज़ालाई ओआमास लाँद इस्राएलीराए जेपोदा ओल्द बाचिके। भाउज़ालाई सैःव पैज़याव ओल ज़ सिधुके,” है ओदोव प्राइँना ज़, <sup>21</sup> योसेफ सैसिद भाउज़ालाई ओआमास इस्राएल देसदा ज़ निलाँक्यो। <sup>22</sup> होड ओकेसोत हेरोदए ओपोल ओज़ा अखिल्लाउसए यहूदीराए यादेस ओचलैज़याव सैँद योसेफ नल लिन्या ओछैःज़याव। है जैद तछा उमँल, ‘गालील खन्दल बाद तोबोक लिनके’ लिद परमेस्वरए है ओदोव रँःक्यो। <sup>23</sup> है जैद गालीललाव नासरत यादोज़याव सहरल लिनाकेर। नो भरी ब अगमबक्ताराए यासरो मिताव ज़ योके। नो सर्सिउ आव ज़, “नोलाई नासरतलाव है दान्या लेर।”

## 3

रील सछैँज़याव यूहनना

(मर्कस १:१-८; लूका ३:१-१८; यूहनना १:१९-२८)

<sup>1</sup>नकिन तछा रील सछैँज़याव यूहनना यहूदियालाव बनल अइ लिद यासथैहुक्यो, <sup>2</sup> “स्वर्गताव राज्या सो हुरिके। जेपापलाई रास्द परमेस्वरए ल्योदा जेयुँ फकैँचिके।”

<sup>3</sup>आव रील सछैँज़याव यूहननाए उज्जूनी यसैया अगमबक्ताए अइ लिद सर्द ओनैज़याव,

“तोबोए ओर्गा बनल अइ लिद उकिज़याव थास्रिज़या,  
‘हुरिज़याव प्रभुए ओयेम बनैद गाँत्या गुँतीलाई सदाँचिके।”

<sup>4</sup>यूहनना ऊँतए ओसनए क्वा ओक्वाइसिज़याव, ओवाँःत स्यालोए वाँःफो ओपोःसिज़याव। नोए स०ल०र कोस्योर ओराकैज़याव, ज़ेराए राप उज़्युज़याव। <sup>5</sup> नोए ओल्योक यरूसलेमलावर, यहूदिया खन्दलावर सोनो यर्दन भै जीदाडावर ओपोःस ज़ ओपाँ थैना याहुज़याव। <sup>6</sup> नोराए सु सु यादोव यापाप यूहननालाई है यादोक ते यूहननाए यर्दन भैल यासछैँक्यो।

७ फरिसीर सोनो सदुकीर यासछैसिहुज्याव रँ:द यूहन्नाए नोरालाई, “ए घुलए ओथोर, जे परमेस्वरए उरिसनी धों:न्या सुए है ओदाचिउ? ८ जे साचो ज़ परमेस्वरए ल्योदा जेयुँ फकैन्या ल्यो ताकिन साचो हो मिताव येन ब दाव ताके। ९ जे फरी, ‘गेपुर्खा अब्राहामनी ज़ परमेस्वरए ओज़ार ताद गेले,’ है जेमालिदी ब ताए। डा साचो है डादाचिज्या, परमेस्वरए सीर लुँरानी तादी ब अब्राहामए ओथोर याजैधुव। १० किताव तोबो मिँए चाव सै माझा:ज्याव सीर धलैद में:ल ओराख्याज्याव, हिताव ज़ परमेस्वरए ब धलैन्याए जूँनी ओरोवा सींए ओजराक झा:द नैव। ११ डा ते परमेस्वरए ल्योदा जेयुँ जेफकैवनी रील डासछैचिज्या। खाली डा डाछींनी डाकिन ओसक्ती ल्यो तोबो हुरिज्या। डा होए ओपोला हाइद्यान्या स्यासो ब डामाले। होए परमेस्वरए छैव उपरूस सोनो में:नी सछैचिरिज्याव। १२ होए गोदा भरी नाडलील च्यापूद चाव भरी धन्सारल झा:द पुल भरिलाई खर्क ज़ माजिपतिन्या में:ल मुन्या ले,” है लिद यासथैक्यो।

येसु रील ओसछैसिउ

(मर्कूस १:९-११; लूका ३:२१-२२; यूहन्ना १:३२-३४)

१३ हा:त ज़ येसु ब गालीलनी हुद यर्दन भैल यूहन्नाए ल्योक सछैसिहुके। १४ यूहन्नाए येसुलाई भै:द मायाद, “डानी मा:क, बुरू डा ची नँनी सछैसिउ परिन्या,” है ओदोक ते, १५ येसुए, “आख पै नँनी ज़ जैव ताके। परमेस्वरए ओपैज्याव मिताव प्राई येन गिन सयो:द्याव ज़ परिके,” है ओदोक ते, यूहन्ना भै:के। १६ येसु सछैसिद रीनी उपुलुसो प्राईना ज़ नम फैसिद परमेस्वरए उपरूस कुइतम मिताव भुहुद ओक्याँत उचुसिज्याव रँ:क्यो। १७ हा:त ज़ नमतिन तोबो गा अइ लिद थास्के, “आव डायुँलाव डाज़ा ज़। आवलाई रँ:द डायुँ होलाँ ताज्या,” है लिके।

## 4

## सैतानए येसुलाई ओजाँचिउ

(मर्कूस १:१२-१३; लूका ४:१-१३)

1 येसु ननी पुलुसुद ओबाजूयाक 'येसुलाई सैतानए घजाँचिउक' लिद परमेस्वरए छैव उपरुसए तोबो साइंसुइव पोड लाँक्यो। 2 नल चालीस दिन, चालीस रात भरी काता ज़ माजूयाद ओल्योए ओकरेए माधुनाक्यो। 3 हा:त ज़ सैतानए येसुलाई झुकैन्याए जूनी ओल्योक हुद, "नँ साचो ज़ परमेस्वरए ओज़ा ताकिन आव लुरालाई भरेस याजैके," है ओदोक ते, 4 येसुए, "धर्मसास्त्रल अइ लिद सर्सिउ लिज्या, 'मिँलाई ज़यावए वाज़ माडाव। डाजूयाव परमेस्वरए ओया:नी पुलुसुज्याव पाँए ची,' " है दोक्यो।

5 नकिन सैतानए येसुलाई यरूसलेमल लाँद ध्यान झिमए उतुपात बैद, 6 "नँ साचो ज़ परमेस्वरए ओज़ा ताकिन आतिनी मेल ज़ो:निके। धर्मसास्त्रल अइ लिद सर्सिउ लिज्या, 'नँलाई बाँचैन्याए जूनी परमेस्वरए ओचाकर्यार परीदीरिज्याव। नोराए नँलाई छींद नखँ लुँत बजारिउ यान्या मालेर,' " है दोक्यो। 7 नकिन येसुए सैतानलाई, "धर्मसास्त्रल आव मनी सर्सिउ लिज्या, 'नप्रभु परमेस्वरलाई जाँचिन्या माताए,' " है दोक्यो।

8 फरी सैतानए येसुलाई तोबो झें:व गोत लाँद संसारलाव राज्या भरी ज़गै मगैवस सतैद्याद, 9 "नँ डाखँत फुलुप्सिद धो नदाँकिन नो नरँ:व भरी नमीं ज़ जैद डाईरिज्या," है दोक्यो। 10 ना:त ज़ येसुए, "ए सैतान, डानी पुलुसुद बान्के। धर्मसास्त्रल इताव सर्सिउ लिज्या, 'नप्रभु परमेस्वरए ओड़ाक फुलुप्सिद होए ओसेवा वाज़ दान्या ताए,' " है ओदोक ते, 11 सैतानए येसुलाई रासुद बाके। हा:त ज़ परमेस्वरए ओचाकर्यार हुद येसुए ओसेवा दोकेर।



येसु परमेस्वरए ओपाँ सथैन्यात उथूसिउ

(मर्कुस १:१४-१५; लूका ४:१४-१५)

12हो बेलाक ज़ 'रील सछैँज्याव यूहन्नालाई क्यो:केर दी' लिन्या येसुए थैद ननी हाइसिद गालीलदा बाके। 13 है जैद येसु उलिज्याव नासरतलाई रास्द जबूलून सोनो नपतालीनी निथोराए यापो लापकाव, गालील दह छयोकाव कफर्नहुम सहरल लिनाके।

14 नो भरी यसैया अगमबक्ताए ओसरो मिताव ज़ यो:के। होए ओसरो आव ज़,

15-16“यर्दन भै होफताव दह छयो जीकाव जबूलून सोनो नपतालीनी निपो लापकाव गालील खन्दलाव

चुम चुमोल लिज्याव छुत जातलावराए

बनै घ्यो:व ज़गै रँ:द नैर।

सिन्या सजाल परिउरालाई

नम ज़राँ: ज़राँ: उसँनाव मिताव ताद ले।”

17है जैद येसु गालीलल ओबावकिन ज़ परमेस्वरए ओपाँ अइ लिद यासथैक्यो, “स्वर्गताव राज्या सो हरिके। है जैद जेपापलाई रास्द परमेस्वरए ल्योदा जेयुँ फकैचिके।”

येसुए चार जनालाई उसिसर ओराजैव

(मर्कुस १:१६-२०; लूका ५:१-११)

18तछा येसु गालील दह छयो छयो ओबाज्याक पत्रुस है यादोज्याव सिमोन सोनो ओभाइ अन्द्रियासनी दहल जाल निरै:सिज्याव निरँ:क्यो। नोनी डाँ:र क्यो:ज्यावनी निल्यो।

19 येसुए नोनिलाई, “डास हुचिन्के, जिनलाई डाँ:र जिन्राखिमज्याव मिताव मिँर खिमन्या डाजैचिन्ऱिया,” है उनिदोव प्राइँना ज़,

20 नोनी निजालर ख्यानैद ओलस ज़ बाकिनी। 21 जाँ होकसै याबावत फरी जब्दियाए ओज्जानी ओदाज्यु याकूब सोनो ओभाइ

यूहन्नानी निबाबु जब्दियास दोङ्गात चुसिद जालर यारातालिङ्गाव रँद नोनिलाई मनी “डास हुचिन्के,” लिद निखुल्क्यो। <sup>22</sup> नोनी बेहार ज़ निबाबुलाई दोङ्गात ख्यानैद येसुस बाकिनी।

येसुए याजोरो हुवरालाई ओरासगराँव  
(लूका ६:१७-१९)

<sup>23</sup>येसु गालील खन्द भरिल यहूदीराए धर्मसास्त्र झिम झिमक बाद ‘स्वर्गताव राज्या हरिके’ लिन्या चाव था सथैद भाँती भाँतिलाव रोगनी याजोरो हुवरालाई ब ओरासगराँज्याव। <sup>24</sup> है जैद ‘येसुए निताव येन दोक्यो दी’ लिन्या सिरिया खन्द भरी फीजिद याजोरो हुवर, याक्याँत माचाव पुरूस ल्योर, पुल्ज्यावर सोनो याक्याँ सिउरालाई मनी येसुए ल्योक यारारैक सगराँद याएक्यो। <sup>25</sup> नो येनर थैद गालील खन्दलावर, देकापोलिसलावर, यरूसलेमलावर, यहूदिया खन्दलावर सोनो यर्दन भै होफताव जीलावर बनै माहोल्या ज़ येसुए उछीं उछीं याबाज्याव।

## 5

परमेस्वरनी धन्याकावर  
(लूका ६:२०-२३)

<sup>1</sup>येसुए नो माहोल्यारालाई रँद तोबो दाँदात बाद उचुसिक उछींत हुज्याव भरी ब ओल्योक ज़ हुकेर। <sup>2</sup> हाःत ज़ येसुए अइ लिद यासथैक्यो,

<sup>3</sup>“धन्या, यायुँल मासघ्योःसिज्यावर,  
स्वर्गताव राज्या नितावराए जूनी ज़ लिज्या।

<sup>4</sup>धन्या, आज्याल सोगोल लिज्यावर,  
यायुँ होलाँ तान्या ले।

<sup>5</sup>धन्या, परमेस्वरए ओक्याँत ख्यासिद यातहस लिज्यावर,  
आव मानुवाताव हक दैन्या लेर।

6धन्या, परमेस्वरए ओपैज्याव मिताव सयोःन्याए जूनी यास० तरा चीज्यावर,

यापैज्याव भरी योःन्या ले।

7धन्या, छुतए ल्योदा यारुं नाज्यावर,  
यालयोदा मनी परमेस्वरए उरुं नान्या ले।

8धन्या, आज्याल यारुं छैवर,  
परमेस्वरलाई रँःन्या लेर।

9धन्या, माखैज्यावरालाई सखैज्यावर,  
यामिन परमेस्वरए ओज्याल गनिसिन्या ले।

10धन्या, परमेस्वरए उरुंलाव मिताव येनत याखिरी पसिद दुखर  
दैज्यावर,

स्वर्गताव राज्या नोराए जूनी ज़ लिज्या।

11“डा डामिनत जेलाई अनाकलाव पाँर ससैद, जेखिरी पसिद,  
उल्ली गिल्ली दाद जेमिन बलेःद यायाचिक धन्याकावर ज़  
जेताज्या। 12 जेरुँर मासतेद रेंच्यो, काराव ल्यो ताकिन स्वर्गताव  
घ्योःव इनाम दैन्या जेले। अगमबक्ता भरिरालाई मनी जेकिन डादा  
निताव दुखर याव ज़ यारानैज्याव।”

सापी सोनो ज़गै

(मर्कुस ९:५०; लूका १४:३४-३५)

13“जे आव मानुवात सापी मितावर जेलिज्या। सापीए ओदार  
ओमालिकिन नोलाई कै जैद ची ओदार ल्यो जैन्या? है जैद नो  
काम मालागिउ ओतावए नोलाई ख्याद मिँराए छिल्सी तिन्या वाज़  
ताज्या।

14“जे आव मानुवाताव ज़गै स्यासो ब जेलिज्या। ज्ञेःवताव जैसिउ  
सहर ब मामोसिए। 15 सोनो मिँराए लोसै तैःद जाए माकपर,  
दिउ बाल्न्यात ची ज्ञाःर। हुनी वाज़ ज़िमल लिज्यावरालाई पलाँ

ताज्या। 16 हिताव ज़ जे मनी मिँराए याड़ाक जेज़गै ओरें:क। हो ताकिन ची चाव जेयेन रँ:द स्वर्गताव जेबाबुए उमिन ब सघ्यो:घान्या लेर।”

कानुनलाव येन सयो:न्या  
(लूका १६:१७)

17“जे डालाई ‘मोसाए ओकानुन सोनो अगमबक्तराए यायेन समैना उहुव’ है तालिच्यो। समैना मा:क, सयो:ना डाहुव ची। 18 डा साचो है डादाचिज्या, आव नाम नम ओमाखेमा पै, धर्मसास्त्रलाव सर्सिउ पाँ ओमायो:वा पै, तोबो ब खेर बान्या माले। 19 है जैद जोए धर्मसास्त्रलाव पाँ तकेज़ा तादी ब ओबले:किन सोनो छुतलाई तँनी ओपैकिन नोए उमिन स्वर्गताव राज्याल प्राइँरानी जिम्ज़ा तान्या ले। फरी नो भरी ओल माबिरैद ओदोकिन छुतलाई ब दान्या ओपैकिन नोए उमिन स्वर्गताव राज्याल घ्यो:व ज़ तान्या ले। 20 है जैद ज़ डा साचो है डादाचिज्या, सास्त्रीर सोनो फरिसीराए यादोज्याव धर्मकिन जे कोसै जेमादोकिन, स्वर्गताव राज्याल पसिउ दैन्या जेमाले।”

रिस सोनो मिँ सै:न्या

21“जे ब थैद जेनैज्याखेहो, भा:काव जेसाखा पुर्खारालाई ‘मिँ मासै:न्या,’ सोनो, ‘जोए मिँ सै:ज्याव, होए सजा ब दैव ज़ परिके’ है लिद सथैव ज़ यारानैज्याव। 22 डा ते झन जेलाई इतावनी है डादाचिज्या, जोए ओभाइलाई रसिद वाज़ ओएकिन नोलाई ब सजा दैन्या ओछ्यास लिज्या, सोनो जोए छुतलाई, ‘नँ कान्ल ज़ काम मालागिउ भोकोता,’ है दोज्याव, नोलाई झन घ्यो:व कचरील लाँन्या ओछ्यास लिज्या। फरी जोए छुतलाई, ‘मुख्र नफ्या:हुव,’ है दोज्याव, नोलाई नर्गलाव में:ए ओज्यास तान्या ओछ्यास लिज्या। 23 है जैद नँ ध्यान झिमल परमेस्वरए उमिनत कातार

चरैःना नबाक ननैए उयुँल नउपर्त कातार उलिज़्याव नसैकिन, <sup>24</sup> नो चरैःना नरैवलाई होक ज़ ख्यानैद डादा नो ननैस सखैसिद वाज़ चरैःयो।

<sup>25</sup>“नजगर्याए अदालतदा मुद्दा झाःनाद उईकिन होड ओमाकेसूद येमक ज़ खैनानी, मानी नोए न्याधिसए उकुइत सूँपिद, न्याधिसए फरी पुलिसए उकुइत सूँपिद इयालखानाल झाःनिरिज़्याव। <sup>26</sup> साचो ज़, नल नपरिकिन तपैसा तादी ब ओपोःस ज़ नमाफोःवा पै पुलुसो दैन्या नमाले।”

जारी येन

(मर्कूस १०:११-१२; लूका १६:१८)

<sup>27</sup>“जे आव ब थैद जेनेज़्याखेहो, ‘अर्काए ओज्याए ल्योदा माबान्या।’ <sup>28</sup> डा ते झन है डादाचिज़्या, जोए तोबो मेंमालाई चाव रँःद उयुँल बलेःव ओपैकिन होए पाखात ब ओबलेःधुव मिताव ज़ लिज़्या। <sup>29</sup> है जैद तँनिकाव नमीए माचावल ओपारैःनिकिन नोलाई कोलाःद ख्याके। नक्याँ भरी नर्गल ओबाज़्याव देखा बुरू तोबो ओमाल्यो पाथ लिज़्या। <sup>30</sup> हिताव ज़ तँनिकाव नकुइए माचावल ओपारैःनिकिन नोलाई चमूद ख्याके। नक्याँ भरी नर्गल ओबाज़्याव देखा बुरू तोबो चमूद ख्यान्या पाथ लिज़्या।

<sup>31</sup>“फरी कानुनलाव आव मनी जेसैज़्याखेहो, ‘जोए ओज्यालाई रासो ओपैकिन होए रासून्या कागत सर्द ओरासोक।’ <sup>32</sup> डा ते झन है डादाचिज़्या, जोए ओज्या ओरेए ओसतत उलिज़्यावत ब ओरेए ओरासूकिन, फरी नो मेंमाए छुत रे ओदोकिन, नो रासूज्याव ओरेए नो मेंमालाई जारी येन ज़ दाव परीक्यो। फरी जोए नो रासूसिउ मेंमालाई रैज़्याव, होए मनी जारी येन ज़ दोक्यो।”

किर्या माझाःन्या

<sup>33</sup>“आव ब थैद जेनेज़्याखेहो, भाःकाव जेसाखा पुर्खारालाई, ‘धुत

किर्या झाःन्या माताए, सोनो, 'परमेस्वरए उमिनत काताराल किर्या जेझाःकिन नोलाई जुनी ब सयोःव ज़ परिए' है लिद सथैव ज़ यारानैजूयाव। <sup>34</sup> डा ते झन है डादाचिजूया, किर्या झाः ज़ ताझाःच्यो। नम छुद तादी ब ताझाःच्यो, नत परमेस्वरए उसिंहासन लिजूया। <sup>35</sup> नाम छुद ब ताझाःच्यो, नाम परमेस्वरए उखँ नैन्या पो ची। यरूसलेमए उमिननी ब ताझाःच्यो, नो राजाराए याराजाए ओसहर ची। <sup>36</sup> जेडै छुद ब ताझाःच्यो, जेडैताव चेमलाई पालो ब जेमाजैधुइ, मोलो ब जेमाजैधुइ। <sup>37</sup> है जैद जे हैज़लाई हैज़, माःकलाई माःक ज़ है लिच्यो। नोकिन आगल्या भरी ओचाहित माल्यो ज़ लिजूया।”

खिस माफेरैन्या

(लूका ६:२९-३०)

<sup>38</sup>“आव ब थैद जेनैजूयाखेहो, ‘छुतलाई ओहा केःद ओएकिन, उमी पाःद ओएकिन, हाए ओपोल हा, मीए ओपोल मी ताव ज़ उपरिजूयाव।’ <sup>39</sup> डा ते झन जेलाई है डादाचिजूया, माचाव येनत खिस ताफेरैच्यो। काताकावए तँनिकाव नगालात लपूतैद उईकिन, तँनिकाव नगाला ब थाँदियो। <sup>40</sup> सोनो काताकावए नचूबन्दी नैन्याए जूनी मुद्दा झाःद उईकिन नफुतु ब हाइद एयो। <sup>41</sup> फरी काताकावए करस ज़ तकिलोमितर लाँव ओपैकिन नोस अझ नेकिलोमितर पै बानी। <sup>42</sup> नँस निजूयावलाई एयो, नँस कातार लोसो ओपैकिन ‘माले’ है मादाद लोइयो।”

सुतुररालाई समारिन्या

(लूका ६:२७-२८, ३२-३६)

<sup>43</sup>“आव ब थैद जेनैजूयाखेहो, ‘नै मेंलाई समारिन्या, सुतुरलाई सोन्या।’ <sup>44</sup> डा ते झन जेलाई है डादाचिजूया, जेसुतुररालाई

5:33 5:33 लेबी १९:१२; गन्ती ३०:२; ब्य २३:२१ 5:34 5:34 यसै ६६:१ 5:35  
5:35 यसै ६६:१; भज ४८:२ 5:38 5:38 प्रस २१:२४; लेबी २४:२०; ब्य १९:२१

मनी यारासमारिच्यो, जेखिरी पसिज्यावराए याजूनी पोंखारिच्यो।  
 45 हो ताकिन ची स्वर्गताव जेबाबुए ओज़ार तान्या जेले।  
 होए चाव माचाव प्राईलाई निमी ब पलेद याएजूयाव, धर्मीर  
 सोनो अधर्मिरालाई नम ब सवाद याएजूयाव। 46 जेलाई  
 समारिज्यावरालाई वाज़ जेरासमारिकिन स्वर्गताव जेजुं कातानी  
 जेदैरिज्याव? ना:वाकाव येन ते पापी है यारादोज्याव सिर्मा  
 स्योःजूयावराए मनी दोज्यार। 47 जेक्याँदाडावरालाई वाज़ मानस  
 जेरासुम्किन नो काता ज़ मा:क। ना:वाकाव ते परमेस्वरलाई  
 मासरेसूज्यावराए ब दोज्यार। 48 है जैद स्वर्गताव जेबाबु किताव  
 ओखत माल्यो छैव लिज्या, जे ब हिताव ज़ ताव परिके।”

## 6

## माल्योरालाई यान्या

1“मिँराए याङ्काक वाज़ सतैसिन्या धर्मनी जोगोइसिद लिच्यो, मानी  
 स्वर्गताव जेबाबुए ल्योनी काता ज़ दैन्या जेमाले। 2 है जैद जे  
 मायोःव माथैवरालाई जेराएक नो कैफतीराए याराएजूयाव मिताव  
 मा:क। नोर मिँराए ङ्काक चाव धर्मी सरै:सिन्याए जूनी धर्मसास्त्र  
 झिम जीदा, बजार जीदा भोंकरर तपूद दुलिज्यार। जेलाई साचो  
 है डादाचिज्या, नोराए याइनाम ना: ज़। 3 है जैद जे मायोःव  
 माथैवरालाई जेराएक वोर्फताव जेकुइए जेभा:व दाबर्याफताव  
 जेकुइए तासैवक। 4 सुए ज़ यामासैद जेभा:व मिताव ओताक। हो  
 ताकिन ची मोंसिउलाव रँ:जूयाव परमेस्वर जेबाबुए नो जेदोव रँ:द  
 स्वर्गताव जेइनाम यान्या ले।”

## परमेस्वरलाई पोंखारिन्या

## (लूका ११:२-४)

5“परमेस्वरलाई जेपोंखारिक ब नो कैफतीराए यापोंखारिज्याव  
 मिताव पोंखारिन्या मा:क। नोर धर्मसास्त्र झिम जीदा, येम

खार जीदा 'प्राइँए घरँ:सिरक' लिद च्याँ:सिद पोंखारिन्या युँ दोज्यार। साचो है डादाचिज्या, नोराए याइनाम ना: ज़। <sup>6</sup> बुरू जे ते परमेस्वरलाई जेपोंखारिक तोबो कुन्तील पसिद ग्राम गल्द सुए ज़ यामारँ:द स्वर्गताव जेबाबुलाई पोंखारिच्यो। हो ताकिन ची मोंसिउलाव रँ:ज्याव परमेस्वर जेबाबुए स्वर्गताव इनाम यान्या ले। <sup>7</sup> फरी जे जेपोंखारिक परमेस्वरलाई मासरेसूज्यावराए माँ:ती पबर्ख्यान तालिच्यो। नोराए 'कुधु ख्यो:व गेपोंखारिकिन थैद्यासिवा' लिन्या समजिज्यार। <sup>8</sup> जे ते नितावर ताताच्यो। जे जेमापोंखारिद ज़ परमेस्वर जेबाबुए 'आव आव चाहिज्या' लिन्या डादा ज़ सैज्याव। <sup>9</sup> जे जेपोंखारिक इतावनी पोंखारिच्यो,

'अ स्वर्गत लिज्याव गेबाबु,

नँ नमिन प्राइँए ज़ छैव ओथरैरक।

<sup>10</sup>स्वर्गताव नराज्या आव नामल उहुक,

स्वर्गताव है नलिज्याव मिताव आव मानुवाल ब ओताक।

<sup>11</sup>गेलाई चाहिज्याव ज्याव दिनकाव ज़ जोरैद्यासियो।

<sup>12</sup>नउपर्त गेदोव पापरानी राससियो।

हो मिताव ज़ गे ब मिँराए गेउपर्त यादोव पापरानी गेरारासूज्या।

<sup>13</sup>गेलाई माचाव चेतैन्यारानी जोगोइद

माचाव भरिनी पले:द पाथस नैसियो।

[खर्क ज़ माखेम्न्या राज्या ब नमीं ज़,

सक्ती ब नमीं ज़, ज़गै मगै ब नमीं ज़। आमेन।']

<sup>14</sup>जे जेडैताव पाप दोज्यावलाई जेरास्किन, स्वर्गताव जेबाबुए

जेलाली मनी रासून्या ले। <sup>15</sup> फरी जे जेडैताव पाप दोज्यावलाई रासो

जेमाभै:किन स्वर्गताव जेबाबुए जेलाली ब रासून्या माले।"]

### उपासिन्या

<sup>16</sup>"जे जेउपासिक कैफतीराए यादोज्याव मिताव तादोच्यो। नोर,

'हत्या गेकातिज्याव प्राइँए घरँ:सिरक' लिद याडा:र ब हुली हुली



च्याव जैसिज्ज्यार। जेलाई साचो है डादाचिज्ज्या, नोराए याइनाम नाः ज़।<sup>17</sup> जे ते जेउपासिक 'मिँराए तासरेस्सिरक' लिद जेडाःर हुर्सिद मासर थीसिद ल्यो ताके।<sup>18</sup> हो ताकिन ची मोसिउलाव रँःज्याव स्वर्गताव जेबाबुए ओल ज़ सैद स्वर्गताव जेइनाम नैघान्या ले।”

स्वर्गताव धन

(लूका १२:३३-३६; १६:१३)

<sup>19</sup>“जे आव मानुवात जेजूनी धन सम्पती तादुप्यो। आव मानुवाताव धन भरी घुनराए ब ज़्युज्ज्यार, खैए ब कैज्याव, चोरराए ब झिम पाःद कुज्यार।<sup>20</sup> है जैद जे जेसम्पती स्वर्गत दुप्युके। नल घुनए ब माज्युव, खैए ब माकैव, चोरराए ब मालारं।<sup>21</sup> काराव ल्यो ताकिन जोड जेधन लिज्या, जेयुँ ब होड ज़ तान्या ले।

<sup>22</sup>“जेक्याँताव बत्ती जेमी लिज्या। है जैद जेमी चाव उलिकिन जेक्याँ भरी पलाँव ज़ ताज्या।<sup>23</sup> फरी जेमी माचाव उलिकिन जेक्याँ भरी चुम चुमोल ज़ ताज्या। है जैद नो जेक्याँताव पलाँव ताव परिन्या चुम चुमो ओताकिन झन ज़ छाम छाम तान्या ताज्या।

<sup>24</sup>“तोबो बाँदाए नेबलो साहुनी नियेन मादोधुव। दाव उपरिकिन नोए तोबोलाई सोद तोबोलाई चाव रँःन्या ले, कितर तोबोए ओपाँ भैःद तोबोलाई ओलेखा नैघान्या माले। हिताव ज़ जे मनी परमेस्वरए ओसेवा सोनो पैसाए ओसेवा तखेपूत जेमादोधुइ।”

व्रीनी फुइ मालिन्या

(लूका १२:२२-३४)

<sup>25</sup>“है जैद डा जेलाई है डादाचिज्ज्या, जे जेक्याँए उजूनी 'काता डाज्युके, काता डाओके, काता डाक्वाइसिके' लिद व्रीनी फुइ तालिच्यो। आव गेजिउ ज़्यान्या क्वाइसिन्याए जूनी वाज माःक।<sup>26</sup> नमताव बाज़ारालाई याराचिऊचिके। नोराए धुर ब माझारः, क्यान्या ब माक्यारः, ज्याव ब मादुपर। हितावत ब नोरालाई चाहिज्याव भरी स्वर्गताव जेबाबुए याएज्याव। परमेस्वरए जेलाई

झन बाजाराकिन घेपपा रँ:चिजूयाव। 27 जेनी सुए ची सोगो दाद जेजिउत तघन्ता जेचाःधुरिजूयाव?

28“है जैद काताए जूँनी क्वाइसिन्या क्वारात सोगो जेदोजूयाव? बुखीताव वासर याराचिऊचिके। नोराए धामा दाद माखलर।

29 हितावत ब सोलोमन राजा बनै तह महौ ओजैसिदी ब वास तकल माताए। 30 परमेस्वरए आछिम वैद परा:ती में:ल बाजूयाव छीर ना: चाव याजैजूयाव ल्यो ताकिन जेलाई झन कै जैद माक्वाइचिउके? काता ना: जेयुँ माहुबोर जेलिजूयाव!

31“है जैद जे ‘काता डाजूयुके, काता डाओके, काता डाक्वाइसिके’ लिन्यादा जेयुँ थू जैद वीनी फुइ तालिच्यो। 32 आव भरी ते परमेस्वरलाई मासरेसजूयावराए याध्यावना ची। जे जेजूनी चाहिजूयाव भरी ते स्वर्गताव जेबाबुए ज्ञ सैजूयाव। 33 बुरू जे प्राइरानी डात परमेस्वरए ओराजूया खिम्द उयुँलाव मिताव येन दान्या जैसिचिके। हो ताकिन ची जेलाई चाहिजूयाव भरी ओल ज्ञ जोरैघाचिरिजूयाव। 34 है जैद जे परा:तीकावए जूँनी सोगो तादोच्यो। परा:तीकाव सोगो हो छचाम ज्ञ खेमजूया। काताए जूँनी आछिमकाव सोगोत झन होलाई ब चाव जेपैजूयाव?”

## 7

अर्काए ओखत मापलेःन्या

(लूका ६:३७-३८, ४१-४२)

1“जे अर्काए ओखत पलेद ताएच्यो, मानी परमेस्वरए जे जेखत ब पलेःघान्या ले। 2 जे छुतलाई कितावनी जेथरैजूया, जे मनी हितावनी ज्ञ जेथरिरीजूया। सोनो किताव गोइँनी जेगोइँजूया, जे मनी हिताव गोइँनी ज्ञ दैन्या जेले। 3 फरी कै जैद ननैए उमीलाव तकेजा सीका नरँ:जूयाव, नँ नमीलाव ना:ल्दिउ मुँदा ताकितर नमारँ:जूयाव? 4 नमीलाव ना:ल्दिउ मुँदा लिजूयावत कै जैद ननैलाई, ‘नमीलाव

सींका हाइद डाई है नदोधुरिजूयाव? 5 ए निताव पाँजूयाव कैफती, डादा नमीलाव मुँदा हाइकेदा, ननैए उमीलाव सींका नहाइक छर्लङ्ग रँःन्या नले।”

काः स्यासोर सोनो ऊ स्यासोर

6“छैव पाँर काः स्यासोरालाई ताराएच्यो, मानी नोर जेल्योदा हुद छुपिहुन्या लेर। सोनो हिरामुती स्यासोर ऊ स्यासोराए याड़ाक ताख्याच्यो, मानी नोराए हिलाल छिल्न्या लेर।”

जोए खिमजूयाव होए ज़ दैजूयाव

(लूका ११:९-१३)

7“फरी ब तोबो है डादाचिजूया, परमेस्वरस जेन्किन जेलाई यान्या ज़ ले, जेखिमकिन दैन्या ज़ जेले, ग्राम कोतो कोतो जेजैकिन जेजूनी फैसिन्या ले। 8 जोए निजूयाव होलाई यान्या ले, जोए खिमजूयाव होए दैन्या ले, जोए कोतो कोतो जैजूयाव होए उजूनी फैसिन्या ले। 9 फरी तोबो ज़िमज़ा लुज़ाए ओबाबुस भरेस उन्किन लुँ ते मायो, 10 डाँः उन्किन घुल ते मायो। 11 है जैद जे निताव पापल लिजूयाव मिँराए जेज़ारालाई निताव चाव चाव यान्या जेसैकिन, स्वर्गताव जेबाबुए झन ओलस जेन्किन चाव चाव कै जैद मायाचिउके? 12 है जैद जे छुतए ल्योनी किताव जेपैजूया, जे ब छुतए ल्योदा हितावनी ज़ दोचिके। मोसाए ओकानुन सोनो अगमबक्तराए यासरो ब नत ज़ तुपिजूया।”

चूव ग्राम

(लूका १३:२४)

13“चूव ग्रामनी ज़ पसिच्यो। नासदा बान्या येम ते राँव, पसिन्या ग्राम ब बनै वैःव लिजूया। नो येमनी बाजूयावर बनै कुधु ज़ लिजूयार। 14 खाली अजम्बरी जुनीदा बान्या येम सोनो ग्राम चूव, धो पसिउ ओतावए नो येमल बान्यार छ्या ज़ ताजूयार।”

मिँ ओयेननी ज़ सरेस्सिए

(लूका ६:४३-४४; १३:२५-२७)

15“परमेस्वरए ओपाँ बलेद तँनी पैज़्यावराए ल्योनी जोगोइसिद लिच्यो। नोर पाखात बगाललाव बेधा स्यासोर जैसिज़्यार, यार्युँल ते छे छे डम्सिउ पर स्यासोर लिज़्यार। 16 किताव सीरालाई यासैनी जेरासरेस्ज़्या, हिताव ज़ नोरालाई मनी यायेननी ज़ सरेस्न्या जेले। कारजुत जोम्परसै मासैए, जुसैत कोराली ब मासैए। 17 हिताव ज़ चाव सीए चाव सै ज़ झाःज़्याव, माचाव सीए माचाव सै ज़ झाःज़्याव। 18 फरी चाव सीए माचाव सै माझाःव, माचाव सीए चाव सै ब माझाःव। 19 जो सीए चाव सै माझाःव नो सीं पल्द मेंःल ख्यान्या वाज़ ताज़्या। 20 है जैद जे हो तँनी पैज़्यावरालाई यायेननी ज़ सरेस्न्या जेले।

21“जोए ओयाःए वाज़ डालाई ‘प्रभु, प्रभु’ है दाँज़्याव, नो स्वर्गताव राज्याल पसिधुन्या माले। जोए स्वर्गताव डाबाबुए उयुँलाव मिताव येन दोज़्याव, हो वाज़ पसिन्या ले। 22 नो छ्याम कुधुए डालाई, ‘अ प्रभु, अ प्रभु, गे नमिननी परमेस्वरए ओपाँ ब गेरासथैके, माचाव पुरूसर ब गेरापलेके, अचम्बलाव सरेसर ब गेरासतैके,’ है यादाँकिन, 23 डा नोरालाई, ‘जेलाई खर्क ज़ डामासरेस्चिए, जे निताव परमेस्वरकिन तँदाडाव येन दाज़्यावर, आनी पुलुस्द बाचिके,’ है दान्या डाले।”

लुँ तर्त सोनो बालुवा तर्त जैसिउ झिमनी

(लूका ६:४७-४९)

24“है जैद जोए आव डापाँ थैद दोज़्याव, नो तोबो ओगहक ल्यो मिँए झिम ओजैक पतालल लुँ तर्त गज ओथाँज़्याव स्यासो लिज़्या। 25 नम बनै वाद, ल्यो माल्यो बतासर भलर उहुक नो झिम लुँ तर्त ओतावए माधलिके। 26 हो मिताव ज़ जोए आव डापाँ थैद

ओमादोकिन तोबो ओगहक माल्यो मिँए झिम ओजैक बालुवा तर्त ओजैव स्यासो ज़ लिज़्या। <sup>27</sup> बतासर दाद, नमर वाद, भलर हुद नो झिमलाई धलैद प्याःपी जैद लाँज़्याव।”

<sup>28</sup>येसुए आव पाँर सथैद उतुपैवत, नो माहोल्थार येसुए ओपाँ थैद अचम्ब ताकेर, <sup>29</sup> काराव ल्यो ताकिन होए यासास्त्रीराए यारापैज़्याव मिताव माताद बनै हकस ओरापैज़्याव।

## 8

येसुए कुरीलाई ओसगराँव

(मर्कूस १:४०-४५; लूका ५:१२-१६)

<sup>1</sup>नाःत ज़ येसु नो दाँदातिन झरिके। उछींत बाज़्याव मिँर बनै माहोल्थार यालिज़्याव। <sup>2</sup> नो बेलाक ज़ तोबो कुरी ओल्योक हुद उखँत फुलुप्सिद, “अ प्रभु, डाल्योदा नयुँ ओताकिन डालाई सगराँन्या नले,” है ओदोक ते, <sup>3</sup> येसुए नोलाई उकुइए छाप्द, “नल्योदा डायुँ लिज़्या ज़, गराँनिके,” है ओदोव प्राइँना ज़ नो ओक्याँताव कुरीए रासुद सोजोकाव ज़ ताके। <sup>4</sup> येसुए नो गराँवलाई, “आव नक्याँताव डादोव येन सुलाई ज़ है तारादोयो। बुरू नगराँव साचो ज़ ओल्यो लिन्या थरैव परीन्याए जूँनी पुजारीए ल्योक सतैसिनाद मोसाए ओकानुनलाव मिताव चरैःन्यार चरैःनाके,” है दोक्यो।

येसुलाई उयुँ हुबो कप्तान

(लूका ७:१-१०; यूहन्ना ४:४३-५४)

<sup>5</sup>फरी येसु कफर्नहुमल ओकेसनावत तोबो रोमी कप्तान ओल्योक हुद, <sup>6</sup> “अ प्रभु, तोबो डानोकोर ओजोरो हुद उखँ उकुइ माचलिद झिमक ज़ घ्याँसिद ले,” है ओदोक ते, <sup>7</sup> येसुए, “ताए, डा हुद सगराँन्या डाले,” है दोक्यो। <sup>8</sup> नो कप्तानए फरी, “अ प्रभु, डा इतावए डाझिमक नँलाई लाँन्या स्यासो डामाले। बुरू आकिन ज़

‘गराँनिके’ है नलिकिन डानोकोर गराँन्या ले। <sup>9</sup> डा ब छुतए ओहक धूँलाव मिँ ज़, डा डाधूँल मनी कुधु सिपाईर लिज़्यार। नोरालाई ‘बाचिके’ है डारादोक बाज़्यार, ‘हुचिके’ है डारादोक हुज़्यार। डाबाँदालाई ब ‘इताव दोके’ है डादोक दोज़्याव,” है दोक्यो।

<sup>10</sup>येसुए नो कप्तानए ओपाँ थैद अचम्ब ताद ओलस बारिज़्यावरालाई, “डा जेलाई साचो है डादाचिज़्या, इस्राएलीराए खार्ल मनी आव मिताव डाल्योदा उयुँ हुबो सु ज़ डामादैताए। <sup>11</sup> आदा थैचिके, स्वर्गताव राज्यालाव भत्यारल पुर्ब-पछचुँनी छुत जातलाव मिँर ब बनै कुधु ज़ हुद अब्राहाम, इसहाक, याकूबरास सिप ज़ चुसिन्या लेर। <sup>12</sup> इस्राएली राज्यालाव ताव परिन्याकावर ते नल मापसिद चुम चुमोल परिरिज़्यार। नल याहार डर डर कैद चिर्लनी बिर्ल घर्न्या लेर,” है दाद, <sup>13</sup> फरी नो कप्तानलाई, “बानिके, डालाई किताव नयुँ उहुबो हिताव ज़ तान्या ले,” है दोक्यो। नो कप्तानए ओनोकोर येसुए है ओदोव बेलाक ज़ होड ओगराँधुव ओल्यो।

येसुए पत्रुसए उमुइँज्युलाई ओसगराँव

(मर्कूस १:२९-३१; लूका ४:३८-३९)

<sup>14</sup>नकिन येसु पत्रुसए उझिमक ओबाक पत्रुसए उमुइँज्यु ओजोरो हुद घ्याँसिद उलिज़्याव रँ:क्यो। <sup>15</sup> येसुए नोलाई उकुइ छाप्द ओयो प्राइँना ज़ ओजोरोए रास्क्यो। नो सोद बेहार ज़ येसुलाई ज़्यावर ब जैदिक्यो।

येसुए याजोरो हुवरालाई ओरासगराँव

(मर्कूस १:३२-३४; लूका ४:४०-४१)

<sup>16</sup>रिमदा रिमदा मिँराए याजोरो हुवर, माचाव पुरूसराए क्यो:द यारानैज़्यावरालाई येसुए ओल्योक यारारैकेर। येसुए ओपाँए ज़ नो माचाव पुरूसर पुलुसद धो:केर, याजोरो हुवर ब गराँकेर। <sup>17</sup> नो ओदोव येन यसैया अगमबक्ताए सर्द ओनैज़्याव मितावनी ज़ ताके।

नोए ओसरो आव ज़,  
 “गेदुखर ब पले-द्यासिक्यो,  
 गेजोरोर ब सगराँद्यासिक्यो।”

येसुस बाव पैजूयावर  
 (लूका ९:५७-६२)

18 येसुए ल्योक तछा मिँ ल्यो माल्यो याछुइसिहुवए दोङ्गाल पसिद उसिसरालाई, “दह होफत गेबाया,” है यादोक्यो। 19 हा:त ज़ तोबो सासूत्री येसुए ल्योक हुद, “गुर्बा, नँ जोदा नबाजूया, डा ब नँस ज़ डाबाया,” है ओदोक ते, 20 येसुए, “स्यालर लिन्या कुँ ब लिजूया, बाज़ार लिन्या सिप ब लिजूया। डा मिँ मिन्सिद हुवलाई ते डै कपन्या पो ब माले,” है दोक्यो।

21 फरी तोबो ओलस बाजूयावए, “अ प्रभु, डादा डाबाबुलाई डागादैदा, नँस डाबाया,” है ओदोक ते, 22 येसुए, “सिउरालाई सिउ स्यासोराए घरागादैजूयारक, नँ ते डास घुहुनी,” है दोक्यो।

येसुए बतासलाई ओथकनैव

(मर्कूस ४:३५-४१; लूका ८:२२-२५)

23 नकिन येसु दोङ्गाल उपसिउत उसिसर ब ओलस ज़ बाकेर। 24 दह माँजल याबाजूयाक उमँ:जानी ल्यो माल्यो बतास हुद रीए ओछल्कार दोङ्गाल पसिद दोङ्गालाई गदैवा गदैवा जैक्यो। हो बेलाक येसु डल्द उलिजूयाव। 25 उसिसराए येसुलाई सोचोइद, “प्रभु, गेलाई बाँचैसिके, खदम ज़ गेतारिके,” है यादोक ते, 26 येसु सोद, “जे काराव जेछे-जूयाव? जेरुँ ना: माहुबोर,” है दाद बतास सोनो रीनिलाई उनिसिडारो प्राइँना थपक ज़ अदिके। 27 निताव रँ:द उसिसर अचम्ब ताद, “आव किताव मिँ ओताव? बतासर रीराए ब ओपाँ यादोजूयाव,” है लिकेर।

खादर पोल लिज्जयाव बूलिउनी

(मर्कूस ५:१-२०; लूका ८:२६-३९)

28 येसु उसिसरास दह होफताव गदरिनीराए यापोड याकेसो प्राइंना ज़ माचाव पुरूसराए क्योःद यारानैज्यावनी नेब्लो खादर पोनी पुलुस्द नोस दैसिहुकिनी। नोनी बनै निछचास ल्योनी निल्यो, नलाव घ्याँ सु ज़ आदा होदा यामालिधुज्याव। 29 नोनी बनै चोइस अइ लिद किकिनी, “अ परमेस्वरए ओज़ा, गिनस नखै काता उलिज्याव? परमेस्वरए गोइँद ओनैज्याव बेला ओमाहुद ज़ गिनलाई दुख याना नहुव रो?” है दोकिनी।

30 नो बेलाक जाँ होकसैक ऊर तबगाल यालाज्याव। 31 नो माचाव पुरूसराए, “गेलीई पलेन्या ताकिन नो ऊराए क्यॉत बाव यासिके,” है यादोक ते, 32 “ताए, नोनी निक्याँनी पुलुस्द बाचिके,” है ओरादोक ते, नोर पुलुस्द ऊराए याक्याँत यापसिउ प्राइंना ज़ ऊर ओपोःस ज़ बूलिद दाँदातिन सुइँःकिनाद दहल जोःद प्राइँ ज़ सुद सिकेर।

33 निताव रँःद नो ऊ गावलार ननी धोंःनाद सहर जीदा बाद प्राइँलाई ज़ ‘माचाव पुरूसराए क्योःद यारानैज्याव मिँनिलाई इताव इताव ताके’ है यारादोकेर। 34 नो याथैव प्राइंना ज़ सहरलावर ओपोःस ज़ येसुए ल्योक बाद, “आनी पुलुस्द बान्के,” है दोकेर।

## 9

येसुए उखँ उकुइ सिउलाई ओसगराँव

(मर्कूस २:१-१२; लूका ५:१७-२६)

1 हाःत ज़ येसु उसिसरास दोङ्गाल पसिद ड़ादाडाव यालिज्याव कफर्नहुमल ज़ बाकेर। 2 नल तोबो उखँ उकुइ सिउलाई झेलोङ्गाल झाःद येसुए ल्योक रैकेर। येसुए नोराए यायुँ उहुबो रँःद नो उखँ उकुइ सिउलाई, “अ कान्छा, नयुँ होलाँ जैके, नपाप क्याल्सिके,” है दोक्यो। 3 नो है ओदोव सास्त्रीराए थैद या याल, “आव मिँए



काराव ब्याँ इताव परमेस्वरए उमिन ओबलेऽयाव?” है लिकेर।  
 4 येसुए नोराए यायुँलाव पाँ सैद, “जे काराव जेयुँल आव डापाँ  
 माचाव जेथरैऽयाव? 5 नो मिँलाई ‘नपाप क्याल्लिके’ है दान्या सै  
 ‘सोद बान्के’ है दान्या काताकाव सजालो उलिऽयाव? 6 अब डा मिँ  
 मिन्सिद हुवए आव मानुवात पाप क्याल्लन्या डाकुइत उलिऽयाव  
 सै ओमालिऽयाव, चिऊचिके,” है दाद नो उखँ उकुइ सिउलाई, “नँ  
 सोद नझेलोङ्गार घुर्द नझिमदा बान्के,” है ओदोव प्राइँना ज़, 7 नो  
 उखँ उकुइ सिउ थर च्याँःसिद ओझेलोङ्गार घुर्द उझिमदा बाके।  
 8 नो रँःऽयाव माहोल्याराए निताव येनर रँःद छेद, “परमेस्वरए  
 मिँरालाई ब इताव अचम्बलाव सक्तीर ओराएऽयाव ओल्यो,” लिद  
 परमेस्वरए उमिन सघ्योःदिकेर।

येसुए मत्तीलाई उसिस ओजैव

(मर्कूस २:१३-१७; लूका ५:२७-३२)

येसु ननी ओबाऽयाक तोबो मत्ती यादोऽयावलाई सिर्मा स्योःन्या  
 अद्दाक चुसिद उलिऽयाव रँःद नोलाई, “डास हुन्के,” है ओदोव  
 प्राइँना ज़ नो च्याँःसिद येसुए उछीत बाके।

10 येसु उसिसरास होए उझिमक बाद ज्ञान्याए जूनी चुसिकेर। नो  
 बेलाक ओलस सिप ज्ञयुऽयावर सिर्मा स्योःऽयावर सोनो पापी है  
 यारादोऽयावर बनै कुधु ज़ यालिऽयाव। 11 फरिसीराए निताव रँःद  
 येसुए उसिसरालाई, “जेगुर्बाए कै जैद निताव सिर्मा स्योःऽयावर  
 सोनो पापीरास सिप उज्ञयुऽयाव?” है यारादोकेर।

12 येसुए नो यापाँ थैद, “याजोरो माहुऽयावरालाई सगराँन्या मिँ  
 माचाहिए, याजोरो हुऽयावरालाई वाज़ चाहिऽया। 13 हिताव ज़ डा  
 मनी ‘गे धर्मी’ है लिऽयावराए जूनी डाहुव माःक, ‘गे पापीर ज़’ है  
 लिऽयावराए जूनी डाहुव ची। आव धर्मसास्त्रलाव पाँए ओअर्थ  
 ब सैच्यो, ‘पाथा पल्द चरैःऽयावरास माःक, यादया ल्योरास डायुँ

होलौं ताजूया।' ”

उपासिन्या

(मर्कूस २:१८-२२; लूका ५:३३-३९)

14 हो बेलाक ज़ रील सछैंजूयाव यूहन्नाए उसिसर येसुए ल्योक हुद, “गे सोनो फरिसीर गेउपासिजूया, नँ नसिसर काराव यामाउपासिजूयाव?” है यादोक ते, 15 येसुए नोरालाई, “जन्तीर ब्याहोल्यास यालेवा पै सोगोल यालिजूयाव रो? खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर,” है दाद, 16 फरी घर्ती झाःद याएक्यो, “सुए ज़ ओरे छिबो क्वालाई साःरो क्वाए मातालिउ, ओतालिकिन नो साःरोए पुराँदोलाई ओल्योदा सेल्द इन ज़ चीजूयाव। 17 सोनो, साःरो दाखमद्य पुराँदो प्रिर्गुलल सुए ज़ माझाःर। मानी उसंए प्रिर्गुललाई सुफुद दाखमद्य ब भोन्या ले, प्रिर्गुल ब खेर ज़ बान्या ले। है जैद साःरो दाखमद्य साःरो प्रिर्गुलल झाःकिन वाज़ नेथो ज़ खेर बान्या मालिनी।”

याइरसए ओज़ा सोनो झी भोन्या ओबेथा ल्यो मेंमा

(मर्कूस ५:२१-४३; लूका ८:४०-५६)

18 येसुए नो पाँर ओरासथैजूयाक ज़ धर्मसास्त्र झिमलाव याघेप्पा तोबो हुद येसुए उखँत फुलुप्सिद, “मेंमा डाज़ा भर्जा ज़ सिद ले। नँ हुद नोए ओक्याँत नकुइ नैद नएकिन नो सैसिन्या ले,” है ओदोक ते, 19 येसु ननी च्याँःसिद उसिसरास नोस बाकेर।

20 येमत याबाजूयाक तोबो बाह बर्स भरी ओक्याँतिन झी भोन्या बेथाए क्योःद ओनैजूयाव मेंमा येसुए उछीनी हुद ओक्वाए उतुपात छापदिक्यो। 21 नो मेंमाए उयुँल उयुँल ‘येसुए ओक्वा वाज़ छापो डादैकिन आव बेथानी गराँन्या डाले’ है लिद ओखामिजूयाव। 22 येसु उछींदा फर्किद नोलाई रँःद, “अ माँज़ा, नयुँ होलौं जैके,

डालाई नयुं नसुहुबोनी ज़ नगराँके,” है ओदोव प्राइँना ज़ नो मेंमा गराँके।

23 हाःत ज़ येसु उसिसरास नो धर्मसासूत्र झिमलाव याघेप्पाए उझिमक याकेस्क नो सिउए उजूनी सहन यातपूज़याव, चिर्लनी बिर्ल याघर्ज़याव रँःद, 24 येसुए नोरालाई, “लाँःदा बाचिके, लुज़ा मासिए, अइज डल्द ले,” है यादोक्यो। येसुए ओपाँ थैद हसैकेर। 25 येसुए नोरालाई लाँःदा पुलुसो परींद ओल झिमल पसिद नो सिउ लुज़ालाई उकुइनी ओक्योःव प्राइँना थर च्याँःसिके। 26 निताव अचम्बलाव पाँ नो खन्द भरिदा ज़ थासूनाके।

येसुए निमी मारैःवनिलाई रँःधुन्या उनिजैव

27 येसु ननी पुलुसूद ओबाज़याक नेब्लो निमी मारैःवनी उछीं उछीं बाद, “अ दाऊदए ओथोलाव, गिनलाई नयुं ओनाक,” लिद बनै चोइस किकिनी। 28 येसु झिमल उपसिउत नो निमी मारैःवनी ब ओल्योक ज़ हुकिनी। येसुए नोनिलाई, “डालाई ‘नसगराँसिन्धुया ज़’ लिद जिनयुं माहुपूज़या?” है उनिदोक ते, “गिनयुं हुपूज़या, प्रभु,” है दोकिनी। 29 हाःत ज़ येसुए नोनिलाई निमीत छाप्घाद, “जिनयुं उहुबो मिताव ज़ ओताक,” है उनिदोव प्राइँना, 30 रँःधुन्या ताकिनी। येसुए नोनिलाई फरी, “आव जिनक्याँताव डालोव येन सुए ज़ तासैरक,” है दाद निअर्थेक्यो। 31 नोनी झन ननी बाद येसुए ओदोव भरी प्राइँड ज़ है यारादोनाकिनी।

येसुए तोबो लातालाई पाँधुन्या ओजैव

32 नोनी निबाव छींनी फरी माचाव पुरूसए क्योःद ओनैज़याव तोबो लातालाई येसुए ल्योक रैकेर। 33 येसुए नो माचाव पुरूस पलेःद ओयो प्राइँना ज़ नो लाता पाँधुन्या ताके। नो येनर रँःद नक लिज़याव माहोल्याराए, “इताव येनर ते इस्राएलीराए गेपोल खर्क ज़ गेमार्ःए!” लिद अचम्ब ताकेर। 34 फरिसी भरिए ते, “आवए माचाव पुरूसराए याघेप्पाए उमिननी माचाव पुरूसर यापलेःज़याव,” है लिकेर।

मिरालाई रँ:द येसुए उयुँ ओनाव

35 येसु सहर सहर, नाखार नाखार यादुप्सिज्याव धर्मसासत्र झिम झिमक बाद परमेस्वरए ओराज्यालाव चाव था ब ओरासथैज्याव, भाँती भाँतिलाव रोगनी याजोरो हुवरालाई मनी ओरासगराँज्याव। 36 नो ओल्योदा हुज्याव माहोल्यारालाई यागावला माल्यो यार्च्या सिद थलिउ बेधा स्यासोरालाई रँ:द, येसुए उयुँ नाद, 37 उसिसरालाई है यादोक्त्यो, “तामर चिकार यामी:नाव मिताव, परमेस्वरए ओराज्याल हुन्यार कुधु ज़ ताद लेर। खाली नोरालाई रैन्या बाहोर्यार ते छ्या ज़ ताकेर। 38 है जैद नोरालाई रैन्या मिर ओरापरीवक लिद परमेस्वरलाई पोखारिक्त्यो।”

## 10

येसुए उसिसरालाई ओरापरीव

(मर्कुस ३:१३-१९; ६:७-१३; लूका ६:१२-१६; ९:१-६)

1 येसुए बाह जना उसिसरालाई खुल्द माचाव पुरूसर पलेन्या सोनो भाँती भाँतिलाव रोगनी सगराँन्या सक्तीर ब याएक्त्यो।

2 नो बाह जना ओसाचीराए यामिनर आवर ज़ — प्राइरानी डाताव उसिस पत्रुस यादोज्याव सिमोन, नकिन नोए ओभाइ अन्द्रियास, जब्दियाए ओज्जानी याकूब सोनो यूहननानी। 3 नकिन फिलिप, बारथोलोमाइ, थोमा, सिर्मा स्यो:ज्याव मत्ती, अल्फयसए ओज्जा याकूब, थेदियस, 4 देसभक्ता सिमोन सोनो छीनी येसुलाई धोका याज्याव यहूदा इस्करियोत।

5 नो बाह जनारालाई येसुए अइ लिद यापरीक्त्यो, “जे जेबाक यहूदीराकिन छुत जातलावराए ल्योदा ताबाक्त्यो, सोनो सामरीराए यासहरल ब तापसिक्त्यो। 6 बुरू एकसब्घा ज़ इस्राएली जातलाव डोइव बेधा स्यासोराए ल्योड ज़ बाक्त्यो। 7 नड बाद पो पोड, ‘स्वर्गताव राज्या सो हरिके’ है लिद यारासथैक्त्यो। 8 याजोरो

हुवरालाई ब यारासगराँच्यो, सिउरालाई याराजागैच्यो, कुरीरालाई सोजोकाव ज़ याराजैच्यो, माचाव पुरूसर यारापलेच्यो। आव सक्ती भरी अइज़ जेदैके, अइज़ याराएच्यो।<sup>9</sup> जेवाँ:फोत सुन चाँदीर पैसार तालाँच्यो।<sup>10</sup> येमत जेबाक झैं ब तालाँच्यो, फेरैसिन्या क्वा ब तालाँच्यो, छुत पोला ब तालाँच्यो, झुइ ब तालाँच्यो। जो येनत तादी ब येन दाज़्यावए ज़्याव दैव ज़।

<sup>11</sup>“फरी जो नाखारल जो सहरल तादी ब जेबाक जे लिन्या स्यासो सोजो मिँए उझिमक लिच्यो। ननी जेमापुलुसा पै नक ज़ लिच्यो।<sup>12</sup> नो झिमल जेपसिक, ‘आव झिमलाई असिक ओताक,’ है लिच्यो।<sup>13</sup> है जैद नो झिमलावराए जेलाई नैन्या स्यासोर यालिकिन नो जेदोव असिक नोरास ज़ ओताक। फरी नोर जेलाई नैन्या स्यासोर यामालिकिन नो जेदोव असिक नोरास ताताक।<sup>14</sup> जोराए जेलाई ल्यो मायाद जेपाँ ब थैव यामाभै:किन नो झिमनी तादी ब सहरनी तादी ब जेपुलुस्क नो पोलाव जेखँताव गालो धुइरो नल ज़ थरैद ख्यानैद याराएच्यो।\*<sup>15</sup> डा जेलाई साचो है डादाचिज़्या, परमेस्वरए फाल्न्या छ्याम नो सहरलाव मिँराकिन बुरू सदोम सोनो गमोरालावरालाई सहिधुन्या तारिज़्या।”

सम्जैन्या पाँर

(मर्कूस १३:९-१३; लूका २१:१२-१७)

<sup>16</sup>“जे फरी जोगोइसिद बाच्यो। जेलाई प्रर मितावराए खार्ल बेधा पाथा मितावर जैद डापरीचिज़्या। है जैद जे सैन्यात घुल मिताव बाथो, दान्यात कुइतम मिताव लातो ताच्यो।<sup>17</sup> है जैद माचाव मिँराए ल्योनी जोगोइसिच्यो। नोराए जेलाई अदालतदा लाँद सँपिचिरिज़्यार, धर्मसास्त्र झिम झिमल री:चिरिज़्यार।<sup>18</sup> सोनो डा डाजँनी हाकिमर राजाराए डाक सच्याँद खोले:चिरिज़्यार। ननी ज़ जे

\* 10:14 10:14 मर्क ६:११ चिऊन्या। 10:15 10:15 उत १९:२४-२८

नोरालाई सोनो छुत जातलावरालाई डासाची यान्या जेले। 19 है जैद नोराए जेलाई यासूँपिचिक, 'डा कै लिन्या, काता पाँन्या ओताव' लिद जेयुँ आँचा पाँचा ताजैच्यो। नो बेलाक जे पाँव परिन्या भरी परमेस्वरए ल्योनी ज़ दैन्या जेले। 20 नो बेलाक पाँन्यार जे माःक, परमेस्वर जेबाबुए छेंव उपुरूस जेयाःत चुसिद पाँन्या ले।

21 "हो बेलाक ओभाइए ओदाज्युलाई, ओबाबुए ओज़ालाई सैःन्या सजाल यारापारैरिज़्यार। याबाबु याआमाकिन तँदा जैसिद याज़ाराए सैःन्या सजाल यारापारैरिज़्यार। 22 जे डामिनतावर जेतावए जेलाई प्राइँए सोन्या लेर। खाली जो आव भरी ओमाखेमा पै थ०रिज़्या, होए अजम्बरी जुनी दैन्या ले। 23 जो नाखारल जेबाज्या होल जेखिरी यापसिकिन ननी हाइसिद छुत नाखारल धोंःच्यो। साचो है डादाचिज़्या, जे इस्राएलीराए यासहर भरिल आव येन जेमातुपैद ज़ डा मिँ मिन्सिउ हुन्या डाले।"

24 फरी, "उगुर्बाकिन उसिस घेप्पा माताए, ओयेन दाज्याव ब ओघरपतीकिन घेप्पा माताए। 25 उसिस उगुर्बा ओतावक पै वाज़ ताज़्या, ओनोकोर मनी ओघरपतीए ओहक भरी ओदैदी ब ओघरपती ओतावक पै वाज़ ताज़्या। है जैद डा झिमए ओर्गैलाई ज़ माचाव पुरूसराए याघेप्पा 'बालजिबुल' है यादाँकिन इन जे डाझिमलावरालाई कै जैद है मादाचिरके?"

सु रेंःद छेःन्या

(लूका १२:२-९)

26 "है जैद जे नोरालाई रेंःद ताछेःच्यो। नो बेलाक कप्सिउल लिज़्याव भरी प्राइँए सैन्या लेर, मोंसिउल लिज़्याव भरी ब छर्लङ्ग ज़ रेंःरिज़्यार। 27 है जैद जेलाई मोंसिउलाव है डादाचिउ भरी जे पाखाड ज़ यारासथैनाच्यो। डाल्योनी जेर्नाल खुस खुसनी जेथैव भरी ब थालातिन यारासथैच्यो। 28 जेक्याँलाई वाज़ सैःद्याज्यावर जेपुरूसलाई कैज़ माजैधुज्याव मिँर रेंःद ताछेःच्यो। बुरू जेपुरूस

जेक्याँलाई नर्गल ख्याद चुयाप जैधुज्याव परमेस्वरलाई रँःद वाज्र छेच्यो।

29“नेब्लो बिडर्या तपैसाल ओमाबिकैज्याव रो? बिडर्या नाः सोझो ओतादी ब स्वर्गताव जेबाबुए ओमासैंद तोबो ब नामल तेन्या माले।

30 होए जेडैताव जेचेम आः लिज्या लिन्या ब सैज्याव। 31 है जैद काताल ज़ ताछेच्यो। कुधु बिडर्याराकिन होए जेलाई घेप्पा रँःचिज्याव।

32“है जैद जोए मिँराए डाक ओलाज माहुद ‘डा येसुसकाव ज़’ है लिज्या, डा ब नोलाई स्वर्गताव डाबाबुए ओडाक ‘डासकाव ज़’ है दान्या डाले। 33 हो मिताव ज़ फरी जोए मिँराए डाक ‘डा येसुसकाव माःक’ है लिज्या, डा मनी स्वर्गताव डाबाबुए ओडाक ‘आव डासकाव माःक’ है दान्या डाले।”

सिसए फोःव परिन्या एः

(लूका १२:५१-५३; १४:२६-२७)

34“जे डालाई ‘आव मानुवाताव मिँरालाई सखैना हुव लिज्या’ है तालिच्यो। डा ते झन जेखार्ल तरवाली रैद डाहुव मिताव लिज्या।

35 आव डापाँए ज़ा बाबुनिलाई माखैव निजैरिज्याव। हिताव ज़ ज़ा-मा तादी ब, फुबु भदै तादी ब माखैव याजैरिज्याव, 36 सोनो यासुतुर याझिमल ज़ तान्या ले। 37 जोए डाकिन ओबाबु ओआमानी निल्योदा उयुं थू ओजैकिन नो डासकाव तान्या स्यासो माले। सोनो डाकिन ओज़ाराए ल्योदा उयुं थू ओजैकिन हो ब हिताव ज़ ताज्या। 38 है जैद जोए कुसत सिन्या मिताव दुखर सहिउ माभैःद डाछींत ओमाहुकिन नो डासकाव तान्या स्यासो माले। 39 जोए आव उजिउत ओललाई तान्या वाज्र खिमूज्याव, होए उजुनीलाई समैज्याव। फरी जोए आव उजिउत उजिउए मया मादाद डा डाजूनी दोज्याव, होए जुनी दैरिज्याव।”

सिसए दैन्या इनाम

(मर्कूस ९:४१)

40“जे परमेस्वरए ओपाँ जेरासथैनाक जोए जेलाई ल्यो याचिजूयाव, होए डालाई ब ल्यो ओयाँव मिताव ज़ लिजूया। नो डालाई वाज़ माःक, डालाई परीजूयावलाई मनी ल्यो ओयो मिताव ज़ ताजूया। 41 जोए अगमबक्तालाई ओयेन सरेस्द उझिमक ल्यो एजूयाव, नोए मनी नो अगमबक्ताए ओदैरिजूयाव मिताव ओल ब दैन्या ले। हो मिताव ज़ जोए धर्मी मिँलाई ओयेन सरेस्द उझिमक हुव एजूयाव, होए मनी नो धर्मीए ओदैरिजूयाव मिताव ओल ब दैन्या ले। 42 डा जेलाई साचो है डादाचिज़्या, जोए ज़िमज़ारालाई तादी ब डासकावर याल्यो लिद सरेस्द तुखुरी सोमो री वाज़ ओराएदी ब नोए उइनाम जुनी ब दैन्या ज़ ले।”

## 11

1येसुए बाह्व जना उसिसरालाई आव पाँ भरी है दाद ओरापरींवत ओल मनी नलाव सहर सहर, नाखार नाखार जीदा परमेस्वरए ओपाँ यासथैनाक्यो।

यूहन्नाए येसुए उजूनी उसुधिउ पाँ

(लूका ७:१८-२३)

2रील सछैजूयाव यूहन्ना इयालखानाल उलिजूयाक ज़ ख्रीसए ओयेन भरी थैद तोबो नेब्लो उसिसरालाई येसुए ल्योक, 3 “नो धर्मसासत्रलाव सर्सिउ ‘हुरिजूया’ है यालिजूयाव नँ ज़ रो, सँ छुतलाई कीन्या?” है दोनाव यापरीक्यो। 4 येसुए नो है यादोव थैद नोरालाई, “आव डादोव जेरँव जेथैव भरी यूहन्नालाई है दोच्यो। 5 ‘यामी मारैःवरालाई सरैःद याएजूयाव, माबाधुन्यारालाई बाधुन्या याजैजूयाव, कुरीरालाई यासगराँजूयाव, यार्ना माथासोरालाई थैधुन्या याजैजूयाव, सिउरालाई याजागैजूयाव,



गरीबरालाई ब परमेस्वरए ओपाँ यासथैज्याव,' है दोनाच्यो।  
6 डालाई रें:द यायुँ माके:ज्यावर असिक दैवर लिज्यार," है दाद  
यापरीक्यो।

यूहन्नाए उजूनी येसुए ओपाँ  
(लूका ७:२४-३५)

7नोर याबाव छीनी येसुए माहोल्यारालाई यूहन्नाए उजूनी अइ  
यादोक्यो, "जे यूहन्नाए ल्योक बनल जेबाक नोलाई किताव  
जेरें:या? बतासए आदा फुलुपनी होदा फुलुप ओजैज्याव छी  
स्यासो ते जेमारे:खेहो। 8 हिताव ओमालिकिन किताव जेरें:या?  
सै बनै चाव चाव क्वा क्वाइसिउ मिँलाई जेरें:व? निताव  
क्वा क्वाइसिज्यावर ते दरबारल वाज लिज्यार सानी। 9 है जैद  
ओल्योक जेबाक नोलाई किताव जेरें:या? अगमबक्ता ज़ जेरें:खेहो  
सानी। डा फरी है डादाचिज्या, अगमबक्ताकिन ज़न घेपपालाई ज़  
जेरें:के। 10 नो यूहन्ना धर्मसास्त्रलाव सर्सिउ मिँ ज़। नोए उजूनी  
सर्सिउ आव ज़,

'डाकत्वाल्यालाई नड़ा नड़ा परींद डाईज्या।

नजूनी नोए नड़ादा ज़ नयेम तयार जैदीरिज्याव।'

11 है जैद डा जेलाई है डादाचिज्या, मिँनी जर्मिउ भरिरानी रील  
सछैज्याव यूहन्नाकिन घेप्पा सु ज़ माले। हैदी ब स्वर्गताव  
राज्यालाव गोइँनी ताकिन ते प्राइरानी ज़िमज़ा नोकिन घेप्पा  
लिज्या। 12 है जैद रील सछैज्याव यूहन्नाए ओरासथैहुवकिन आक  
पै ज़ मिँ स्वर्गताव राज्याल पसिन्याए जूनी याजिउ च्यो च्यो  
झा:द काला मुलु छुइसिनाज्यार। फरी तँदा जैसिज्यावर नोलाई  
हारैद वैन्या बनै धामा दोज्यार। 13 मोसाए ओसरो कानुनलाव  
सोनो अगमबक्तराए यापालाकिन यूहन्नाए ओपाला पैकाव यापाँव

भरी ब हुजूयाव ख्रीसए उजूनी ज़ ओल्यो। 14 सोनो आव ब जेमातीधुरिजूया, नो ख्रीसकिन डादा हरिजूया है यालिजूयाव एलिया ते नो यूहन्ना ज़। 15 आव पाँ जोए थैन्या उयुँ लिजूया, चावस ओथैवक।”

16येसुए फरी, “आव बेलाकाव मिँर कितावर यालिजूयाव लिक ते, बजार खार्ल रैःसिजूयाव लुज़ा स्यासोर लिजूयार। 17 नोर यानैरास गन्गनैद,

‘बाँसुली तपूद गयाचिक ब जेमास्याके,  
लँसिद गयाचिक ब जेमाघर्के।’

18हो मिताव ज़ रील सछैजूयाव यूहन्नाए ज़यान्यार ओमाज्युक, ओन्यार ओमाओक नोलाई ‘दैनी परिद ले’ है दोजूयार। 19 डा मिँ मिन्सिद हुवए फरी ज़यान्यार डाजूयुक, ओन्यार डाओक, ‘चिऊचिके, काता ज़ मानैजूयाव ज़यास्ती, दाखमद्य ओए ओए बारिजूयाव, सिर्मा स्योःजूयाव पापीराए यानै’ है दाँजूयार। हैदी ब डा डागहक थोरिउ लिजूया लिन्या डायेनए ज़ थरैजूयाव।”

यायुँ माफकैजूयाव सहरर

(लूका १०:१३-१५)

20नकिन येसुए अचम्बलाव ओयेन सतैद ओरायो सहरलाव मिँराए यायुँ यामाफकैवनी नोरालाई अइ लिद यासिडार्क्यो, 21 “जे खोराजीन सोनो बेथसेदालावरालाई थैए माँतकन ज़ लिजूया। जे जेरैःव परमेस्वरए ओसक्तीलाव येनर तुरोस सोनो सीदोनलावराए\* यायुँ ताकिन आः झरी यापापए जूनी यायुँ माचाव दाद बर्ला सुर्सिद धुलील चुसिद यायुँ फकैद यापापर रासुधुखेरहो। 22 है जैद परमेस्वरए फालन्या छ्याम जेकिन बुरू तुरोस सोनो

11:14 11:14 मला ४:५ \* 11:21 11:21 तुरोस सोनो सीदोन सहरलाव माचाव येन दोजूयाव छुत जातलाव मिँराकिन यहूदीर यासध्योःसिजूयाव। 11:21 11:21 यसै २३:१-१८; इज २६:१-२८:२६; योए ३:४-८; आमो १:९-१०; जक ९:२-४

सीदोनलावरालाई सहिधुन्या तारिजूया।

23“हिताव ज़ फरी जे कफर्नहुमलाव मिँर, स्वर्गत केसो मितावर जेडम्सिजूया, झन नर्गल ज़ बान्या जेले। जेल्योडाव अचम्बलाव येनर सदोम सहरल सतैद डारायो ताकिन नो सहर आःपै रहिन्या ओल्यो। 24 है जैद जेलाई है डादाचिजूया, परमेस्वरए फाल्न्या छचाम जेकिन बुरू सदोमलावरालाई सहिधुन्या तारिजूया।”

“डाल्योक हुद जेर्सा नैचिके”

(लूका १०:२१-२२)

25नाःत ज़ येसुए परमेस्वरलाई, “अ बाबु, नाम नमलावराए याडैताव, नँलाई धन्याबाद डाचरैःनिजूया। नँ नपाँर सैन्या जैसिजूयावर, याबुद्धी ल्यो जैसिजूयावरालाई सतैद मायाद, भाउज़ा मितावरालाई सतैद नराएके। 26 हैज़ बाबु, नल्योदा बान्या येम नो ज़ चाव नथरैके,” है लिद पोखारिक्यो।

27नकिन येसुए, “ताव भरी डाबाबुए डाकुइत ज़ याद नैनाव। किताव परमेस्वरए वाज़ ओज़ालाई सरेसजूयाव, हिताव ज़ ओज़ाए वाज़ परमेस्वरलाई सरेसजूयाव। है जैद डा छुतलाई सतैद डाएकिन वाज़ होए परमेस्वर डाबाबुलाई सरेसूधुजूयाव। 28 जे वीनी फुइ ताद थलिद लिजूयावर, डाल्योक हुद जेर्सा नैचिके, डा जेरुँर होलाँ जैघान्या डाले। 29 डाकुम नधेँल झाःद ड़ास सिऊसिन्के। डा ड़ायुँ य़ालो स़ोनो ड़ायुँ नाज़्याव ड़ालिजूया। है जैद जे ड़ाल्योक जेहुकिन जेस० होलाँ तान्या ले। 30 डाकुम ब सजालो लिजूया, ड़ागुर ब बोमो लिजूया,” है यादोक्यो।

## 12

येसु न्नासिन्या छचामकिन घेप्पा ज़

(मर्कूस २:२३-२८; लूका ६:१-५)

1हो बेलाक तछा न्नासिन्या छचाम येसु उसिसरास ँँः खालाव घ्याँ

याबाजूयाक उसिसर याकरेए बाला फ्याद याकैजूयाव।<sup>2</sup> फरिसीराए निताव रँद येसुलाई, “चिऊके, नसिसराए नासिन्या छचाम मादान्या येन ज़ दोज़्यार,” है यादोक ते,<sup>3</sup> येसुए, “धर्मसास्त्रलाव सर्सिउ दाऊद राजा ओनैरास याकरेकाव यादोव येन जेमाप्ररिए रो? <sup>4</sup> दाऊद ध्यान झिमल पसिद परमेस्वरलाई चरैःसिउ भरेस हाइद ओनैरास भाःद ज़्युकेर। नो भरेस पुजारीराए वाज़ ज़यान्या ओताजूयाव, दाऊद ओनैरास ज़यान्या ओमाताजूयाव। <sup>5</sup> काता मोसाए ओकानुन जेमाप्ररिए रो? नासिन्या छचाम ध्यान झिमल पुजारीराए येन दाद कानुनलाई बलेःज़्यार। कानुननी फरी नोराए याखत ते माले। <sup>6</sup> डा फरी जेलाई साचो है डादाचिजूया, ध्यान झिमकिन घेप्पा तोबो आक लिजूया। <sup>7</sup> जे धर्मसास्त्रलाव सर्सिउ ‘पाथा पल्द चरैःज़्यावरास माःक, यादया ल्योरास डायुं होलाँ ताजूया’ परमेस्वरए है ओल्यो पाँर जेथरैधुव ताकिन जे ब जेदया ल्योर तान्या जेल्यो। <sup>8</sup> डा मिँ मिन्सिद हुव नासिन्या छचामकिन ब घेप्पा ज़ डालिजूया,” है यादोक्यो।

येसुए उकुइ थँवलाई ओसगराँव

(मर्कूस ३:१-६; लूका ६:६-११)

थ्येसु ननी पुलुसूद नोराए याधर्मसास्त्र झिमल बाके। <sup>10</sup> नल उकुइ थँव मिँ तोबो उलिजूयाव। नल लिजूयावराए येसुए ओपाहा झाःद्यान्याए जूनी येसुलाई, “नासिन्या छचाम ओजोरो हुवलाई सगराँन्या ओताजूयाव सैं ओमाताजूयाव?” है यादोक ते,<sup>11</sup> येसुए, “जे सुवाराए तोबो जेबेधा नासिन्या छचाम भल्खादाल ओतेकिन होल ज़ जेमनैजूयाखेहो, जेहाइजूयाखेहो सानी। <sup>12</sup> बेधाराकिन मिँर घेप्पाल गनिसिउर लिजूयार। है जैद नासिन्या छचाम कानुनलाव सर्सिउ मिताव मिँए जूनी चाव दाव परिके,” है दाद, <sup>13</sup> नो उकुइ

थँवलाई, “नकुइ तङ्गैके,” है दोक्यो। नोए उकुइ ओतङ्गैव प्राइँना तँनिकाव उकुइ स्यासो सोजोकाव ज़ ताके। 14 नो फरिसीराए निताव रँ:द लाँ:दा पुलुसुद, ‘आवलाई कै जैद सै:न्या ओताव?’ लिद गुमुस्ता दोनाकेर।

येसु परमेस्वरनी छाँतिसिउ ज़

15येसुए नो सै:व यापैँज्याव सैद ननी हाइसिद छुतड बाके। ओलस बावर ब बनै माहोल्या ज़ यालिज्याव। नलाव याजोरो हुव भरिलाई ब यासगराँक्यो। 16 फरी नोरालाई, “आव जेक्याँताव डादोव येन सुलाई ज़ है तारादोच्यो,” है यादोक्यो। 17 ननी ज़ यसैया अगमबक्ताए ओसरो ब यो:के। नोए ओसरो आव ज़, 18“आव छाँतिद डानैज्याव डायुँलाव डानोकोरलाई चिरुचिके। नोलाई रँ:द डायुँ होलाँ ताज्या।

नोए ओक्याँत ज़ डापुरुस डानैरिज्या,  
नोए प्राइँ जातलाव मिँरालाई सतलाव पाँ सथैन्या ले।

19नो सुस ज़ इंसिन्या माले,  
बजार जीदा ब स्याप स्याप ख्यान्या माले।  
20बुरू कान्ल ज़ मागनिसिउरालाई यार्युँ के:द्यान्या माले,  
यार्युँ स्यासे तेवरालाई ब यार्युँ होलाँ जैद्यान्या ले।  
सतलाव ओयेन ओमासङ्गै:वा पै नो येन दाव ज़ नैन्या ले।

21है जैद प्राइँ जातलाव मिँराए होए ओक्याँत ज़ आस दान्या लेर।”

येसुलाई सैताननिकाव याजैव

(मर्कूस ३:२०-३०; लूका ११:१४-२३; १२:१०)

22हा: बेलाक ज़ माचाव पुरुसए क्यो:द ओनैज्याव तोबो मिँलाई येसुए ल्योक रैकेर। नो मिँ उमी मारै:व लाता उलिज्याव। येसुए नोलाई ओसगराँवत उमी ब रै:के, पाँधुन्या ब ताके। 23 नो येन रँ:द माहोल्यार अचम्ब ताद, “आव ज़ सा, दाऊदए ओथोलाव

‘हुरिजूया’ है यालिजूयाव ख्रीस?” है यालिजूयाव। <sup>24</sup> फरिसीराए थैद, “आव ते झन माचाव पुरूसराए याघेपपा बालजिबुलए उमिननी माचाव पुरूसर पलेजूयाव ची,” है यारादोकेर।

<sup>25</sup>येसुए नोराए यायुंलाव पाँ सैंद, “तोबो राज्यालाव मिँर या या यामाखैकिन राज्याए उमिन ज़ माज़्या। हो मिताव ज़ तोबो सहरलावर तादी ब तोबो झिमलावर तादी ब या या यामाखैकिन चितराँ पुतराँ तान्या लेर। <sup>26</sup> है जैद सैतानए ओराजूयालावर ब या या माखैद तोबोए तोबोलाई ओपलेकिन होए ओराजूया कातानी उरहिरिजूयाव? <sup>27</sup> डा बालजिबुलए उमिननी माचाव पुरूसर डारापलेजूयाव ताकिन जेसकावराए कातानी यारापलेजूयाव? है जैद नो जेपाँ जेसकावराए ज़ जेडैत फुलुपुघान्या लेर। <sup>28</sup> खाली डा परमेस्वरए उपुरूसनी डारापलेजूयाव ताकिन परमेस्वरए ओराजूया जेखाल ज़ हुद ले। <sup>29</sup> फरी तोबो ओसा ल्यो मिँलाई ड़ादा यामाकिवा पै उझिम पाःद ओजा-यार हाइद मालाँधुर।

<sup>30</sup> “जो ड़ास माखैए नो डाकिन तँदाडाव ज़ लिजूया। हिताव ज़ फरी जोए ड़ाल्योदा मारारैव, होए डाकिन तँदा ज़ याख्यानाजूयाव। <sup>31</sup> है जैद डा जेलाई साचो है डादाचिजूया, मिँराए जो पाप यादोदी ब, परमेस्वरए उमिन याबलेदी ब नोराए यापाप क्यालो दैसिए। खाली जोए परमेस्वरए छैव उपुरूसए उमिन बलेदिजूयाव, होए ओपाप क्यालो मादैसिए। <sup>32</sup> हो मिताव ज़ जोए डा मिँ मिन्सिद हुवए डाडैत माचाहिउ पाँर झाःद ड़ामिन बलेजूयाव, होए ओपाप क्यालो दैसिए। खाली जोए परमेस्वरए छैव उपुरूसए उमिन बलेद ओएकिन, नो पाप आव जुनील तादी ब अजम्बरी जुनील तादी ब क्यालो मादैसिए।”

गराँव सीं सोनो काना सींनी  
(लूका ६:४३-४५)

<sup>33</sup> “गराँव सीं ताकिन ओसै ब गराँव ज़ ताजूया। काना सीं ताकिन

ओसै ब काना ज़ ताज़्या। है जैद सींलाई ओसैनी ज़ सरेस्सिए।  
 34 हिताव ज़ जे घुलए ओथोर, माचाव जेयुंनी कातानी ची चाव जेपलेःधुरिज़्याव? युंल किताव लिज़्या याःनी ब हिताव ज़ हुज़्या।  
 35 चाव मिँए उयुंनी चाव वाज़ हुज़्या, माचाव मिँए उयुंनी माचाव वाज़ हुज़्या। 36 डा साचो है डादाचिज़्या, मिँराए यापाँव माचाहिउ पाँ भरी तछा परमेस्वरए ओडाक फाल्सिन्या छचाम नो भरी थरैव परिरिज़्या। 37 है जैद हो छचाम धर्मी थंरिन्या सैं पापी थंरिन्या जेसाची जेपाँ ज़ तारिज़्या।”

सरेस खिम्ज़्यावर

(मर्कूस ८:११-१२; लूका ११:२९-३२)

38 हाःत ज़ नक लिज़्याव सास्त्रीर सोनो फरिसीराए, “अ गुर्बा, गेलाई नसरेस तोबो सतैँघासिके,” है यादोक ते, 39 येसुए, “जे आव जुकलाव जेयुं माहुबो पापीराए सरेस वाज़ जेखिम्ज़्या। खाली जेदैरिज़्याव सरेस ते योना अगमबक्ताए ओक्याँत ताव सरेस वाज़ जेदैरिज़्या। 40 किताव योना नो घेप्पा डाँःए उफूल सोला सोरी ओल्यो, हिताव ज़ डा मिँ मिन्सिउ मनी नाम जील सोला सोरी डालिरिज़्या। 41 निनवे सहरलाव मिँराए योनाए ओरासथैव पाँर थैद परमेस्वरए ल्योदा यायुं फर्केकर। खाली जे ते झन जेखाल हुद लिज़्याव योनाकिन घेप्पाए ओसथैचिक ब परमेस्वरए ल्योदा जेयुं जेमाफर्केके। है जैद परमेस्वरए मिँरालाई ओराफाल्तिरिज़्याव छचाम नो डादाडाव मिँराए यायुं याफर्केवनी ज़ जेगल्ती थंरिरिज़्या। 42 हिताव ज़ नो दखिन देसलाव रानीए परमेस्वरए ओपाँ सोलोमनए ओयाःनी थैना बनै तादानी हुके। जे जेखाल हुद लिज़्याव ते सोलोमनकिन झन घेप्पा लिज़्या। है जैद परमेस्वरए ओराफाल्तिरिज़्याव छचाम आव बेलाकाव मिँराए

यागलती नो रानीए ओक्याँनी ज़ थ०रिरिज़्या।”

ओल्द हुज़्याव माचाव पुरूस

(लूका ११:२४-२६)

43“मिँनी पलेःसिउ माचाव पुरूस नो मिँए ओक्याँनी उपुलुसोत री माल्यो साइँसुइँवक नासिन्या पो खिम्नाज़्याव। लिन्या पो ओमादैकिन, 44 फरी ओल्द डादाडाव उपुलुसोए ओक्याँत ज़ पसिउ पैज़्याव। नल ओबाक स्यासी जैद थिक थाक जैसिउ खाली पो रँःद, 45 ओलकिन माचाव पुरूसर सात गोता ओलस रैद नल पसिद नो मिँलाई डादाडावकिन ज़न ज़ माचावए क्योःज़्याव। आज्यालकाव पापी मिँर ब हिताव ज़ जेतारिज़्या।”

येसुए ओआमार ओभाइर

(मर्कुस ३:३१-३५; लूका ८:१९-२१)

46येसु नो माहोल्यारास ओपाँज्याक ज़ ओआमा सोनो ओभाइर हुद लाँःक च्याँःसिद येसुलाई किउ यारापरींकेर। 47 ननी येसुए ल्योक तोबो बाद, “लाँःक नआमा सोनो नभाइर नँस दैसिना हुद लेर,” है ओदोक ते, 48 येसुए नो है दाना हुवलाई, “डाआमार डाभाइर कितावर?” है लिद, 49 उकुइ उसिसराए ल्योदा छों जैद, “चिऊके, डाआमार डाभाइर आवर ज़। 50 जोराए स्वर्गताव डाबाबुए ओपाँ थैद दोज़्यार, होर ज़ डाआमार डाभाइ बैनीर ताज़्यार,” है लिके।

## 13

धुर वासून्या घर्ती

(मर्कुस ४:१-९; लूका ८:४-८)

1हो छचाम येसु नो ज़िमनी पुलुस्द दह छचोक बाद चुसिद उलिज्याक, 2 ल्यो माल्यो मिँर ओल्योक छुइसिहुकेर। है जैद येसु दोङ्गल चुसिद दोङ्गलाई रील छचावा होकसै लाँक्यो। माहोल्या भरी ओङ्गाक दह छचोक च्याँःसिकेर। 3 येसुए नोरालाई ओपाँ घर्ती



झाःद यासथैक्यो। तोबो ओरासथैव आव ज़, “तोबो मिँ ओएँःल धुर वासना बाके दी। 4 धुर ओवास्ज़्याक ख्वा येम जीदा परिके दी। नो येमलाव परिउ बाज़ाराए ज़्युकेर दी। 5 ख्वा धुर गम छ्या छ्या ल्यो ओदादरत परिके दी। नत गम छ्या छ्या वाज़ ल्यो ओतावए हतप्त ज़ परीके दी। 6 खाली निमी ओसोराक उहुवत ओजरा नाम जील ओमाल्योए च्याकराप चिकुरूप थँके दी। 7 फरी ख्वा धुर जुर रमराए खाल परिके दी। नोलाई जुर रमराए गाल्क्यो दी। 8 फरी ख्वा धुर ते चाव गमस्याल परिके दी। नो ओसै बने झाःद ख्वात तीस, ख्वात साथी, ख्वात सय दोबोर यासै झाःकेर दी। 9 आव पाँ जोए थैन्या उयुँ लिज़्या, चावस ओथैवक।”

थैज़्यावत ब मातीधुर

(मर्कूस ४:१०-१२; लूका ८:९-१०)

10 येसुए उसिसर ओल्योक हुद, “काराव मिँरालाई घर्ती झाःद वाज़ नरासथैज़्याव?” है यादोक ते, 11 येसुए, “जेलाई वाज़ स्वर्गताव राज्यालाव कप्सिउ पाँ छर्लङ्ग सतैसिउ लिज़्या, उपुर्काविरालाई ते मोसिउ मिताव लिज़्या। 12 है जैद जोए परमेस्वरए ओपाँ रैद नैव, होए झन ज़ तीधुन्या ले। जोए परमेस्वरए ओपाँ माभैःए, होए औरैव ब ओपोःस ज़ मान्या ले। 13 होए उजूनी ज़ घर्ती झाःद डारासथैज़्याव। नोराए रँःज़्यावत ब मारँःधुर, थैज़्यावत ब मातीधुर। 14 नितावराए जूनी ड़ादा ज़ यसैयाए धर्मसास्रल अइ लिद सर्द नैद यायो,

‘थैन्या ते जेथैज़्या, जेमातीधुइ।

रँःन्या ते जेरँःज़्या, जेमासरेस्धुइ।

15 आवराए यायुँ काता ज़ मातीधुन्या भुत्यासो ताद ले।

यार्ना ब सूइसिउ मिताव ताद ले।

यामी ब चिम जैद यानैज़्याव मिताव लिज़्या।

निताव यामाताव ताकिन आः झरी यामीए रँःधुखेरहो,

यार्नाए थैधुखेरहो,  
यार्युंल तीधुखेरहो।

डाल्योदा यार्युं ते फकैधुखेरहो।

सोजोकावर ब डाराजैधुखेहो।’

16जे ते परमेस्वर दाइनो तावर जेलिजूया, जेमीए ब जेरें:धुजूया, जेर्नाए ब जेथैधुजूया। 17 जेलाई साचो है डादाचिजूया, अगमबक्त्तार, घेपपा धर्मी मिँराए ब आव जे जेरें:व पाँर रँ:न्याए जूनी यार्युं थू जैद ब रँ:व मादैकेर, थैन्या युँ दाद ब थैव मादैकेर।”

धुर वास्सिउ घर्तीए ओअर्थ

(मर्कूस ४:१३-२०; लूका ८:११-१५)

18“है जैद जे नो धुर वास्सिउ घर्तीए ओअर्थ थैचिके। 19 जोए परमेस्वरए ओराजूयालाव पाँ थैद ओमाबुझिधुकिन, सैतान ओल्योक हुद उर्युंलाव वास्सिउ पाँ भरी स्याप सिप जैद लाँदिजूयाव। नो ज़ नो येमलाव परिउ धुर। 20 फरी नो ओदादरताव परिउ आव ज़, जोए परमेस्वरए ओपाँ थैद बेहार ज़ तीद खुसी ब ताजूया। 21 खाली नो मिँ परमेस्वरए ओपाँत उर्युंल ओजरा माल्यो मिताव ओतावए नो पाँ छचावा पै वाज़ रहिजूया। नो पाँनी नोए ओक्याँत खिरीर उपसिकिन दुखर ओदैकिन नो पाँत उर्युं क्य़ाजूया। 22 फरी नो ज़ुर रमराए खालाँव परिउ धुर आव ज़, जोए परमेस्वरए ओपाँ ते थैजूयाव, खाली धन सम्पतीदा उर्युं थू जैद ‘आव डाजिउत कै तान्या ओताव’ लिद व्रीनी फुइ ब लिजूया। है जैद नितावराए परमेस्वरए ओपाँलाई यागालोए नो पाँ ओसै माझा:जूयाव ताजूया। 23 फरी नो चाव गमस्याल परिउ धुर आव ज़, जो मिँए परमेस्वरए ओपाँ थैद चावस उतीकिन नो मिँ परमेस्वरए ओराजूयाल ख्वात तीस, ख्वात साथी, ख्वात सय दोबोर ओसै झा:जूयाव धुर स्यासो ज़ ताजूया।”

ताम खार्ल खु वास्सिउ घर्ती

24नकिन येसुए फरी तोबो घर्ती झाःद अइ लिद यासथैक्यो, “स्वर्गताव राज्या किताव उलिज्याव लिक् ते, तोबो मिँए ओएँःल बनै चाव धुर ओवासो मिताव लिज्या। 25 नो ओवासोत तछा रील ओल स्याँद उलिज्याक उसुतुर हुद ओएँःलाव ओवासो धुर खार्ल खु वास्द ख्यानैदिक्यो दी। 26 छीनी नो धुर परीद ओबालार ओझाःवत नल खुर ब रैंःकेर दी। 27 नो एँःए ओर्गेए ओयेन दाज्यावर याघरपतीए ल्योक हुद, ‘आव नएँःल ते चाव धुर वाज्ज नवासूज्याव सानी, आव खुर कातानी याहुव ओताव?’ है यादोक ते, 28 नो याघरपतीए, ‘काताकाव डासुतुर हुद खु ओवासो ताखेहो,’ है यादोक्यो दी। ओयेन दाज्यावराए फरी, ‘कै नलिज्या? नो खुर गेराखुल्कैना रो?’ है यादोक ते, 29 ‘खुल्कैन्या माःक, नोलाई जेखुल्कैक कसाराक तामर ब जेराखुल्कैया। 30 क्याःन्या बेला ओमातावा पै निताव ज़ घलिज्याक, सिप सिप ज़ घमीःरक। यामीःवत क्याःना बाज्यावरलाई डादा खु भरी खुल्कैव परींद पोला पोला जैद मेंःल मुव डारापरीरिज्या। ताम भरिलाई ते सिम्द दहरा बुमल झाःव डारापरीरिज्या,’ है यादोक्यो दी।”

बाजीए उधुर सोनो भरेस सोगोइन्या वासः

(मर्कूस ४:३०-३४; लूका १३:१८-२१)

31नकिन येसुए फरी तोबो घर्तीनी अइ लिद यासथैक्यो, “स्वर्गताव राज्या तोबो मिँए बाजीए उधुर बारील ओझाःव मिताव लिज्या। 32 नो धुर प्राइरानी तकेज़ा ओतादी ब, परीद ओघ्योःवत नो बारीलाव डैराकिन प्राइरानी घेप्पा ताद नोए ओखारत नमताव भुर्ज्याव बाज़ार सिपर जैद बासिज्यार।\*

33“हिताव ज़ फरी स्वर्गताव राज्या भरेस सोगोइन्या वासः

\* 13:32 13:32 मर्क ४:३०-३२ चिऊन्या।

स्यासो ब लिज्या। सों:सेमे मुछिसिउ कनेल तोचोप झा:दी ब पाई सरालिज्याव।”

34 येसुए माहोल्यारालाई ओपाँ ओरासथैक घर्ती ओमाझा:वा पै ओमारासथैज्याव। 35 ननी ज अगमबक्ताए धर्मसास्त्रलाव ओसरो यो:के। नोए ओसरो आव ज़, “डापाँ भरी घर्तीर झा:द डारासथैरिज्या।

नाम नम ओतावकिनकाव कप्सिउ पाँर ब सतैद्यान्या डाले।”

ताम खाल्वाव खुए ओअर्थ

36 नकिन येसुए नो माहोल्यारालाई ख्यानैद झिमल बाके। उसिसर ओल्योक हुद, “गुर्बा, नो आछ्याकाव नझा:व एँ:लाव खुए ओअर्थ गेलाई पलासद्याव ताके,” है यादोक ते, 37 येसुए, “नो चाव धुर वासना बाज्याव मिँ मिन्सिउ ख्रीस ज़। 38 एँ: आव मानुवा ज़। नो चाव धुर परमेस्वरए ओराज्यालाव मिँर ज़। नो खु फरी, सैतानए उमीर ज़। 39 नो खु वासज्याव उसुतुर ओल सैतान ज़। नो क्या:न्या बेला आव जुक खेमन्या बेला ज़। नो क्या:ना बाज्यावर परमेस्वरए ओचाकर्यार ज़। 40 किताव नो एँ:ए ओगेँए खु भरी खुल्कैद में:ल मुज्याव, हिताव ज़ आव जुक ओखेमोत, 41 डा मिँ मिन्सिद हुवए स्वर्गताव डाचाकर्यारालाई डारापरीरिज्या। नोराए बले:ज्यावर, अधर्म दाज्यावरालाई दुप्द परमेस्वरए ओराज्यानी पले:द, 42 में:ए मुल्काल याराख्यारिज्यार। नल याहार डर डर कैद चिल्नी बिर्ल घर्न्या लेर। 43 धर्मी भरी ते परमेस्वर याबाबुए ओराज्याल निमी मिताव झार झारोर तारिज्यार। आव पाँ जोए थैन्या उयुँ लिज्या, चावस ओथैवक।”

एँ:ल गादैसिउ गदान्त

44 “फरी, स्वर्गताव राज्या तोबो एँ:ल गादैसिउ गदान्त मिताव ब लिज्या। नोलाई तोबो मिँए ओदैकिन नो एँ:ए ओए: ओमासुदुमा

पै पाखात मापलेद नल ज्ञ नैजूयाव। नो बनै रेंए रेंए उझिमदा बाद ओलसकाव लिजूयाव भरी योद नो गदान्त ल्यो एँ:लाई लँ:जूयाव।”

असली हिरामुती

45“फरी, स्वर्गताव राज्या तोबो बेपारीए असली हिरामुती उखिमजूयाव मिताव लिजूया। 46 नोए बनै ओए: ल्यो ओदैकिन ओलसकाव लिजूयाव भरी योद तादी ब लँ:जूयाव।”

जाल रै:सिन्या घर्ती

47“फरी, स्वर्गताव राज्या तोबो जाल रै:सिजूयावए दहल जाल ओख्याव मिताव लिजूया। नो ओजाल ओसेल्क चाव माचाव डाँ: भरी स्याप सिप जैद यारैजूयाव। 48 नो जाल दहनी ओहाइवत चुसिद चाव भरी ओजाल झा:द माचाव भरी याख्याजूयाव। 49 आव जुक खेमन्या बेला ब हिताव ज्ञ तारिजूया। परमेस्वरए ओचाकर्यार हुद धर्मीराए खालाव लिजूयाव पापीरालाई सेल्द, 50 में:ए मुल्काल याराख्यारिजूयार। नल याहार डर डर कैद चिर्लनी बिर्ल घर्न्या लेर।”

51नकिन येसुए उसिसरालाई, “आव डापाँव भरी जेमातीया?” है ओरादोक ते, “गेतीके,” है दोकेर। 52 येसुए फरी, “चाव ताके। धर्मसास्त्रलाव पाँ सैजूयाव सास्त्री स्वर्गताव राज्यालाव पाँर ब उसिऊसिकिन तोबो बनै धनी मिँ स्यासो ताजूया। नोए उझिमनी बनै याए: ल्योर, सा:रोर पुराँदोर पुलुसन्त्या लेर।”

येसुलाई ओमान नैद यामायो

(मर्कूस ६:१-६; लूका ४:१६-३०)

53येसुए आव घर्तीलाव ओपाँ भरी तुपैद ननी पुलुस्द, 54 ओल ओनाखारल बाद नलाव धर्मसास्त्र झिमल ब परमेस्वरए ओपाँ यासथैक्यो। नलावर येसुए ओपाँ थैद अचम्ब ताद, “आवए इताव ग्यानर, अचम्बलाव सक्तीर कातानी ओरैव? 55 काता, आव नो

सीं तुजूयाव ओजा माःक रो? आवए ओआमा ब गेसकाव लिजूयाव मरियम ज्ञ सानी। ओभाइर ब याकूब, योसेफ, सिमोन, यहूदार ज्ञ सानी। 56 ओबैनीर ब गेस ज्ञ लिजूयार सानी। नितावए इताव पाँर कातानी ओरैव ओताव?” है लिद, 57 जाँ सोव माँःती जैकेर। येसुए नो यापाँ सैद, “अगमबक्तालाई ओल ओनाखारलावर सोनो ओक्याँदाडावराए वाज्ज ओमान नैद माएर, उपुर्कावराए ते नैदिजूयार,” है यादोक्त्यो। 58 नोर येसुलाई यार्युँ ओमाहुबोए नल अचम्बलाव ओयेनर कोसै मादोक्त्यो।

## 14

रील सछैँजूयाव यूहन्ना उसिउ

(मर्कूस ६:१४-२९; लूका ९:७-९)

1हाः बेलाक राजा हेरोदए येसुए अचम्बलाव ओयेनर थैद, 2ओयेन दाजूयावरालाई, “आव ते रील सछैँजूयाव यूहन्ना ची जन्द उहुव सा। है जैद ज्ञ ताखेहो नाः सक्तीलाव येनर ओदोजूयाव,” है यादोक्त्यो।

3नो हेरोदए डादा ओभाइ फिलिपए ओजूया हेरोदियासए ओपाँनी यूहन्नालाई क्योःद किद इयालखानाल झाःद ओनैजूयाव। 4 नो यूहन्नाए डादा नो राजालाई, “नँ नभाइए ओजूयालाई रैन्या माताए,” है ओदोवए, 5 राजाए नोलाई सैःन्या युँ दाद ओनैजूयाव। खाली जनता भरिए ‘यूहन्ना अगमबक्ता ज्ञ लिजूया’ लिद याथरैवए हेरोदए नोलाई सैःन्या जाँ ओछेजूयाव।

6तछा राजा हेरोद उजर्मिउ मानिन्या छचाम उहुवत हेरोदियासए मेंमा ओजा नो भतयार ज्युना हुवराए याड़ाक बाद स्याद याएक्त्यो। राजा हेरोद बनै खुसी ताद, 7 नो लुज्जालाई, “नँ जो नपैँजूया, हो ज्ञ डायौँ” लिद किर्या झाःक्त्यो। 8 नो लुजाए फरी, ओआमाए ओपैव मिताव ज्ञ, “डालाई रील सछैँजूयाव यूहन्नाए ओडै चम्द ताथील झाःद

आक ज़ रैद्याँके,” है ओदोक ते, 9 राजाए उयुँर स्यासे सतेक्यो। खाली ओपाहुनाराए ड़ाकाव ओझाःव किर्या ओमाख्याधुवए, 10 इयालखानाल लिज़्याव यूहन्नाए ओडै च़मो यापरीक्यो। 11 नोर बाद यूहन्नाए ओडै च़मूद ताथील झाःद नो लुज़ालाई एकेर। नो लुज़ाए फरी ओआमालाई लाँदिक्यो। 12 छींनी यूहन्नाए उसिसराए ओमोरोलाई च़िहुद लाँद यागादैवत येसुलाई है दोनाकेर।

येसुए पाँच हजारलाई भरेस ओरायो

(मर्कूस ६:३०-४४; लूका ९:१०-१७; यूहन्ना ६:१-१४)

13 येसुए नो पाँ थैद दोङ्गाल पसिद तोबो साइँसुइँव पोक ओबातड बाके। नो माहोल्यार ओबाज़्याव सैद सहररानी पुलुसूद याखँनी ज़ दह छचो छचो ओल्योदा ज़ बाकेर। 14 येसु दोङ्गातिन उझरिउ प्राइँना मिँर बनै माहोल्या रँःद उयुँ नाद याजोरो हुवरालाई यासगराँक्यो। 15 जाँ रिमदा रिमदा उसिसर ओल्योके हुद, “गे इताव साइँसुइँवक गेलिज़्या, नम ब नुप्नाके। आव माहोल्यारालाई नाखार जीदा यापरीके, ज़्यावर लँःद घज़्युरक,” है यादोक ते, 16 येसुए, “आवर आनी यामाबादी ब ताए। जे ज़ ज़्यावर याव ताके,” है ओरादोक ते, 17 उसिसराए “गेस भरेस पाँच गोता, डाँः नेब्लो वाज़ लिज़्या,” है यादोक ते, 18 येसुए “जेस लिज़्याव भरेस सोनो डाँः डालाई रैद्याँचिके,” है दाद, 19 नो माहोल्यारालाई बाँल चुसिउ परीद नो पाँच गोता भरेस नेब्लो डाँः उकुइत रैद स्वर्गदा भाल्सिद, असिक निद भरेसर केःद उसिसरालाई नो माहोल्यारालाई भाःद्याव यापरीक्यो। 20 नोर प्राइँए याफू तसी ज़्युकेर। नो यासयेलोर यादुपूक बाहू झुनु ताके। 21 नो भरेस ज़्युज़्यावर, मेंमार सोनो लुज़ार माझाःद, खेपार वाज़ पाँच हजारा याल्यो।

येसु री तर्त तर्त ओबाव

(मर्कूस ६:४५-५२; यूहन्ना ६:१६-२१)

22 हाःत ज़ येसुए उसिसरालाई दोङ्गाल पसिउ परींद दह होफत ओलकिन डादा ज़ यापरींक्यो। ओल येसुए ते नो माहोल्यारालाई याझिमदा याझिमदा ओरापरींजूयाव। 23 नोरालाई ओरापरींधुव छींनी ओल तोबो दाँदात बाद पोखारिनाक्यो। नो बेलाक नम इयानाद उलिजूयाव, नो दाँदात ओबातड ज़ उलिजूयाव। 24 फरी उसिसर यालिजूयाव दोङ्गा दहल कुधु होड ज़ केसूद उलिजूयाव। नो बेलाक ज़ बतास उसिसराए ल्योदा बनै चोइस हुद रीए ओछल्काए नो दोङ्गालाई आदानी होदा ओजैजूयाव। 25 हाःत ज़ रीलाव तीन बजेवाक येसु री तर्त तर्त याल्योदा ज़ बाके। 26 उसिसराए री तर्त तर्त उहुजूयाव रँःद, “आव ते इया ची सा!” है लिद याछचाचेए बनै किकेर।

27 हाःत ज़ येसुए, “ताछेच्यो, जेयुँ होलाँ जैचिके, डा ची,” है ओरादोव प्राइँना, 28 पत्रुसए, “प्रभु, साचो नँ ज़ ताकिन, डालाई ब री तर्त तर्त नल्योदा हुव याँके,” है दोक्यो। 29 येसुए, “ताए, हुनके,” है ओदोव प्राइँना पत्रुस दोङ्गातिन झरिद री तर्त तर्त येसुए ल्योदा ओबाजूयाक, 30 रीए ओछल्का उहुजूयाव रँःद छेःद रील गदिउ ओपैजूयाक, “दे प्रभु, डालाई जोगोइनाके,” है ओदोव प्राइँना, 31 येसुए नोलाई उकुइनी क्योःद, “नँ किताव मिँ नल्यो, नयुँ माथंरिद आःपै डालाई नयुँ ओमाहुपजूयाव,” है दोक्यो। 32 नोनी दोङ्गाल निपसिउ प्राइँना ज़ बतास ब थकनिके। 33 नो दोङ्गाल लिजूयावराए फरी, “नँ साचो ज़ परमेस्वरए ओजा नल्यो,” लिद उखँत फुलुपसिकेर।

येसुए याजोरो हुवरालाई ओरासगराँव

(मर्कुस ६:५३-५६)

34 दह होफताव गनेसरेत यादोजूयाव पोड याकेसोत, 35 नलाव लिजूयाव मिँराए येसुलाई सरेसूद नजीदाडाव याजोरो हुव भरिरालाई दुपूद ओल्योक यारारैकेर। 36 नोराए, “नक्वाए उतुपा वाज़ छापो गेदैक,” है दाद छापो भरी ओपोःस ज़ गराँकेर।



## 15

यहूदीराए यापुर्खारानी हुव चलन  
(मर्कूस ७:१-१३)

1तच्छा यरूसलेम सहरनी फरिसीर सोनो सास्त्रीर येसुए ल्योक हुद,  
2 “नसिसराए काराव गेसाखा पुर्खारानी हुव चलन यामादोज्ञयाव?  
आवराए याकुइ माचोखोइद ज्ञ ज्ञयुज्ञयार,” है यादोक ते,  
3 येसुए नोरालाई, “जे ते झन जेसाखा पुर्खारए याचलननी  
परमेस्वरए ओकानुनलाई जेबले-ज्ञया। 4 परमेस्वरए, ‘बाबु आमाए  
ओमान नैद्याव ज्ञ परिए,’ सोनो, ‘जोए ओबाबु ओआमाए उमिन  
बले-दिज्ञयाव, होलाई सै:व ज्ञ परिए’ है लिज्ञया। 5 जे ते झन,  
‘जोए ओबाबु ओआमानिलाई, ‘जिन डानिकाव दैव परिन्या भरी  
परमेस्वरए उमिनत ची नैद डानै,’ है उलिकिन, 6 नो मिँलाई  
ओबाबु ओआमानी निभार मालागिए,’ है जेलिज्ञया। है जैद जे  
निताव जेयेननी ज्ञ जेचलनलाई सघ्यो:द परमेस्वरए ओपाँलाई  
अनाकलाव जेजैज्ञया। 7 जे मिताव कैफतीराए जूनी यसैयाए ड़ादा  
ज्ञ थिक सर्द नैद्याचिउ। नोए ओसरो आव ज्ञ,  
8 ‘आवराए याया:ए वाज्र डामान नैद्याँज्ञयार।  
यायुँ ते डाकिन तादाड लिज्ञया।  
9 मिँराए याससैव चलनलाई सघ्यो:द,  
अनाकल ज्ञ डासेवा दोज्ञयार,’ ”  
है यादोक्यो।

मिँलाई बले-न्या पाँर

(मर्कूस ७:१४-२३)

10नकिन येसुए नक लिज्ञयाव माहोल्यारालाई ओल्योदा खुल्द,  
“आव डापाँ चावस थरैच्यो, 11 पाखानी या:ल पसिज्ञयावए मिँलाई  
माछैव माजैव। मिँलाई माछैव जैज्ञयाव ते या:नी पुलुसज्ञयावए ची,”

है लिद यासथैक्यो। <sup>12</sup> उसिसराए नो ओपाँ थैद येसुलाई, “प्रभु, आव नपाँए फरिसीराए यायुँ कोला कोला जैद नरायो नमासैए रो?” है यादोक ते, <sup>13</sup> येसुए, “स्वर्गताव डाबाबुए ओमारारूपिउ भरी तछा भोस्त्रिज्यार। <sup>14</sup> हैज्र घताज्यारक, नोर तोबो उमी मारैःवए उमी मारैःवलाई दोरैद ओलाँज्याव मितावर लिज्यार। नितावनी दोरैसिद निबाक नेब्लो ज़ भल्खादाल तेन्या लिनी,” है यादोक्यो।

<sup>15</sup> हाःत ज़ पत्रुसए फरी, “डादाडाव नपाँए ओअर्थ गेलाई पलासघाव ताके,” है ओदोक ते, <sup>16</sup> येसुए, “जे कित्ताव मिँर जेल्यो, आःपै डापाँ जेमातीधुज्याव। <sup>17</sup> जो ज्याव ज्युदी ब नो ज्याव अइज्र फूल पसिद छीनी पुलुसूद बाज्या लिन्या जेमासैए रो? <sup>18</sup> मिँलाई बलेःज्याव ते युँल सिजैद याःनी पुलुसूज्याव पाँए ची। <sup>19</sup> युँलाव माचाहिउ पाँर आवर ज़ — माचाव चेतैन्या, मिँ सैःन्या, अर्काए ओज्याए ल्योदा बान्या, पातर्या पातर्नी जैसिन्या, कुन्या, धुत गोहाई यान्या, अर्काए उमिन बलेःघान्या, <sup>20</sup> आवर ज़ मिँलाई बलेःन्या पाँर। निताव कुइ माचोखोइद ज्ञयान्याए काता ज़ माबलेःव।”

छुत जातलाव कनानी मेंमा

(मर्कूस ७:२४-३०)

<sup>21</sup> येसु ननी पुलुसूद तुरोस सीदोन जीदा बाके। <sup>22</sup> नलाव तोबो कनानी मेंमा येसुए ल्योक हुद, “अ प्रभु, दाऊदए ओथोलाव येसु, डाल्योदा नयुँ ओनाक। मेंमा डाज़ालाई माचाव पुरुसए क्योःद बनै हत्या याद नैव,” है लिद उक्किक, <sup>23</sup> येसुए घाइ ज़ मादोक्यो। उसिसराए फरी, “आव मेंमा बनै इयाउँ इयाउँ लिज्या, हतपूत ज़ पलेके,” है यादोक ते, <sup>24</sup> येसुए नो मेंमालाई, “डा इस्राएली जातलाव म्नाव डोइव बेधा स्यासोराए जूनी वाज़ डाहुव ची,” है ओदोक ते, <sup>25</sup> नो मेंमाए येसुए उखँत फुलुपसिद, “जेरो डाप्रभु, डाल्योदा नयुँ ओनाक,” है दोक्यो। <sup>26</sup> येसुए फरी, “लुज़ाराए याज्युज्याव ज्याव नैद काःरालाई\* यान्या

\* 15:26 15:26 मर्क ७:२७ चिऊन्या।

माताए,” है ओदोक ते, <sup>27</sup> नो मेंमाए, “हैज़ प्रभु, हैदी ब यागैराए तेबलतिन यासतेव ज्ञयाव काःराए मनी ज्ञयाव दैर सानी,” है ओदोक ते, <sup>28</sup> येसुए, “अ माँ, नँ बनै नयुँ हुबो मेंमा नल्यो। है नल्यो भरी योःन्या ले,” है ओदोव प्राइँना होड ओज़ा ओगराँधुव ओल्यो।

### येसुए कुधुलाई ओरासगराँव

<sup>29</sup> येसु ननी पुलुसुद गालील दहलाव घ्याँ बाद तोबो दाँदात पुलुसुद चुसिके। <sup>30</sup> नत चुसिद उलिज्ञयाक नजीलाव माहोल्याराए काना दूँदार, लुला लडरार, लाता भैरार, याजोरो हुवरालाई ब येसुए ल्योक रैद ओझाक यारानैकेर। येसुए नो भरिलाई ओपोःस ज्ञ यासगराँक्यो। <sup>31</sup> नो माहोल्याराए निताव मापाँधुन्यार पाँधुन्या याताव, यामी मारैःवर रँःधुन्या याताव, माबाधुन्यार बाधुन्या याताव रँःद नोर बनै अचम्ब ताद इस्राएलीराए यापरमेस्वरलाई बनै घ्योःव ज्ञ थरैद उमिन ब सघ्योःदिकेर।

### येसुए चार हजारलाई भरेस ओरायो

#### (मर्कुस ८:१-१०)

<sup>32</sup> नकिन येसुए उसिसरालाई ओल्योदा खुल्द, “आव माहोल्यार रँःद डायुँ नाज्ञया। आवर ड़ास याल्यो आछिम सौंला ताकेर। याज्ञयाव भरी ब खेम्के। आवरालाई करे ज्ञ परींन्या ड़ायुँए माभैःए, अइज़ परींकिन येमत याकरेए माधुन्या लेर,” है ओरादोक ते, <sup>33</sup> उसिसराए, “इताव साइँसुइँवक आःकाव माहोल्यारालाई गे कातानी ज्ञयावर रैद सव्रान्या की?” है यादोक ते, <sup>34</sup> येसुए, “जेस भरेस खागोता उलिज्ञयाव?” है ओरादोक ते, “भरेस सात गोता, ड़ाँःजुर्र नेबरेंवा लिज्ञयार,” है दोकेर। <sup>35</sup> नकिन येसुए नो माहोल्यारालाई नामक चुसिउ परींद, <sup>36</sup> नो सात गोता भरेस सोनो ड़ाँःजुर्र उकुइत रैद धन्याबाद चरैःद नो भरेसलाई केःद उसिसरालाई नो माहोल्यारालाई भाःद्याव ओरापरींक ते, भाःद

याराएकेर। <sup>37</sup> नोर प्राइँए याफू तसी जूयाद यासयेलो यादुपूक सात झुर्नु ताके। <sup>38</sup> नो जूयुजूयावर, मेंमार सोनो लुज़ार माझाःद, खेपा भरी वाज़ चार हजारा याल्यो। <sup>39</sup> नकिन नो माहोल्यारालाई याझिमदा याझिमदा परींद येसु दोङ्गाल पसिद मगादान खन्द जीदा बाके।

## 16

फरिसीराए स्वर्गताव सरेस याखिमो

(मर्कूस ८:११-१३; लूका १२:५४-५६)

<sup>1</sup>नल फरिसीर सोनो सदुकीराए येसुलाई जाँचिन्याए जूनी ओल्योक हुद, “गोलाई स्वर्गताव नसरेस तोबो सतैद्याव ताके,” है यादोक ते, <sup>2</sup> येसुए, “जे रिमदा नम घाव जेरैःकिन ‘पराःती बेलन्या ले’ है लिन्या जेसैजूया। <sup>3</sup> छकालन्या नम घाव जेरैःकिन ‘आछिम नम वान्या ले’ लिन्या ब जेसैजूया। है जैद जे निताव नमताव सरेसर थरैधुजूयावराए कै जैद बेलान ओसरेसर ताकितर जेमाथरैधुजूयाव? <sup>4</sup> आव जुकलाव यायुँ माहुबो पापीराए सरेस वाज़ खिमजूयार। खाली यादैरिज़्याव सरेस ते योनाए ओक्याँत ताव सरेस वाज़ दैरिज़्यार,” है दाद याख्यानैक्यो।

फरिसीर सोनो सदुकीराए यापाँनी जोगोइसिन्या

(मर्कूस ८:१४-२१)

<sup>5</sup>नकिन येसु उसिसरास दह होफत याबाक उसिसराए यास भरेस लाँन्या यामेःव ओल्यो। <sup>6</sup> नक याकेसोत येसुए उसिसरालाई, “जे फरिसीर सोनो सदुकीराए भरेसल याझाःजूयाव वासःनी जोगोइसिद लिच्यो,” है ओरादोक ते, <sup>7</sup> नोराए या याल, “भरेस रैन्या गेमेःवए नै ओदासिजूयाव ताक्या,” है यालिजूयाव। <sup>8</sup> येसुए थैद, “ए जेयुँ माहुबोर, काराव जे डापाँलाई झन भरेस तंदा जेथरैनाजूयाव? <sup>9</sup> आःपै जेमातीधुइ रो? पाँच गोता भरेसए पाँच हजारए याफू तसी जूयादकाव यासयेलो कुधु झुर्नु ओताव माःक रो? काता घरी जेमेःधुव। <sup>10</sup> सोनो सात गोता भरेसए चार हजार मिँए याफू

तसी ज़्यादकाव यासयेलो कुधु झुर्नु ओताव माःक रो? <sup>11</sup> कै जैद जेमाबुद्धिधुज्याव? डा ते भरेसए जूनी डापाँव माःक। फरिसीर सोनो सदुकीराए जूनी डापाँव ची,” है ओरादोक ते, <sup>12</sup> बल्ल, “भरेसए जूनी ते माःक ची ओल्यो, फरिसीर सोनो सदुकीराए यापाँनी जोगोइसिद लिच्यो है ओदासिउ ची ओल्यो,” है लिकेर।

पत्रुसए येसुलाई ख्रीस लिन्या ओथरैव

(मर्कूस ८:२७-३०; लूका ९:१८-२१)

<sup>13</sup>नकिन येसु कैसरिया फिलिप्पी खन्द जीदा ओबावत उसिसरालाई, “डा मिं मिन्सिद हुवलाई मिंराए सु है दाँज्यार?” है ओरादोक ते, <sup>14</sup> उसिसराए, “ख्वाराए रील सछैँज्याव यूहनना है दीँज्यार, ख्वाराए एलिया है दीँज्यार, ख्वाराए फरी यर्मिया ताक्या, सैं काताकाव अगमबक्ता ताक्या है दीँज्यार,” है यादोक ते, <sup>15</sup> येसुए, “जे डालाई सु है जेदाँज्या नी?” है ओरादोक ते, <sup>16</sup> सिमोन पत्रुसए, “नँ जीदो परमेस्वरए ओजा ख्रीस ज़,” है दोक्यो। <sup>17</sup> येसुए नो थैद पत्रुसलाई, “धन्याकाव, योनाए ओजा सिमोन पत्रुस, नल्योदा परमेस्वर दाइनो ताव। आव पाँ मिँए बुद्धिनी नथरैव माःक, स्वर्गताव डाबाबुनी नथरैव ची। <sup>18</sup> है जैद डा नमिन पत्रुस\* जैद डाईँज्या। नो पहर तर्त ज़ डामन्दली डाजैरिज्या, सोनो नर्गलाव सक्तीराए नोलाई पलतैधुन्या मालेर। <sup>19</sup> स्वर्गताव राज्यालाव साँचार ब नँलाई डाईँरिज्या। है जैद नँ आव मानुवात जो नथरैज्या, स्वर्गत ब हो ज़ थरिन्या ले। फरी, आव मानुवात जो येन मादान्या नथरैज्या, स्वर्गत मनी हिताव ज़ थरिन्या ले,” है दोक्यो। <sup>20</sup> नकिन उसिस भरिरालाई, “डा ख्रीस ज़ लिद सुलाई ज़ है तारादोच्यो,” है यादोक्यो।

\* 16:18 16:18 पत्रुसए ओअर्थ – पहर। 16:18 16:18 १ कोर ३:११; १०:४; एफि २:२०; १ पत्र २:६-८; दर्सन २१:१४

येसु उसिन्याए जूनी डादा ज्ञ ओपाँव  
(मर्कूस ८:३१-९:१; लूका ९:२२-२७)

21 हो बेलाकिन ज्ञ येसुए यरूसलेमल ओक्याँत हरिज्याव दुखर उसिसरालाई है यादोनाक्यो। “डा यरूसलेमल डाकेसोत गेदेसलाव सेरर, मुख्या पुजारीर सोनो सास्त्रीराए ल्योनी बनै धो सहिउ दुखर डादैरिज्या। नोराए यासैःनाव सोलात सिउनी सैसिद डसोरिज्या,” लिद उसिसरालाई है ओरादोक ते, 22 पत्रुसए येसुलाई तँदा लाँद सिडार्द, “प्रभु, परमेस्वरए निताव ताव तायोक्, नक्याँत निताव खर्क ज्ञ ताताक,” है ओदोक ते, 23 येसु पत्रुसए ल्योदा भाल्सिद, “ए सैतान, डाडाकिन पुलुसुनिके। नँ ते डालाई परमेस्वरए ओयेनत डायुँकेःद्यान्या ची नपैके। नँ नयुँ परमेस्वरए ल्योदा माझाःद मिँराए याझाःज्यावदा ची नझाःके,” है दोक्यो।

24 उसिस भरिरालाई येसुए, “जोए डस हुन्या युँ दोज्याव, होए उजिउए मया मादाद कुसत सिन्या मिताव दुखर सहिद डाछीत उहुक। 25 जोए आव उजिउत ओललाई तान्या वाज् खिमज्याव, होए उजुनीलाई समैज्याव। फरी जोए आव उजिउत उजिउए मया मादाद डा डाजूनी दोज्याव, होए जुनी दैरिज्याव। 26 जोए आव मानुवात लिज्याव भरी दुपुद उजुनीलाई ओसमैकिन नोलाई काता फाइदा ची तायादा? नोए उजुनीए ओपोल काता यान्या? 27 डा मिँ मिन्सिउ तछा स्वर्गताव डाबाबुए ओज्गै मगैरास ओचाकर्यारास आव मानुवात फरी तखेप हुद मिँराए यादोव यायेनए ओजेला डाराएरिज्या। 28 डा जेलाई साचो है डादाचिज्या, आकाव च्याँसिद लिज्यावराणी जे ख्वा ख्वाराए डा मिँ मिन्सिउलाई डाराज्यास डाहुज्याव जेमारँःवा पै सिन्या जेमाले,” है लिद यासथैक्यो।

## 17

येसुए ओज़गै ओसरैःव

(मर्कूस ९:२-८; लूका ९:२८-३६)

<sup>1</sup>नकिन छ दिनत येसुए पत्रुस, याकूब सोनो होए ओभाइ यूहन्नारालाई याबातड तोबो झैःव गोंत ओलस यालाँक्यो। <sup>2</sup>नक याकेसोत येसुए ओक्यार त्तोसिद, ओडाःर ब निमी स्यासो झार झारो ताके, ओक्वार ब तक तकौ मी झीःन्या ताके। <sup>3</sup>नाःत ज़ मोसा सोनो एलियानी नक ज़ सरैःसिद येसुस पाँकिनी। <sup>4</sup>नो रँःद पत्रुसए येसुलाई, “अ प्रभु, गे आक लिन्या बनै चाव लिज्या। नयुँ ओताकिन, डा जेलाई सोम्लो पाल तङ्गैद डयाच्यो, तोबो नँलाई, तोबो मोसालाई, तोबो एलियालाई,” है लिद, <sup>5</sup>ओपाँज्याक ज़ तोबो बनै धोइ धोइव बादल हुद नोरालाई याकपूक्यो। नो बादल जीनी तोबो गा अइ लिद थासूके, “आव डायुँलाव डाज़ा ज़, आवलाई रँःद डायुँ होलाँ ताज्या। जे आवए ओपाँ थैच्यो,” <sup>6</sup>है उलिज्याव नो सोम्लोए थैद नोर याछ्याचेए फुलुपसिकेर। <sup>7</sup>हाःत ज़ येसु हुद नोरालाई छाप्द, “सोचिके, ताछेच्यो,” है ओरादोवत, <sup>8</sup>आदा होदा याभाल्सिक येसुलाई वाज़ रँःकेर।

ख्रीसकिन डादा एलिया

(मर्कूस ९:९-१३)

<sup>9</sup>नो गोतिन याझरिज्याक येसुए नोरालाई “आव जेरँःव भरी डा मिँ मिन्सिउ सिद डामासैसिवा पै सुलाई ज़ है तारादोच्यो,” है ओरादोक ते, <sup>10</sup>नो सोम्लोए, “सास्त्रीराए काराव ख्रीसकिन डादा एलिया हुन्या ले है यालिज्याव?” है यादोक ते, <sup>11</sup>येसुए, “हैज, एलिया डादा ज़ हुद प्राइँलाई ताव परिन्या मिताव जैन्या ले। <sup>12</sup>खाली डा जेलाई आव मनी है डादाचिज्या, एलिया ते डादा ज़ हुधुके। आलाव मिँराए

झन नोलाई मासरेसुद यामन लागिउ ज़ जैकेर। हिताव ज़ डा मिँ मिन्सिउलाई मनी दुखर याद सैःनारिज़्यार,” है यादोक्यो। <sup>13</sup> हाःत ज़ नो स्मोम्लोए एलियाए ओयेन रील सछैँजूयाव यूहन्नाए ओक्याँत ची ओताव ओल्यो लिन्या थरैकेर।

माचाव पुरुसए ओक्योःव छोर्या

(मर्कूस ९:१४-२९; लूका ९:३७-४३)

<sup>14</sup>येसु नो स्मोम्लोरास नो गोतिन झरिद माहोल्याराए ल्योक याबाक ननी तोबो हुद येसुए उखँत फुलुप्सिद, <sup>15</sup> “अ प्रभु, डाज़ालाई नयुँ ओनाक, नोलाई पुलन्या बेथाए क्योःद बनै दुख याद नैव। कैताक मेंःल ब परिज़्या, कैताक रील ब परिज़्या। <sup>16</sup> नोलाई नसिसराए ल्योक डारैक सगराँद मायाँधुकेर,” है ओदोक ते, <sup>17</sup> येसुए, “ए जेयुँ माहुबोर, परमेस्वरस माखैवर, डा जेस खा ची डालिरिज़्याव, खा डासहिचिके!” है दाद नो छोर्याए ओबाबुलाई, “नज़ालाई आदा रैके,” है दाद, <sup>18</sup> नो माचाव पुरुसलाई ओहप्लैव प्राइँना ओक्याँतिन पुलुसुद बाके। नो छोर्या ब हो प्राइँना ज़ गरॉके।

<sup>19</sup>नकिन जाँ छचावाक उसिसराए येसुलाई सुए ज़ यामासैँद, “गे कै जैद नो माचाव पुरुसलाई गेमापलेःधुव?” है यादोक ते, <sup>20</sup> येसुए, “परमेस्वरए ओल्योदा जेयुँ ओमाहुबोए ज़ जेमापलेःधुव। डा जेलाई साचो है डादाचिज़्या, परमेस्वरए ओल्योदा बाजीए ओसै हावालित तादी ब जेयुँ जेसुहुपकिनी तोबो हाँलाई ‘भोस्निके’ है जेदोकिन भोस्न्या ज़ ले। है जैद जे मादाधुन्या काता ज़ माले। <sup>21</sup> [हैदी ब इताव पुरुसलाई पलेःन्या ते उपासिद मापोँखारिवा पै मापलेःसिधुइ।”]

येसु उसिन्याए जूँनी फरी ओपाँव

(मर्कूस ९:३०-३२; लूका ९:४३-४५)

<sup>22</sup>छीँनी तछा येसु उसिसरास गालीलल यादुप्सिक उसिसरालाई, “डा मिँ मिन्सिउलाई तछा मिँराए याकुइत सँपिनारिज़्यार।



23 नोराए डालाई सैःनारिज्यार। हैदी ब सोंलात परमेस्वरए सोचोइनारिज्याव,” है यादोक्यो। नो थैद उसिसराए यायुँ माचाव जैकेर।

### ध्यान झिमलाव सिर्मा

24 छींनी कफर्नहुमल याबावत ध्यान झिमलाव सिर्मा स्योःज्यावर हुद पत्रुसलाई, “जेगुर्बाए ध्यान झिमलाव सिर्मा ओफोःज्याव सै ओमाफोःज्याव?” है यादोक ते, 25 “फोःज्याव ज़,” है दाद पत्रुस झिमल उपसिउत येसुए, “अ सिमोन, नँ कै नलिज्या? आव मानुवाताव राजाराए सिर्मा सोनो दोरो सुरालाई याराहाइज्याव? याझिमलावरालाई सै छुतडावरालाई?” है ओदोक ते, 26 सिमोनए, “छुतडावरालाई,” है दोक्यो। येसुए, “हो ताकिन ते गे नो झिमलावराए ते माफोःव परिन्या। 27 हैदी ब नोरालाई सभैःन्याए जूंनी बलछी लाँद दहल रैःसिनान्केदा, प्राइरानी उसंक्ताव नहाइव डाँःए ओयाः नफैक गिन फोःन्या चाँदीए सिक्का नोए ओयाःल दैन्या नले। हो ज़ लाँद गिनजूंनी फोःनायो।”

## 18

### घेप्पा जैसिन्या पाँ

(मर्कूस ९:३३-३७; लूका ९:४६-४८)

1 हो बेलाक ज़ येसुए उसिसर ओल्योक हुद, “स्वर्गताव राज्याल प्राइरानी घेप्पा सु गेलिज्याव?” है यादोक ते, 2 येसुए तोबो जिम्ज़ा लुज़ालाई रैद याड़ाक सच्यौद, 3 “जेलाई साचो है डादाचिज्या, जे जेर्युँ तोद लुज़ा मिताव जेमातावा पै स्वर्गताव राज्याल पसिउ दैन्या जेमाले। 4 जो आव लुज़ा मिताव मासघ्योःसिद सजिम्सिज्या, हो ज़ स्वर्गताव राज्याल घेप्पा ताज्या। 5 फरी जोए डामिनत आव मिताव जिम्ज़ारालाई यासुम्ज्याव, होए डालाई ब सुम्नाज्याव। 6 फरी जोए आव मिताव डालाई यायुँ हुबो

ज़िम्ज़ारालाई पापल ओरापारैकिन, नितावलाई ते बुरू ओधेल राँथै सुर्द्याद समुन्द्रल ख्यान्या पाथ लिज़्या। 7 पापल पारैज़्याव पाँराए जूनी आव मानुवालाई थैए माँतकन ज़ लिज़्या। निताव पाँर ते जुनी ब हुन्या ज़ लेर, खाली निताव पाँर पलेज़्यावलाई थैए माँतकन ज़ लिज़्या।”

मिँलाई बलेज़्याव खँ कुइ

(मर्कूस ९:४२-४८)

8“नखँए तादी ब नकुइए तादी ब माचावल ओपारैनिकिन चमद ख्याके। नो नखँ नकुइए माजिपत्तिन्या में:ल ख्याव ओदोज़्याव देखा बुरू अजम्बरी जुनील थूँद्यासो पसिन्या पाथ लिज़्या। 9 हो मिताव ज़ नमीए माचावल ओपारैनिकिन, नो नमीलाई कोलाद ख्याके। नो नमीए नर्गलाव में:ल ख्याव ओदोज़्याव देखा बुरू परमेस्वरए ओराज्याल काना ताद पसिन्या पाथ लिज़्या। 10 है जैद जे आव मिताव ज़िम्ज़ारालाई सुए ज़ तारासोच्यो। नोरालाई समारिज़्याव परमेस्वरए ओचाकर्यार एकतार ज़ स्वर्गताव परमेस्वर डाबाबुए ओडाक ज़ लिज़्यार,” है यादोक्त्यो।

डोइव बेधाए ओघर्ती

(लूका १५:३-७)

11[“है जैद डा मिँ मिन्सिद हुवए माव डोइवरालाई सापद परमेस्वरए ल्योदा लाँन्याए जूनी डाहुव ज़।] 12 जे कै जेलिज़्या? तोबोए ओबेधार तसय यालिकिन ननी तोबो फातिद ओडोइकिन नो उनान्सयरालाई बनल ज़ ख्यानैद नो डोइवलाई खिमनाज़्याखेहो सानी। 13 डा साचो है डादाचिज़्या, नोलाई ओदैकिन नो माडोइव उनान्सयरकिन नो तोबोए ल्योदा इन उयुँ होलाँ ताद रेंज़्या। 14 हो मिताव ज़ स्वर्गताव जेबाबुए ब इताव ज़िम्ज़ा तादी ब ‘तँदा बाद ताडोइक’ लिद उयुँ थू जैज़्याव।”

मादान्या दाज़्याव नै

15“तोबो ननैए मादान्या ओदोज्याव नरँ:किन डादा नोलाई अलगजा ओखत सतैदियो। नोए नपाँ थैद ओभै:किन नोलाई नबाँचैव मिताव ज़ ताके। 16 फरी नोए नपाँ थैव ओमाभै:किन छुतर ब तोबो नेब्लो बाद सम्जैव ताके। धर्मसास्त्रल ब नोए उजूनी इताव सर्सिउ लिजूया, ‘छुतए ओडैताव पाँ नेब्लो सोम्लोए यासाची ओखैकिन नो पाँ ज़ थंरिउ ताजूया।’ 17 नोए नोराए यापाँ ब ओमाभै:किन नोलाई परमेस्वरए उमिनताव भरिराए डाक ज़ है दाव ताके। नोराए यापाँ ब ओमाभै:किन नो मिँलाई परमेस्वरकिन तँदाडावरासकाव सोनो सिर्मा स्योःज्यावरासकाव गनिउ ताके। 18 है जैद डा जेलाई साचो है डादाचिजूया, जे आव मानुवात जो जेथरैजूया, स्वर्गत ब हो ज़ थंरिन्या ले। फरी, आव मानुवात जो येन मादान्या जेथरैजूया, स्वर्गत मनी हिताव ज़ थंरिन्या ले। 19 फरी डा जेलाई है डादाचिजूया, आव मानुवात नेब्लोए वाज़ तयुँ जैद काताराए जूनी जेपोंखारिकिन, नो जेपाँ स्वर्गताव डाबाबुए सयोःघान्या ले। 20 है जैद जोक तादी ब डामिनत नेब्लोकिन यादा जेदुप्सिकिन डा ब जेस ज़ डातारिजूया।”

ओनैलाई उयुँ मानाजूयाव

21नकिन पत्रुस येसुए ल्योक बाद, “प्रभु, तोबोए डाउपत मादान्या ओदोकिन, नोलाई डा खापाला रासन्या, सात पाला सैं खापाला?” है ओदोक ते, 22 येसुए, “डा नँलाई सात पाला वाज़ है डामादीं। नोकिन इन सत्तरी दोबोर सात पाला रासो ताके है डादींजूया।

23“है जैद स्वर्गताव राज्या तोबो राजाए ओनोकोररास हिसाप ओसखैजूयाव मिताव लिजूया। 24 नो राजाए निताव हिसाप ओसखैजूयाक तोबोए ओलाँव दस हजार सुनए सिक्कालाव तुम्सुक पुलुस्के दी। नोए उरिन ओमाफोःधुवए राजाए ओयेन दाजूयावराए ओललाई ज़ राजाए ल्योक रैकेर दी। 25 राजाए

नोरालाई, 'आवलाई ओज्या ओज़ारास सोनो ओलसकाव लिज्याव भरी योःद तादी ब जुनी ब सयोःद रैचिके,' है यादोःक्यो दी। 26 नो नोकोरए आव थैद राजाए उखँत फुलुप्सिद, 'जेरो प्रभु, डालाई नयुँ ओनाक, छ्यावा पै कीनाके। तछा जुनी ब डाफोःया ज़,' है ओदोःक ते, 27 नो राजाए उयुँ नाद उतुम्सुक चीद्याद अइज़ रास्क्यो दी। 28 नो नोकोर ते झन ननी पुलुस्द बाद, ओलस येन दाज्याव तोबो ओनैए ल्योक तसय चाँदीए सिक्का ओकाछ थॉनाक्यो दी। नोलाई ओधेनी क्योःद, 'डाकाछ नमाफोःरिज्या?' है ओदोःक ते, 29 नो ओनै उखँत फुलुप्सिद, 'जेरो डानै, डालाई नयुँ ओनाक। छ्यावा पै कीनाके, तछा प्राइँ ज़ डायॉ,' है ओदोःक ते, 30 माभैःद, 'हुकी नमासयोःवा पै इयालखानाल ल्यो ताके' लिद इयालखानाल झाःक्यो दी।

31 "ओनैलाई नै ओजैव राजाए ओयेन दाज्यावराए रँःद यायुँ बनै नाद राजाए ल्योक पैनाकेर दी। 32 नो पाँ थैद राजाए नो ओरासो नोकोरलाई खुलद, 'ए हरामी, नँ डास बिन्ती नदोक नडैताव रिन भरी ख्याद डाईके। 33 डा किताव नँलाई डायुँ नाद डारास्निउ, नँ कै जैद नो नँस येन दोज्याव ननैलाई नयुँ नाद नमारासो?' है दाद, 34 नो राजा रसिद ओरासो रिन भरी फरी ब सुघुर्द प्राइँ ओमाफोःवा पै इयालखानालाव हाकिमए उकुइत सँपिक्यो दी। 35 है जैद डा जेलाई साचो है डादाचिज्या, हो मिताव ज़ स्वर्गताव डाबाबुए मनी जे जेउपर्त मादानया दोज्यावलाई जेयुँल नैद जेमारास्किन जेलाई मनी हिताव ज़ जैचिरिज्याव।"

## 19

1 येसुए आव पाँर ओरासथैवत गालीलनी पुलुस्द यर्दन भै होफताव यहूदिया खन्दल बाके। 2 नल ब मिँर बनै माहोल्या ओल्योक याहुज्याव। नो हुवरानी याजोरो हुवरालाई यासगराँक्यो।

## ज्यालाई मारासून्या

(मर्कूस १०:२-१२)

३ फरिसीराए येसुलाई जाँचिन्याए जूनी ओल्योक हुद, “जुनी तादी ब ज्यालाई रासो दैसिए सैं मादैसिए?” है यादोक ते, ४ येसुए, “भाःड स्त्रिस्तील परमेस्वरए मिँ ओजैक खेपा सोनो मेंमानी निजैक्यो लिन्या प्ररिद जेमाले? ५ है जैद ज खेपाए ओबाबु ओआमालाई रास्द ओज्यास सिप ताद, नोनी तक्याँ ज ताज्यानी। ६ हाःकिन नोनी नेब्लो माःक, तक्याँल गनिसिज्यानी। है जैद जोनिलाई परमेस्वरए जोरैद निनैव, होनिलाई मिँराए ताराभाःरक,” है ओरादोक ते, ७ नोराए फरी, “हिताव ताकिन कै जैद मोसाए ओकानुनल रासून्या कागत तोबो सर्किन रासो दैसिए लिन्या सर्सिउ उलिज्याव?” है यादोक ते, ८ येसुए, “जेदिउदी ल्योर जेतावए ज मोसाए निताव कानुन ओरायो, मानी डादाकिन ते हिताव ओमाल्यो। ९ है जैद डा जेलाई है डादाचिज्या, जोए ओज्या ओरेए ओसतत उलिज्यावत ब नो ओज्यालाई रास्द छुतलाई ओरैकिन नोए जारी येन ज दोक्यो। [फरी जोए नो रास्सिउ मेंमालाई रैज्याव, होए मनी जारी येन ज दोक्यो,] है यादोक्यो।

१० हाःत ज उसिसराए, “निताव ज्यालाई रास्क पाप गेदोव उथोरिकिन बुरू ज्या मादान्या पाथ लिज्या,” है यादोक ते, ११ येसुए, “बिनु ज्या, बिनु रे प्राइँ ते मालिधुर। परमेस्वरए जोलाई बिनु ज्या, बिनु रे लिधुन्या जैद नैव हो वाज लिधुइ। १२ ख्वार जर्मननी ज सिडारू ताज्यार, ख्वार फरी मिँराए सिडारू याराजैवए ज्या मादोर, ख्वार फरी या याखुसीनी ज स्वर्गताव राज्यालाव येन दान्याए जूनी ज्या मादोर। खाली निताव येन ते जोए सहिधुज्याव, होए वाज ओदोवक।”

येसुए ल्योक हुज्याव लुज़ार

(मर्कूस १०:१३-१६; लूका १८:१५-१७)

13नकिन नलाव मिंराए ज़िम्ज़ा याज़ारालाई 'येसुए उकुइ नैद असिक घरायोक' लिद ओल्योक यारारैकेर। नो रैज़्यावरालाई उसिसराए सिडार्द यारारैकेर। 14 येसुए निताव रँ:द उसिसरालाई, "नो ज़िम्ज़ा लुज़ारालाई तारावैच्यो, डाल्योदा हुव याराएचिके। स्वर्गताव राज्या नितावराए जूनी ज़ लिज़्या," है दाद, 15 नो लुज़ाराए याक्याँत उकुइ नैद असिक याद येसु ननी पुलुसुद बाके।

अजम्बरी जुनी खिम्ज़्याव धनी

(मर्कूस १०:१७-३१; लूका १८:१८-३०)

16 येसुए ल्योक तोबो धापाज़ाकाव मिँ हुद, "अ गुर्बा, डा अजम्बरी जुनी दैन्याए जूनी चाव येन किताव दान्या?" है ओदोक ते, 17 येसुए, "डालाई काराव 'किताव चाव उलिज़्याव' है नदाँज़्याव? चाव तोबोका तोबो परमेस्वर वाज़ लिज़्या। नँ अजम्बरी जुनील बान्या यूँ नदोकिन नो धर्मसास्त्रलाव सर्सिउ दान्या मादान्या येन दाव ताके," है ओदोक ते, 18 "प्रभु, नो भरिनी डा काताकाव दान्या?" है ओदोक ते, येसुए, "मिँ मासै:न्या, अर्काए ओज्याए ल्योदा माबान्या, माकुन्या, धुत गोहाई मायान्या, 19 बाबु आमाए ओमान नैद्यान्या, सोनो नक्याँलाई किताव नसमारिज़्या, छुतलाई ब हिताव ज़ समारिन्या," है दोक्यो। 20 नोए नो पाँर थैद, "आव भरी ते दाव ज़ डानैज़्या, फरी मायो:व काताकाव उलिज़्याव?" है ओदोक ते, 21 येसुए "नँ साचो सयो:न्या ताकिन नँस लिज़्याव भरी यो:द काता ज़ माल्योरालाई भा:द याएकेदा, नँ स्वर्गताव धन दैन्या नले। नो येन भरी दाद नँ डाछीँत हुन्के," है ओदोक ते, 22 नो धापाज़ाकावए नो पाँ थैद उयूर स्यासे सतेद ओल्द बाके। नोए ओधन सम्पती

बनै कुधु ज़ ओल्योए मारासुधुक्र्यो।

23नो ओबावत येसुए उसिसरालाई, “डा जेलाई साचो है डादाचिज़्या, धनी मिँ स्वर्गताव राज्याल पसिन्या बनै धो ताज़्या। 24 फरी ब डा जेलाई है डादाचिज़्या, गपए उकुँल ऊँत उछिरिज़्यावकिन धनी मिँ परमेस्वरए ओराज्याल पसिन्या इन धो ताज़्या,” है यादोक्र्यो। 25 उसिसर आव पाँत अचम्ब ताद, “इताव ताकिन ते सुए ची अजम्बरी जुनी ओदैधुरिज़्याव?” है यादोक ते, 26 येसुए, “मिँर यानी सु ज़ माबाँचिधुर, खाली परमेस्वरनी मातान्या काता ज़ माले,” है यादोक्र्यो।

27हाःत ज़ पत्रुसए, “गे ते प्राईँ ज़ ख्यानैद नछींत हुद गेले, गे काता दैन्या?” है ओदोक ते, 28 येसुए, “डा जेलाई साचो है डादाचिज़्या, आव जुक तोसिद प्राईँ साःरो ओतावत डा मिँ मिन्सिउ बनै ज़गै मगैव डाराज्या डाचलैहुवत जे डाछींत हुद लिज़्यावराए बाह थर इस्राएलीराए याडैतावर ताद यायेन फालघान्या जेले। 29 आव बेलाक जोए डाजूनी ओएँःर उझिंमर, ओदाज्यु भाइर, ओनाना बैनीर, ओबाबु ओआमार, ओज़ार रासुद याख्यानैज़्याव, होए आव उजिउत ज़ सय दोबोर ब दैन्या ले, अजम्बरी जुनी ब दैन्या ले। 30 खाली ख्वा ख्वा डातावर छींत तारिज़्यार, छींतावर डात तारिज़्यार।”\*

## 20

### एँःल येन दाज़्यावर

1“है जैद स्वर्गताव राज्या तोबो एँःए ओर्गे स्यासो लिज़्या। नो मिँ छकालन्त्या घग ज़ ओएँःल येन दान्या मिँर याखिमनाज़्याव। 2 नोरास तला भरिकाव जेला यान्या कबल दाद ओयेन दाना यापरींक्र्यो दी। 3 नौ बजेवाक फरी नो एँःए ओर्गे बजार जीदा

\* 19:30 19:30 छुत बुझिन्या – ख्वा ख्वा यामिन थासोर ज़िम्जा थंरिन्या लेर, ज़िम्जार घ्योःव थंरिन्या लेर।

ओबाक यायेन माल्पोरालाई रँ:द, <sup>4</sup>नोरालाई, 'जे अइज्ज जेलिज्याव देखा डाँ:ल येन दोनाचिके, जेजेला डायार्च्या,' है ओरादोक ते, नोर बाद येन दोनाकेर दी। <sup>5</sup> नो ँ:ए ओर्गे फरी बाह् बजेवाक तखेप, तीन बजेवाक तखेप फरी ब बाहोर्यार जैद यापरीक्यो दी। <sup>6</sup> पाँच बजेवाक फरी ब नो ँ:ए ओर्गेए तोबोक अइज्ज च्याँ:सिद लिज्यावरालाई रँ:द, 'जे काराव बिनु येन च्याँ:सिद जेलिज्याव?' है ओरादोक ते, <sup>7</sup>नोराए, 'गेलाई सुए ज़ येन मायासिर,' है यादोक ते, नोरालाई मनी ओयेन दाना यापरीक्यो दी।

<sup>8</sup>"नम ओइयानाक नो ँ:ए ओर्गेए नो येन दोज्यावराए याडैतावलाई खुल्द, 'नो डाय़ेन दाज्यावरालाई दुप्द याजेला भा:द याएके, प्राइरानी छीनी हुवरालाई प्राइरानी ड़ात याएयो,' है ओदोक ते, नोए नो येन दाज्यावरालाई खुल्द, <sup>9</sup>पाँच बजे हुवरालाई ड़ात याएक्यो। नोराए तछाकाव याजेला दैकेर दी। <sup>10</sup> नो छकाल्न्या हुवराए निताव रँ:द 'नोराकिन गे ते कुधु ज़ गेदैया,' है यालिज्याव। खाली छीनी ते या ब हा:ज़ दैकेर दी। <sup>11</sup> नै ओतावए नोर ँ:ए ओर्गेए ल्योक बाद, <sup>12</sup> 'नो प्राइरानी छीनी हुवर तघन्ता वाज़ येन दोकेर, नोर कै जैद गे तला भरी घाम सोता सोता ताद दावरास सम सम नजैसिउ?' लिद गन गन दोकेर दी। <sup>13</sup> है जैद नो ँ:ए ओर्गेए तोबोलाई, 'डानै, नँस छकाल्न्या ज़ तला भरिकाव जेलाल गिन्कबलिसिउ मा:क रो? डा नउपर्त मादान्या डामादोए। <sup>14</sup> नजेला तीद बानिके। आव छीनी हुवरालाई मनी नँसकाव जुँ ज़ याव डापैज्या। <sup>15</sup> पैसा डामीं ज़, डापैसा जोलाई यान्या डायुँ लिज्या, होलाई यान्या ओमाताज्याव रो? डायुँ ओगराँव काराव नमी उतूज्याव?' है दोक्यो दी।

<sup>16</sup>"हो मिताव ज़ ख्वा ख्वा छींतावर ड़ात तारिज्यार, ड़ातावर छींत तारिज्यार।"



येसु उसिन्याए जूनी फरी ओपाँव

(मर्कूस १०:३२-३४; लूका १८:३१-३४)

17नकिन येसु यरूसलेमदा ओबाजूयाक बाह्व जना उसिसरालाई याबातड खुल्द, 18 “गे यरूसलेमदा गेपुलुसनाजूया। नल गेकेसोत डा मिं मिन्सिउलाई मुख्या पुजारीर सोनो सासूत्रीराए याकुइत सँपिन्या ज़ लेर। नोराए डालाई सैःन्या ज़ थरैद, 19 रोमी सरकारए उकुइत याझाःनावत नोराए फरी उल्ली गिल्ली दाद, रीःद, क्रुसत तङ्गैद सैःनारिजूयार। हैदी ब सोलात सिउनी सैसिद सोन्या डाले,” है यादोक्यो।

याकूब सोनो यूहन्नानी निआमाए ओपाँ

(मर्कूस १०:३५-४५)

20नकिन जब्दियाए ओज़ानी याकूब सोनो यूहन्नानी निआमास येसुए ल्योक हुद, निआमाए धो दाद, “जेरो प्रभु,” है ओदोक ते, 21 येसुए, “काता दाघान्या नपैज्याव?” है ओदोक ते, नो मेंमाए, “नराजूयाल आव डाज़ानिलाई तोबोलाई नवोर्दा, तोबोलाई नदाब्र्यादा चुसिन्या निजैयो,” है ओदोक ते, 22 येसुए, “नँ नज़ारास आव जेनिज्यावए जूनी जेमासैए। डा जाँवाक धो सहिउ दुखर डासहिरिजूयाव नोनी मासहिधुरिजूयानी?” है ओरादोक ते, नोनी, “गिन्सहिधुया ज़,” है दोकिनी। 23 हाःत ज़ येसुए, “हैज़, डा डादैरिजूयाव धो सहिउ दुखर जिन मनी दैन्या ज़ जिन्ले, खाली डावोर्दा डादाब्र्यादा चुसिउ यान्या ते डा डाकुइत माले। निताव दैन्या स्वर्गताव डाबाबुए जोलाई एज्याव, होए उजूनी वाज़ लिजूया,” है निदोक्यो। 24 उपुर्काव दस जना उसिसराए नो पाँ थैद नोनिलाई रँःद यारिस चोके।

25नाःत ज़ येसुए उसिस भरिरालाई ओल्योदा खुल्द, “जे ज़ जेसैजूयाखेहो, आव मानुवाताव याघेपपार याधूँलावराए डैत बनै अखत्यासोर ताद हाप हाप ख्याजूयार। 26 जे जेल ते निताव

जैसिन्या माताए। है जैद जेनी जो सेर जैसिउ जेपैजूया, हो प्राईए यासेवा दान्या ओजैसिक। <sup>27</sup> सोनो जेनी जो घेप्पा जैसिउ जेपैजूया, हो प्राईए याबाँदा ओजैसिक। <sup>28</sup> डा मिँ मिनसिउ ब 'डासेवा घदोरक' लिद डाहुव माःक, कुधुलाई बाँचैन्याए जूनी डाजिउ झाःद यासेवा डादोहुव ची," है यादोक्त्यो।

येसुए निमी मारैःवनिलाई रँःधुन्या उनिजैव

(मर्कूस १०:४६-५२; लूका १८:३५-४३)

<sup>29</sup>येसु उसिसरास यरीहो सहरनी पुलुसूद याबाजूयाक मिँर ब बनै माहोल्या यास ज़ याबाजूयाव। <sup>30</sup> येमक नेब्लो निमी मारैःवनी चुसिद निलिजूयाव। नोनी 'येसु आलाव घ्याँ हुजूया दी' लिन्या थैद, बनै चोइस, "अ दाऊदए ओथोलाव प्रभु, गिनलाई नयुँ ओनाक," है लिद निक्रिजूयाक, <sup>31</sup> नो माहोल्याराए 'इयाउँ तालिचिन' लिद यारासिडाकैर। नोनी ज़न ज़ चोइस क्रिद, "अ दाऊदए ओथोलाव प्रभु, गिनलाई नयुँ ओनाक," है निलिक ते, <sup>32</sup> येसु नक च्याँःसिद नो निमी मारैःवनिलाई ओल्योक खुल्द, "डा जिनजूनी काता दाद्यान्या?" है उनिदोक ते, <sup>33</sup> "प्रभु, गिन रँःधुन्या गिन्ताक," है निदोक ते, <sup>34</sup> येसुए उयुँ नाद निमीत छाप्द उनियो प्राईना ज़ रँःधुन्या ताद उछींत बाकिनी।

## 21

येसुलाई परमेस्वरए उमिनताव राजा याजैव

(मर्कूस ११:१-११; लूका १९:२८-४०; यूहनना १२:१२-१९)

<sup>1</sup>येसु उसिसरास यरूसलेम छचोकाव जैतून दाँदाकिन जाँ होकसैकाव बेथफागे नाखार याकेस्नावत येसुए नेब्लो उसिसनिलाई, <sup>2</sup> "जिन आव गेड़ाकाव नाखारल बाचिन्केदा, नल तोबोक गधाहानी ज़ा-मा सुर्सिउनी दैन्या जिन्ले। नोनिलाई पलाःद यारारैचिन्के। <sup>3</sup> सुवाराए, 'काराव पलाःद जिनरालाँजूयाव?' है यादाचिन्किन, 'गिनप्रभुलाई चाहिजूया,' है जिनरादोकिन नोराए

हतपत् ज़ परींघान्या लेर,” है लिद निपरींक्यो। 4 नो पाँ भरी अगमबक्ताए ओसरो पाँ सयोःन्याए जूनी ताके। नो सर्सिउ आव ज़, 5“सियोनए ओज़ालाई\* है दोक्यो,

‘चिऊके, नराजा काता ज़ माल्यो मिताव जैसिद,  
गधाहाए ओज़ा बछेरालाई चेपूद जेल्योक हुजूया।’ ”

6है जैद नो नेब्लो उसिसनी येसुए है अनिदोव मिताव ज़ नाखारल बाद, 7 नो गधाहानिलाई दैद येसुए ल्योक रैद उसिसराए तोबो गधाहाए ओतर्त याक्वार झाःद्याद येसुलाई चेपो परींकेर। 8 नकाव लिजूयाव माहोल्याराए याक्वार येमल तैदिकेर। ख्वाराए फरी नजीलाव स्यावलार रैद येमल तैद्याद, 9 नो माहोल्यार ख्वा येसुए ओड़त ख्वा उछीत जैसिद अइ लिद क्रिए क्रिए बाकेर,  
“होसन्ना! दाऊदए ओथोलाव येसुलाई दाइनो दाइनो ओताक।

परमेस्वरए उमिनत हुव राजा धन्याकाव ओताक,  
स्वर्गताव परमेस्वरए उमिन बनै ओघ्योःक।”

10नोर यरूसलेमल याकेसोत नो सहरलाव मिंराए ‘आव सु ओताव?’ लिद काला मुलु ताकेर। 11 ओलस हुजूयाव माहोल्याराए, “आव गालीललाव नासरतनी हुव अगमबक्ता येसु ज़,” है यारादोकेर।

येसुए बेपारीरालाई ध्यान झिमनी ओरापलेःव

(मर्कूस ११:१५-१९; लूका १९:४५-४८; यूहन्ना २:१३-२२)

12नकिन येसु ध्यान झिमल पसिद नलाव लैःजूयावर योःजूयावरालाई पलेःद पैसा तोजूयावराए यातेबलर पल्लैद्याद, कुइतम योःजूयावराए याकुर्चीर ब ख्याद्याद, 13 “धर्मसासत्रल परमेस्वरए ओपाँ इताव सर्सिउ लिजूया, ‘डा डालिम पोंखारिन्या झिम जैसिउ लिजूया।’ जे ते झन आवलाई चोरराए पुप मिताव जैद जेनै,” है लिद याखेपैक्यो।

14नकिन नलाव काना दूंदार ध्यान झिमल येसुए ल्योक याहुक

\* 21:5 21:5 यूह १२:१५ चिऊन्या। 21:5 21:5 जक ९:९ 21:9 21:9 भज ११८:२५-२६ 21:13 21:13 यसै ५६:७; यर ७:११

नोरालाई यासगराँक्यो। 15 येसुए निताव अचम्बलाव येनर ओदोव रँ:द, सोनो ध्यान झिमलाव लुजाराए 'होसन्ना! दाऊदए ओथोलाव येसुलाई दाइनो दाइनो ओताक' लिद याक्रिजूयाव थैद नलाव मुख्या पुजारीर सोनो सास्त्रीर यारिस चोद, 16 येसुलाई, "आवराए याक्रिजूयाव नँ ज़ नथैजूयाखेहो, काराव चिम दाव नमारापरीजूयाव?" है यादोक ते, येसुए, "हैज़, डा थैव ज़ डालिजूया। धर्मसास्त्रलाव सर्सिउ,

'अ प्रभु, नँ नमिन सघ्यो:न्या लुज़ार सोनो नुई ओजूयाव भाउज़ाराए याया:नी ज़ जैद ननै' लिन्या जेमापरिए रो?" है दाद, 17 नोरालाई ख्यानैद सहरनी पुलुस्द बेथानिया नाखारल बासिनाके।

ओसै माल्यो नेभारा सीं

(मर्कूस ११:१२-१४, २०-२४)

18 हो परा:ती छकाल्नुया फरी यरूसलेमदा ओल्द ओबाजूयाक ओकरेए, 19 येम छचोक ओख्यार लपलपौ तोबो नेभारा सीं रँ:द 'ओसैर ले सै' लिद उचिऊनाक ते ओसै तोबो ब मादैक्यो। ओख्यार वाज़ रँ:द नो सींलाई, "आकिनी नसै काता ज़ ताताक," है ओदोव प्राइँना ज़ नो सीं थँके। 20 निताव रँ:द उसिसर अचम्ब ताद, "आव सीं कै जैद बेहार ज़ उथँव?" है लिकेर। 21 येसुए फरी, "डा जेलाई साचो है डादाचिजूया, युँ सुहुपूद तयुँ जैकिन आव नेभारा सींलाई डाजैव मिताव वाज़ मा:क, तोबो हाँलाई 'नँ नतिन भोसद समुन्द्रल ख्यासिन्के,' है दाकिन, नो हैज़ तान्या ले। 22 है जैद जे जोत मनी जेयुँ हुपूद जेपोंखारिकिन नो दैन्या ज़ जेले।"

येसुए ओहक सोनो यूहननाए ओहक

(मर्कूस ११:२७-३३; लूका २०:१-८)

23 येसुए ध्यान झिमल ओपाँ ओरासथैजूयाक नलाव मुख्या पुजारीर

सोनो यहूदीराए यासेरर हुद येसुलाई, “आव नदोज्याव येनर नँलाई सुए है उदीव, सुए हक उईव?” है यादोक ते, <sup>24</sup> येसुए, “डा ब जेलाई तोबो है डादाचिदा, नोए ओजवाप जेयाँकिन डा ब आव येन दान्या हक सुए ओयाँव है डादाचिया,” है दाद, <sup>25</sup> “रील सछैँज्याव यूहन्नाए ओयेन परमेस्वरए ल्योनी ताव सैं मिँराए ल्योनी ताव?” है ओरादोक ते, नोर या याल, “यूहन्नाए ओयेन परमेस्वरनी ताव” है गेद्या गेलिकिन, ‘हुकी काराव यूहन्नाए ओपाँ जेमाभैःव?’ है दान्या ले। <sup>26</sup> फरी ‘मिँनी’ है गेद्या गेलिकिन मिँराए ल्योनी ओछ्यास लिज्या। मिँ भरिए यूहन्नालाई अगमबक्ता ज़ है लिद थरैद नैर,” है लिद, <sup>27</sup> नोराए येसुलाई, “गेमासैँए,” है दोकेर। हाःत ज़ येसुए मनी, “हो ची ताकिन्दा डालाई आव येन दान्या हक सुए ओयाँव डा ब है डामादाच्यो।”

### दुई भाइनी निपाँ

<sup>28</sup> “जे आव पाँलाई फाल्चिके — तोबोए ओज़ानी नेब्लो निल्यो दी। नो निबाबु जेथाए ओल्योक बाद, ‘अ डाज़ा, आछिम नँ डाँःल येन दानाद्याव ताके,’ है ओदोक ते, <sup>29</sup> ‘डा डामाबा, बाबु,’ है दोक्यो दी। खाली छीनी ते उयुँ फकैँद बाके दी। <sup>30</sup> हिताव ज़ फरी नो कान्छा ओज़ालाई है ओदोनाक, ‘ताए बाबु, डा डाबाया,’ है ते दोक्यो दी। खाली छीनी ते माबाके दी। <sup>31</sup> है जैद नो नेब्लोनी काताकावए निबाबुए ओपाँ दोन्या?” है ओरादोक ते, “डामाबा है लिद बाव ज़ ताखेहो,” है दोकेर। नाःत ज़ येसुए, “डा जेलाई साचो है डादाचिज्या, हिताव ज़ सिर्मा स्योःज्याव पापीर सोनो पातर्नी मेंमार जेकिन डादा परमेस्वरए ओराज्याल बान्या लेर। <sup>32</sup> यूहन्नाए जेल्योक धर्मलाव येम सतैना हुके, जे ते नोए ओपाँ जेमाभैःके। इन सिर्मा स्योःज्याव पापीर सोनो पातर्नी मेंमाराए नोए ओपाँ भैःकेर। जे निताव रँःद ब जेयुँ जेमाफकैँए, भैःन्या ब जेमाभैःए।”

अधिया कमैजूयावराए घर्ती

(मर्कूस १२:१-१२; लूका २०:९-१९)

33“फरी आव ब तोबो थैचिके — तोबो धनीए ओएँ: भरिल जोम्परसै झाःद प्राइँनी भार्नाए धिरिद, जोम्परसै पीन्या कोलो ब तोबो झाःद, मिँ लिन्या खोपोरा ब तोबो जैद, नो एँ:लाई अधियाल याद ओल तोबो तादा देसड लिनाके दी। 34 नलाव जोम्परसैर किन्या बेला ओतावत ओयेन दाजूयावरालाई उजुँ भरी चानाव यापरींक्यो दी। 35 नो अधिया कमैजूयावराए झन नोरालाई क्योःद ख्वारालाई याराप्रोकेर दी, ख्वारालाई लुँ लुँराए याराझेःकेर दी, ख्वारालाई यारासैःकेर दी। 36 फरी छींनी जाँ माहोल्या ओयेन दाजूयावर ओरापरींक होरालाई मनी हैज याराजैकेर दी।

37“प्राइँनी छींत ओजालाई ‘आवलाई ताकिन ओमान नैदिर सै’ लिद नोलाई परींक्यो दी। 38 खाली नो अधिया कमैजूयावराए ओजा उहुजूयाव रँःद या या पाँसिद, ‘आव ते एँ: दैन्या मिँ ची। नोलाई सैःद आव एँ: गेमी ज़ गेजैया’ लिद, 39 नोलाई क्योःद नो एँ:नी पाखाड लाँद सैःकेर दी।”

40नकिन येसुए नो मुख्या पुजारीर सोनो यहूदीराए यासेररालाई, “नो एँ:ए ओर्गेए अधिया कमैजूयावरालाई कै याजैवके, है दाँचिके,” है ओरादोक ते, 41 नोराए, “निताव याफ्याःहुवरालाई सफ्याःद नो एँ: बेला बेलाक ओल उजुँ यान्यारालाई यान्या ले,” है दोकेर। 42 हाःत ज़ येसुए फरी, “जे आव धर्मसास्त्रलाव पाँ जेपरिखेहो, ‘भुलीराए कानुल ज़ माजूयासे लिद याख्याव लुँ नो ज़ झन भुयारलाव लुँ ताके।

आव ओल परमेस्वरनी ताव पाँर ज़, इताव रँःद गे अचम्ब गेताजूया।’

43है जैद डा जेलाई है डादाचिजूया, परमेस्वरए ओराजूया जेलाई

नैद उगुन मामें:द ओयेन दाज्यावरालाई यान्या ले। <sup>44</sup> फरी जो मिं नो भुयारलाव लुँत पाज्या ओल ज़ कुतु कुतु तान्या ले। नो लुँ फरी ओतर्त उहुकिन झन नप नप ज़ तान्या ले।”

<sup>45</sup>नो मुख्या पुजारीर सोनो फरिसीराए येसुए ओपाँ थैद, “आव पाँ भरी ते गेडैत झा:द ची पाँके,” है लिद, <sup>46</sup> येसुलाई क्यो:व पैकेर। खाली ओलस लिज्याव माहोल्यारालाई रँ:द छे:केर, काराव ल्यो ताकिन नो माहोल्याराए येसुलाई अगमबक्ता ज़ है यादोज्याव।

## 22

### राजाए ओभ्त्यार

(लूका १४:१५-२४)

<sup>1</sup>येसुए नोर यारसिउ रँ:द अइ लिद घर्ती तोबो झा:द याएक्यो,  
<sup>2</sup> “स्वर्गताव राज्या ते तोबो राजा स्यासो लिज्या। नोए खेपा ओजाए उबिह्याए जूनी भ्त्यार जैद, <sup>3</sup> ओनोकोररालाई नो भ्त्यारल हुन्या सोर ओरायोरालाई खुल्नाव यापरीक्यो दी। नो सोर दैवर झन हुव माभै:केर दी। <sup>4</sup> है जैद फरी ब छुत ओनोकोररालाई खुल्द, ‘जे नो सोर दैवराए ल्योक फरी ब बाद, ‘राजाए जेजूनी सोइव सोइव मारर सै:द ज्याव भरी जैधुक्यो दी, जे काचाबुल ज़ बान्या दी,’ है यारादोनाचिके,’ लिद यापरीक्यो दी। <sup>5</sup> नोर झन सोर माथैव मिताव जैसिद यायेन मारासूद ख्वार याएँ:दा, ख्वार बेपार दाना बाकेर दी। <sup>6</sup> ख्वाराए झन नो किना बाव ओनोकोररालाई क्यो:द बीज्यात जैद यारासै:केर दी।

<sup>7</sup> “छीनी नो राजाए नो भरी थैद उरिस चोद उसिपाईर परींद नो सै:ज्यावरालाई खदम जैद यानाखारलाई ब में: लैद याराएकेर दी। <sup>8</sup> नकिन नो राजाए ओनोकोररालाई खुल्द, ‘भ्त्यार भरी जैसिधुके, नो सोर दैवर भ्त्यार ज्ञयान्या स्यासोर माताकेर। <sup>9</sup> है जैद जे येम जीदा बाद जो जोर जेरादैज्या, हो होर ज़ भ्त्यारल यारारैच्यो,’ है दाद यापरीक्यो दी। <sup>10</sup> है जैद नो ओनोकोरर येम जीदा बाद

चाव माचाव यारादैव भरी दुपूद भत्यारल यारारैकेर दी। नोर राजाए उझिमल तसी ज़ ब्याल्केर दी।

11“नकिन राजा ओपाहुनारास दैसिना हुके दी। नल तोबोलाई बिह्यालाव क्वा माक्वाइसिउ रँ:द, 12 राजाए नोलाई, ‘डानै, बिह्यालाव क्वा माक्वाइसिद कै जैद आल नपसिहुव?’ है ओदोक ते, नो मिँ लोलोतो:व ज़ ताके दी। 13 हा:त ज़ नो राजाए ओनोकोररालाई खुल्द, ‘आवलाई उखँ उकुइ किद लाँ:काव चुम चुमोल ख्यानाचिके। नल ओहार डर डर कैद चिर चिर किद गघर्क।’ ”

14येसुए नो घर्ती नत ज़ तुपैद, “हिताव ज़ खुल्सिउर कुधु ज़ लिज़्यार, छाँतिसिउर ते छ्या ज़ लिज़्यार,” है यादोक्यो।

माहाराजालाई सिर्मा यान्या सैं मायान्या

(मर्कूस १२:१३-१७; लूका २०:१९-२६)

15नो पाँर थैद फरिसीराए, “येसुए ओपाँ काननी क्यो:द गेएके?” लिद गुमुस्ता दाद, 16 यासिसर स्रोनो हेरोद राजासकावरालाई येसुए ल्योक यारापरींकेर। नोर ओल्योक बाद, “गुर्बा, नँ गेस नपाँज़्याव भरी साचो वाज़ लिज़्या। परमेस्वरए ल्योदा बान्या येम ब साचोस नपैसिज़्या। मिँ रँ:द ब नमादोए, सुए ल्योदा ब नमाजैसिए। 17 है जैद गेलाई तोबो पाँ है दाव ताके, माहाराजालाई गे सिर्मा यान्या सैं मायान्या?” है यादोक ते, 18 येसुए नोराए याचाल सैद, “ए कैफतीर, डालाई काराव जेजाँचिनाज़्याव? 19 सिर्मा फोन्या पैसा डालाई तोबो सतैद्याँचिके,” है ओरादोक ते, पैसा रैदिके। 20 येसुए फरी, “आत सुए उसुरूप, सुए उमिन उलिज़्याव?” है ओरादोक ते, 21 “माहाराजाए उमीं ज़,” है दोकेर। नकिन येसुए, “हो ची ताकिन्दा माहाराजाए उमीं भरी माहाराजालाई ज़ एच्यो, परमेस्वरए उमीं भरी परमेस्वरलाई ज़ एच्यो,” है ओरादोक ते, 22 नोर अचम्ब ताद नोलाई रासूद बाकेर।



सदुकीराए यापाँ

(मर्कूस १२:१८-२७; लूका २०:२७-४०)

23नकिन हो छचाम ज़ सदुकीर ब येसुए ल्योक तोबो पाँ है दोहुकेर। सदुकी है यारादोज़्यावराए 'सिउकिन सैसिन्या माताए' है यालिज़्याव। 24 है जैद नोराए, "गुर्बा, मोसाए ओकानुनल तोबो अइ लिद सर्सिउ लिज़्या, 'तोबोए ज़्या दाद ज़ार मादैद उसिकिन, ओभाइए ओदाज्युए ओथोर माफ्या-न्याए जूनी ओमारूमलाई ओरैवक।' 25 किताव गेस तोबोए ओज़ार सात भाइ याल्यो। यादाज्युए ज़्या दाद ज़ार मादैद ज़ सिके। ओज़ार यामाल्योए ओज्या ओभाइलाई ख्यानैदिक्यो। 26 फरी होए उधूँलावए नो ओमारूमलाई रैद नो मनी ज़ार मादैद ज़ सिके। नकिन साइँला मनी हिताव ज़ ताके। नितावनी ज़ नो मेंमालाई सात भाइए ज़ रैकेर। नोर प्राइँ ज़ार मादैद ज़ सिकेर। 27 प्राइँरानी छीनी नो मेंमा ब सिके। 28 है जैद नो मेंमा सात भाइए याज्या ओतावए अजम्बरी जुनील काताकावए याज्या तान्या?" है लिकेर।

29हा:त ज़ येसुए, "जे धर्मसास्त्रलाव पाँ मातीद परमेस्वरए ओसक्ती ब जेमाथरैधुवए ज़ चबनै बिरैद जेनै। 30 अजम्बरी जुनील सुए ज़ ज़्या ब मादोर, रे ब मादोर। प्राइँ ज़ स्वर्गताव चाकर्या स्यासोर ताज़्यार। 31 है जैद जे 'सिउकिन सैसिन्या माताए' है ल्यो पैज़्यावर आव धर्मसास्त्रलाव परमेस्वरए ओपाँव पाँ थैचिके, 32 'डा अब्राहामए ओपरमेस्वर, इसहाकए ओपरमेस्वर सोनो याकूबए ओपरमेस्वर ज़।' है जैद मोरोराए यापरमेस्वर मा:क, जींदो तावराए यापरमेस्वर ची," है लिद यासथैक्यो। 33 नक लिज़्याव माहोल्यार येसुए ओपाँ थैद अचम्ब ताकेर।

प्राइँरानी दान्या येन

(मर्कूस १२:२८-३४; लूका १०:२५-२८)

34 येसुए सदुकीरालाई थाम थुम ओराख्याव थैद नक लिज्याव फरिसीर दुप्सिद, 35 कानुनलाव तोबो यागुर्बालाई येसुलाई जाँचिना परींकेर। नोए येसुलाई, 36 “गुर्बा, कानुन भरिरानी प्राइरानी दान्या काताकाव उलिज्याव?” है ओदोक ते, 37 येसुए, “जेयुँलाई आदा होदा मादुलैद, जेर्सा मामोद, जेप्रभु परमेस्वरए ल्योदा युँ थू जैद ओललाई वाज्र मया दान्या।’ 38 प्राइरानी डात दान्या येन नो ज़। 39 होए उधूँलाव येन ब हो मिताव ज़, ‘जेक्याँलाई किताव जेसमारिज्या, छुतलाई ब हिताव ज़ समारिन्या।’ 40 मोसाए ओकानुन भरी सोनो अगमबक्ताराए यासरो भरी ब आव नेब्लोत थोम्सिज्या,” है दोक्यो।

ख्रीस दाऊद राजाकिन घेप्पा लिज्या

(मर्कूस १२:३५-३७; लूका २०:४१-४४)

41 नकिन नो दुप्सिद लिज्याव फरिसीरालाई येसुए, “जे डालाई है दाँचिके, 42 ख्रीस सुए ओथोलाव ओताज्याव है जेलिज्या?” है ओरादोक ते, “दाऊदए ओथोलाव ज़,” है दोकेर। 43 येसुए फरी, “दाऊदए ओथोलाव वाज्र ओताकिन कै जैद धर्मसास्त्रल ओल दाऊदए मनी परमेस्वरए उपरूसनी ओपाँक ख्रीसलाई ‘डाप्रभु ज़’ है ओदोज्याव? नो धर्मसास्त्रलाव ओपाँव आव ज़,

44 ‘परमेस्वरए डाप्रभुलाई,

‘नसुतुररालाई नखँ धूँल झाःद डामाईवा पै, डावोर्दा चुसिद लिनके,’ है दोक्यो।’

45 है जैद ओल दाऊदए ब ख्रीसलाई ‘डाप्रभु ज़’ है ओदोकिन नो कै जैद दाऊदए ओथोल वाज्र उगनिसिज्याव?” है ओरादोक ते, 46 येसुस सु ज़ मापाँधुकेर। हो छचामकिन ज़ सुए ज़ येसुस पाँन्या आँत मादोकेर।

## 23

सास्त्रीर स्रोनो फरिसीरालाई थैए माँतकन

(मर्कूस १२:३८-४०; लूका ११:३९-५२; १३:३४-३५; २०:४५-४७)

१ नकिन येसुए उसिसर स्रोनो नल लिज्ज्याव माहोल्यारालाई अइ लिद यासथैक्यो, २ “सास्त्रीर स्रोनो फरिसीराए मोसाए ओकानुन पैन्या हक दैद नैर। ३ है जैद नोराए है यादाचिज्ज्याव मिताव जेदोदी ब थिक ज़, खाली नोराए यादोज्ज्याव मिताव येन ते तादोच्यो। नोराए यायाःए वाज़ दोज्ज्यार, याकुइए ते मादोर। ४ नोर सुए ज़ यामासयोःधुज्ज्याव कानुनर जैद छुतरालाई वाज़ दाव यारापरीज्ज्यार, या ताकितर तके ओछचो ब माछुर। ५ नोराए यादोज्ज्याव भरी ते मिँराए झक सतैन्या वाज़ लिज्ज्या। नोर परमेस्वरए ओकानुन सर्सिउ पत्रीलाई घेप्पा जैद याचाँदीत स्रोनो यापाखोरात पोःद बारिज्ज्यार। याक्वारात ब झुम्कार ताःद बारिज्ज्यार। ६ नोर सःद घ्योःव घ्योःव भत्यारराल स्रोनो धर्मसास्त्र झिमराल प्राइँराए रँःन्या पोःक चुसिउ पैज्ज्यार। ७ बजार जीदा ब ‘मिँराए गुर्बा लिद धो घदासिरक’ लिन्या युँ दाद बारिज्ज्यार।

८ “जे ते फरी ‘प्राइँए गुर्बा है घदासिरक’ लिन्यार ताजैसिच्यो। जे जेगुर्बा ते तोबो वाज़ लिज्ज्या, जे ते दाज्यु भाइर ची। ९ जे आव मानुवाताव मिँरालाई ब कोभालाई बाबु है तारादोच्यो। जे जेबाबु ते स्वर्गत तोबो वाज़ लिज्ज्या। १० फरी जे सःद प्राइँए याडैताव मिताव ब ताजैसिच्यो। जे जेडैत तोबो वाज़ लिज्ज्या, हो ख्रीस ज़। ११ है जैद जे जेल ते जो घेप्पा जेताज्ज्या, हो प्राइँए यासेवा दान्या ओजैसिक। १२ जो ओलनी सघ्योःसिज्ज्या, हो ज़िम्रिज्ज्या। फरी जो ओलनी सज़िमसिज्ज्या, हो घ्योःरिज्ज्या।”

१३ “जे कैफती सास्त्रीर स्रोनो फरिसीरालाई थैए माँतकन ज़ लिज्ज्या।

जे स्वर्गताव राज्याल बाजूयावरालाई जेरावैजूया। नो राज्याल जे ते पसिउ जेमाभें:के, झन पसिउ पैजूयावरालाई ब पसिउ जेमाराए। 14[“फरी ब सास्त्रीर सोनो फरिसीरालाई थैए माँतकन ज़ लिजूया। जे कैफतीर राँदी मेंमारालाई तँनी छाम छुम जेराख्याज़्या, मिँराए ड़ाक वाज़ बनै चाव चाव पोखारिउ जेजैसिजूया। जे ते प्राइँरानी घ्यो:व सजा ज़ जेदैरिजूया।]

15“जे कैफती सास्त्रीर सोनो फरिसीरालाई थैए माँतकन ज़ लिजूया। जे तोबोलाई जेचलनल रैन्याए जूँनी समुन्द्र तरिद जेराखिमनाजूया, झें:व झें:व गोंर ब कातिद जेराखिमनाजूया। तोबोलाई जेदैकिन जेकिन झन ज़ नोलाई नर्गए ओथोलाव जेजैजूया।

16“जे उमी पावए येम पैन्या ओजैसिजूयाव मितावर जेलिजूया। जे अनाकलाव कानुनर जैद, ‘ध्यान झिम छुद किर्या झा:सिउ, नो किर्या माथंरिए,’ है जेलिजूया। ‘ध्यान झिमलाव सुनलाई छुद झा:किन वाज़ थंरिजूया,’ है जेलिजूया। 17 जे किताव जेमी मारै:व भाँकात्यार जेल्यो, कै जैद नो सुनलाई चोखैजूयाव ध्यान झिमकिन नलाव लिजूयाव सुन घेप्पा ओताजूयाव? 18 जे फरी, ‘थानलाई छुद किर्या झा:सिउ, नो ब माथंरिए। नो थानल लिजूयावलाई छुद झा:किन वाज़ किर्या थंरिजूया,’ है जेलिजूया। 19 जे किताव जेमी मारै:वर जेल्यो, कै जैद नो चरै:सिउलाई चोखैजूयाव थानकिन नलाव चरै:सिउ ओघ्यो:जूयाव? 20 है जैद किर्या झा:जूयाव मिँए थानलाई छुद किर्या ओझा:किन नलाव लिजूयाव भरी ब माहुइ रो? 21 हो मिताव ज़ ध्यान झिमलाई छुद झा:किन नलाव लिजूयाव भरी ब हुजूया। नलाव लिजूयाव परमेस्वर ब हुजूया। 22 फरी नमलाई छुद किर्या झा:किन परमेस्वरए उसिंहासनलाई छुद ओझा:व मिताव ब लिजूया, ओल परमेस्वरए उमिन ज़ छुद ओझा:व मिताव ब लिजूया।

23“जे कैफती सास्त्रीर सोनो फरिसीरालाई थैए माँतकन ज़ लिज़्या। जे तके दँ जरार घोद दस भा जैद तभा भितील झाःन्या येन ते जेमाबिरैए। इन प्राइरानी ओचाहित ल्यो कानुनलाव सर्सिउ पाँ, सतस दान्या, सतत लिन्या, छुतए ल्योदा युँ नान्या, नो भरी ते जेरास्के। जे ते इन नो ओचाहित ल्योलाई ब रासो मापरिन्या। 24 जे किताव भाँकात्यार जेल्यो, तोबो ओभार भाँती ल्यो मिँए ऊँतलाई गाल्द, तकेज़ा रूइलाई उरँःक उयुँ माजाम्द हाइद ख्याज़्याव मिँ स्यासोर जेलिज़्या।

25“जे कैफती सास्त्रीर सोनो फरिसीरालाई थैए माँतकन ज़ लिज़्या। जे ताथीर खुरीर जेराचोखोइज़्याव नो पाखाताव वाज़ लिज़्या। जेयुँल ते लोभ सोनो जोत ब युँ मानैधुन्या वाज़ लिज़्या। 26 जे भाँकात्या फरिसीर, डादा जेयुँलाई सछैँचिकेदा, पाखाताव जेक्याँ ब चोखो ज़ तान्या ले।

27“जे कैफती सास्त्रीर सोनो फरिसीरालाई थैए माँतकन ज़ लिज़्या। जे सरा थीसिउ मथ स्यासोर जेलिज़्या। नो मथ पाखानी बनै चाव पोरोःव रैःज़्या, उजील ते चिची सी डरो मिँराए रूसर वाज़ लिज़्या। 28 हिताव ज़ जे मनी मिँराए डाक बनै चाव धर्मी मिताव जेजैसिज़्या, जेयुँल ते कैफत सोनो अधर्म वाज़ लिज़्या।

29“जे निताव कैफती सास्त्रीर सोनो फरिसीरालाई थैए माँतकन ज़ लिज़्या। अगमबक्ताराए याखादरर जेराबनैज़्या, यामिनताव नैर ब स्यासी जैद, 30 ‘गे गेसाखा पुर्खाराए याबेलाक यास गेल्यो ताकिन इताव अगमबक्तारालाई सैःन्या गेमाल्यो,’ है जेलिज़्या। 31 है जैद ननी ज़, ‘अगमबक्तारालाई सैःज्यावराए याथोर गे ज़ गेल्यो’ लिन्या जे ज़ जेथरैज़्या। 32 है जैद जे मनी जेसाखा पुर्खाराए यादोज्याव येन घसयोःच्यो।

33“ए घुलर, घुलए ओथोर! जे नर्गलाव सजानी कै जैद उस्किउ

जेदैरिज्ञ्याव? <sup>34</sup> डा जेल्योदा अगमबत्तार, याबुद्धी ल्योर, सोनो ओल्योदा बान्या येम पैज्ञ्यावर परींद डायचिरिज्ञ्या। जे नोरानी ख्वारालाई जेरासैःरिज्ञ्या, ख्वारालाई क्रुसत जेरातङ्गैरिज्ञ्या, ख्वारालाई धर्मसास्त्र झिम झिमल जेरापोरिज्ञ्या, ख्वारालाई सहर सहरदा जेराखेपैरिज्ञ्या। <sup>35</sup> है जैद यारासैःव धर्मी भरी नो ओदाज्युए ओसैःव हाबिलए ओपालाकिन नो थान सोनो ध्यान झिमनी निखालाव जेसैःव बेरेक्याहए ओजा जकरिया पैकावराए याझी जेलाई ज़ लागिस्रिज्ञ्या। <sup>36</sup> जेलाई साचो है डादाचिज्ञ्या, आव भरी आव बेलाकाव मिंराए डैत ज़ फुलुप्सिरिज्ञ्या।”

<sup>37</sup>“ए यरूसलेमलाव मिंर, कै जैद अगमबत्ता भरिरालाई जेरासैःज्ञ्याव, जेल्योक परीसिउरालाई ब लुँ लुँए जेराङ्गेःज्ञ्याव? बामाए ओचर्ल्यानीर ओकर धूँल ओरादुपज्ञ्याव मिताव, डा ब जेलाई कुधु पाला ज़ डाल्योदा पाथस दुपो डापैके, खाली जे ते जेमाभैःके। <sup>38</sup> है जैद जेझिम रिता ज़ तारिज्ञ्या। <sup>39</sup> डा जेलाई है डादाचिज्ञ्या, आकिन ते ‘परमेस्वरए उमिनताव हुज्ञ्याव धन्याकाव ओताक’ है जेमादाँवा पै डालाई फरी रँःन्या जेमाले।”

## 24

खेमन्या बेलाकाव सरेसर

(मर्कूस १३:१-२३; लूका २१:५-२४)

<sup>1</sup>नकिन येसु ध्यान झिमनी पुलुसुद ओबाज्ञ्याक उसिसराए, “गुर्बा, आव ध्यान झिम काता आः चाव जैसिउ उलिज्ञ्याव,” है यादोक ते, <sup>2</sup> येसुए, “हैज़, आव भरी चिऊचिके। खाली डा जेलाई साचो है डादाचिज्ञ्या, छीनी तछा आव भरी तैःद लुँए तर्त लुँ ब रहिन्या माले,” है यादोक्यो।

<sup>3</sup>नकिन जाँवाक येसु जैतून दाँदात चुसिद उलिज्ञ्याक उसिसर

याबातड अलगजा ओल्योक बाद, “आव नपाँ भरी खर्क ओतारिज्याव, नँ हुन्या बेला सोनो आव जुक खेमन्या बेलाकाव सरेस किताव ओतारिज्याव? गेलाई है दासिके,” है यादोक ते, 4 येसुए, “जेलाई सुवाराए झुकैचिर्या, जे सैसिद जोगोइसिद लिच्यो। 5 मिँर डा डामिन कुद ‘डा ज़ खीस’ है लिद कुधु ज़ हुद कुधुलाई याराझुकैरिज्यार। 6 सोनो ‘आड लरें ताज्या, होड लरें ताज्या’ है यालिज्याव जेथैक जे ताछेच्यो। आव जुनी ब ताव ज़ परिए, खाली नो खेमन्या बेला माःक। 7 नोकिन डादा जात जात, राज्या राज्या लरें दान्या लेर। पो पोल भोचालोर अनिकालर ब तारिज्या। 8 आव भरी मेमाए ज़ा दैन्या बेलाक ओघर्लिज्याव मिताव सुरूलाव दुख वाज़ लिज्या।

9 “नो बेलाक जेलाई मनी जेखिरी पसिद सूपिद सैःचिरिज्यार। जे डामिनतावर जेतावए प्राई जातलाव मिँराए सोचिरिज्यार। 10 नो बेलाक कुधुए ज़ यायुँ क्यद डालाई रासुनारिज्यार। नोर ख्वा ख्वा या याल ब सोसिद धोका यासिरिज्यार। 11 फरी कुधुए ज़ आव डापाँ बलेद तँदा पैन्यार जैसिद कुधुलाई ज़ याराबलेरिज्यार। 12 आव मानुवात अधर्मलाव येन बनै ज़ उमचिउए कुधु मिँराए यामया खेस्रिज्या। 13 खाली जो आव दुखर ओमाखेमा पै थोरिज्या, होए ज़ अजम्बरी जुनी दैन्या ले। 14 परमेस्वरए ओराज्यालाव आव चाव था संसार भरिलाव काना कुनीडाव प्राई जातलाव मिँराए थैद परमेस्वरए ओसाची यादैवत, बल्ल आव जुक ब खेमन्या ले।

15 “है जैद आव ब सैच्यो, जे दानिएल अगमबक्ताए ओसरो मिताव नो ध्यान झिमलाव चोखो पोल तोबो फुरी हुद नुल्पा नुल्मा ओजैहुव जेरँक, 16 हो बेलाक यहूदियाल लिज्यावर गों जीदा ओधोःरक। 17 थालात लिज्यावर ब याझिमलाव याआल मालर ताचानारक। 18 एँःल लिज्यावर मनी याक्वार चाना याझिमदा

ताबारक। 19 नो बेलाक याफूल याजा ल्योर सोनो नुईं सवैज्याव आमार युँ नावज्जार। 20 खाली धों:न्या बेला ज्युँ:व साहाक सोनो नासिन्या छचाम ताताक लिद परमेस्वरलाई पोंखारिच्यो। 21 हो बेलाकाव दुख बनै धो सहिउ तारिज्या। निताव दुख आव संसार सुरू ओतावकिन आ:पै माहुताए, निताव दुख नोकिन छीनी ब तान्या माले। 22 निताव बेला तावका ताव ज़ उलिकिन सु ज़ रहिन्या मालेर। खाली ओल परमेस्वरए छाँतिद ओरानैज्याव उमीराए जूनी नो बेला सुतुईंघान्या ले।

23“नो बेलाक जेलाई सुवाराए, ‘ख्रीस आड हूद ले, होड हूद ले,’ है यादाचिकिन नोरालाई तारापतिच्यो। 24 ख्वार डा डामिन कुद ख्रीस जैसिद हुन्या लेर, ख्वार परमेस्वरए उपुरूसनी पाँव जैसिद हुन्या लेर। नोराए अचम्ब अचम्बलाव सरैसर येनर जैद कुधुलाई झुकैन्या लेर। परमेस्वरए ओराछाँतिउरालाई मनी झुकैन्या छचास लिज्या। 25 है जैद आव पाँर जेलाई डादा ज़ है दाद डानैचिए। 26 मिँराए जेलाई, ‘ख्रीस फलाना बनल हूद ले,’ है यादाचिक होदा ताबाच्यो, फरी ‘झिम जील लिज्या,’ है यादाचिकिन नोराए यापाँ ब तापतिच्यो। 27 डा मिँ मिन्सिउ डाहुन्या छचाम किताव पुर्बड बिजुली उमिल्किक पछचुँड पै ज़गै जैज्याव, हिताव ज़ डा मनी प्राईए रँ:न्याक मी चिकलामत ज़ हुन्या डाले। 28 किताव खरल ओताक वाज़ का गिद्वर हुज्यार, हिताव ज़ तान्या ले।”

ख्रीस फरी उहुन्या छचाम

(मर्कूस १३:२४-२७; लूका २१:२५-२८)

29“हो बेलाकाव दुख ओखेमोत निमी ब चुम चुमो तारिज्या, स्यावैए ओज़गै ब मारिज्या, सोरोर ब नमतिन तेरिज्यार, नमताव भरी ब यासतर माद थोनो:सिन्या लेर। 30 ना:त ज़ मिँ मिन्सिउ डाहुन्या



सरेस नमत रैं:रिजूया। बनै ज़गै मगैव डासक्तीरास बादलरास स्वर्गनी डाहुजूयाव आव मानुवाताव प्राईं जातलाव मिँराए रैं:द नोर यायूरं स्यासे सतेन्या लेर। 31 ना:त ज़ तोबो भोंकरए ओर्गात स्वर्गताव डाचाकर्यार डारापरींवत नोराए नाम नमलाव प्राईं काना कुनीलाव छाँतिद डारानैजूयाव डामींरालाईं डाल्योक यारादुपरिजूयार।”

नेभारा सींए ओसरेस

(मर्कूस १३:२८-३१; लूका २१:२९-३३)

32“आव ब सैंच्यो, किताव नेभारा सीं ओमोम्नाक ‘उभ्याली उहुनाव ची ओल्यो’ है जेलिजूया, 33 हिताव ज़ नो है डादाचिउ पाँ भरी ओतानाड्याव जेरें:क ‘ख्रीस उहुन्या बेला ओतानाव ची ओल्यो’ लिन्या सैंच्यो। 34 डा जेलाई साचो है डादाचिजूया, आव भरी ओमातावा पै आव जुक खेम्न्या माले। 35 आव नाम नम ते खेम्न्या ले, डा डापाँ ते खर्क ज़ म्नान्या माले।”

ख्रीस उहुन्या बेला सुए ज़ मासैर

(मर्कूस १३:३२-३७; लूका १७:२६-३०,३४-३६)

36“नो छ्याम, नो बेला सुए ज़ मासैर। स्वर्गताव चाकर्याराए ब मासैर, परमेस्वरए ओज़्राए ब मासैव, स्वर्गताव डाबाबुए वाज़ सैंजूयाव। 37 है जैद डा मिँ मिन्सिउ डाहुन्या बेला नोआए ओपालाकाव मिताव ज़ तारिजूया। 38 नोआए ओपालाकाव मिँ ब रीए ओमारागदैवा पै ज़्याद ओद, ज़्यार रेर ब दाव येन ज़ यादोज़्याव। नोआ री जहाजल ओमापसिवा पै नोर नो येन दाव ज़ यानैजूयाव। 39 रीए साम सुम ओमारागदैवा पै ‘इताव गेतारिजूया’ लिन्या मासैंकेर। डा मिँ मिन्सिउ डाहुन्या छ्याम ब हिताव ज़ तारिजूया। 40 नो बेलाक एँ:ल येन दाजूयावनिलाईं

तोबोलाई लाँरिजूयाव, तोबोलाई ख्यानैरिजूयाव। 41 हिताव ज़ फरी राँथे हेःजूयाव मेमानिलाई तोबोलाई लाँरिजूयाव, तोबोलाई ख्यानैरिजूयाव।

42“है जैद सैसिद लिच्यो, जेप्रभु आव छचाम हुरिजूया लिन्या जेमासैए। 43 आव ब सैच्यो, तोबो झिमए ओर्गेए ‘चोर आछिम रील आः बेलाक हुरिजूया’ लिन्या ओसैकिन नो सैसिद लिद उझिम पाव माएखेहो। 44 हिताव ज़ जे मनी सैसिद लिच्यो, काराव ल्यो ताकिन डा मिँ मिन्सिउ मनी जेमासैद उमँःजानी ज़ डाहुरिजूया।”

सतस दाजूयाव ओतह ल्यो नोकोर

(लूका १२:४१-४८)

45“किताव तोबो धनी मिँए सतस दाजूयाव ओतह ल्यो ओनोकोरलाई उझिमलाव येन भरी उकुइत याद ओयेन दाजूयावरालाई थिक बेलाक जूयावर यान्या जैद ओख्यानैक, 46 नो नोकोरए सतस येन ओदोजूयाव ओघरपतीए ओदैहुकिन नो नोकोर असिक दैव ज़ तान्या ले। 47 डा साचो है डादाचिजूया, नो ओघरपतीए पाईं ज़ उकुइत यान्या ले। 48 फरी नो नोकोर माचाव ओताकिन, ‘डाघरपती हतपूत माहु,’ लिद, 49 ओलस येन दोजूयावरालाई प्रोद, ओल जूयाद ओद मँःए मँःए ओबारिजूयाक, 50 ओमासैद ओघरपतीए ओदैहुकिन, 51 नोलाई चम चम जैद कैफतीर ओराख्याजूयाव पोल ख्यान्या ले। नल नलावरास याहार डर डर कैद चिर्लनी बिर्ल घर्न्या लेर।”

## 25

दस जना मुँद्यालनीर

1“हाः बेलाक स्वर्गताव राज्याल पसिन्यार कितावर तारके लिक ते, दस जना मुँद्यालनीर सु सु याबत्तीस ओजूया चाना हुजूयाव ब्याहोल्यालाई कींद नैजूयाव मितावर तारिजूयार। 2 नोर पाँच जना यासामा ल्योर, पाँच जना यासामा माल्यो मितावर लिजूयार। 3 नो यासामा माल्यो पाँच जनाराए ते बत्ती वाज़ लाँकेर दी, बत्तील

झाःन्या मास ते मालाँकेर दी। 4 फरी नो यासामा ल्योराए ते बत्तील झाःन्या मास ब लाँद यानैजूयाव दी। 5 नो मुँद्यालनीर ब्याहोल्या हुन्या धिलो ओतावए यामीर पातिद होक ज़ स्याँकेर दी।

6“आधा रील तोबोए, ‘दे सोचिके, ब्याहोल्या हुरिके, सु सु जेबत्ती तैःद ब्याहोल्यास दैसिनाचिके,’ है ओरादोक ते, 7 प्राइँ सोद याबत्तीर बनैद झाःसिकेर दी। 8 नकिन नो यासामा माल्योराए यासामा ल्योरास, ‘गेलाई जेमास तुपुरू याव ताके, गे ते गेबत्तीर सिरिकेर,’ है यारादोक ते, 9 नो यासामा ल्योराए, ‘जेलाली गेयाचिकिन गेलाई ब थैन्या माले। बुरू जे पसलदा लँःनाचिके,’ है यारादोकेर दी। 10 नोर लँःना याबाव प्राइँना ज़ ब्याहोल्या केसहुके दी। हाःत ज़ नो ब्याहोल्याए यासामा ल्योरास बिह्यालाव भत्यारल पसिद ग्राम गल्क्यो दी।

11“छींनी नो यासामा माल्योर मासर लँःद याहुवत ग्राम गल्सिउ रँःद ग्रामत कोतो कोतो जैद, ‘प्रभु, गेलाई ग्राम फैद्यासिके,’ है यादोक ते, 12 ब्याहोल्याए नोरालाई, ‘साचो है डादाचिज़्या, डा जेलाई डामासरेसुचिए,’ है यादोक्यो दी।

13“है जैद जे ब सैसिद लिच्यो। जे ‘आव छचाम, आव बेलाक तारिज़्या’ लिन्या जेमासैए।”

सुन खेलैसिन्या घर्ती

(लूका १९:११-२७)

14“फरी स्वर्गताव राज्या तोबो मिँए ओनोकोर भरिलाई खुल्द ओलसकाव लिज़्याव भरी नोराए यापासल झाःद तादा देसदा ओबाव मिताव ब लिज़्या। 15 नो ओबान्या बेलाक सु सु यागहक रँःद तोबोलाई पाँच तोला सुन, तोबोलाई नेतोला, तोबोलाई त्तोतोला याद याख्यानैक्यो दी। 16 नो ओबाव छींनी नो पाँच तोला दैवए बेहार ज़ खेलैसिद ओयाःत पाँच तोला हाइक्यो दी। 17 हिताव ज़ फरी नो नेतोला दैवए मनी खेलैसिद ओयाःत नेतोला हाइक्यो दी।

18 नो त्तोतोला दैवए ते ओघरपतीए उसुनलाई नामल गादैद म्मोंद नैक्यो दी।

19“कुधु छींनी नो याघरपती हुद, ‘डारायो सुन कै जैर्या’ लिद ओनोकोररालाई याखुल्क्यो दी। 20 नो पाँच तोला दैव हुद, ‘प्रभु, नयाँव पाँच तोला सुन खेलैसिद ओया:त पाँच तोला हाइद डानै,’ है ओदोक ते, 21 ओघरपतीए, ‘स्याबास सतस दाज्याव डानोकोर, डायुँलाव मिताव मिं नलिज्या। तकेजा येनलाई ब सतस नदोवए झन कुधु ज़ नकुइत जैद डार्इरिज्या। है जैद नयुँ होलाँ जैद ड़ास रेनिके,’ है दोक्यो दी।

22“नकिन फरी नो नेतोला दैव हुद, ‘प्रभु, नो नयाँव नेतोला सुन खेलैसिद फरी ओया:त नेतोला हाइद डानै,’ है ओदोक ते, 23 ओघरपतीए नोलाई मनी, ‘स्याबास सतस दाज्याव डानोकोर, डायुँलाव मिताव मिं नलिज्या। इताव तकेजा येनलाई सतस नदोवए झन कुधु ज़ नकुइत जैद डार्इरिज्या। नँ मनी नयुँ होलाँ जैद ड़ास रेनिके,’ है दोक्यो दी।

24“प्राइरानी छींत नो त्तोतोला दैव हुद, ‘प्रभु, नँ बनै कर्रा नतावए नँ ते नमाझा:व ब नसिमज्या, नमानैव ब नलाँज्या। 25 है जैद डाछ्याचेए नो नयाँव सुन नामल गादैद डानैके। किताव नयाँव हिताव ज़ लिज्या,’ है ओदोक ते, 26 ओघरपतीए नोलाई, ‘ए मीसी, कान्ल ज़ काम मालागिउ डानोकोर, डालाई निताव ‘ओमाझा:व ब सिमज्याव, ओमानैव ब लाँज्याव’ है नदाँज्याव ताकिन, 27 काराव नो सुन ब्याङ्गल नमाझा:व? नल नझा:व ताकिन डाहुवत ओब्याजस दैन्या डाल्यो,’ है दाद, 28 नक लिज्यावरालाई, ‘नोलाई नो त्तोतोला नैद दस तोला ल्योलाई एचिके। 29 जोए ओदैवलाई चावस चलैज्याव, होलाई झन ज़ चा:सिद धोल पोगोल ज़ तारिज्या। जोए ओदैवलाई चावस माचलैव, होस छ्या छ्या लिज्याव ब नैसिरिज्या। 30 नो काम मालागिउ डानोकोरलाई ते चुम चुमोल

ख्याचिके। नल ओहार डर डर कैद धस धस गघर्क।’ ”

### मिरालाई फाल्नुया छ्याम

31“तछा मिं मिन्सिउ स्वर्गताव ओचाकर्यारास बनै जगै मगैवस हुद ओराज्या चलैरिज्याव। 32 नो बेलाक प्राईं देसलाव, प्राईं जातलाव मिरालाई ओल्योक दुप्द किताव बेधा गावलाए बेधा भरी तँदा बाकरा भरी तँदा ओराजैज्याव, 33 हिताव ज़ नो राज्या चलैज्यावए मनी नो बेलाक नोरालाई बेधा स्यासो भरी ओवोर्दा, बाकरा स्यासो भरी ओदाबर्यादा जैद, 34 नो राजाए ओवोर्दाडावरालाई है दान्या ले, ‘हुचिके डाबाबुए उयुंलाव मिताव मिरं। नाम नम ओतावकिनकाव जेमिनत नैद ओयाचिउ राज्या जेकुइत रैचिके। 35 जे डाकरेव बेलाक डाकरे सै:द जेयाँके, री डाछोसो बेलाक डारीछो सै:द जेयाँके, डादुलिरिज्याक ब बासिउ जेयाँके, 36 नाङ्ग्या डालिज्याक ब जेक्वाइनाके, डाजोरो उहुक ब जेसमारिनाके, इयालखानाल डालिज्याक ब जेचिऊहुनाके,’ है ओरादोक ते, 37 नो ओवोर्दाडाव धर्मीराए, ‘अ प्रभु, खर्क करे नल्योदा नकरे सै:द गेईव, खर्क नरीछो सै:द गेईव, 38 खर्क नदुलिरिज्याक बासिउ गेईव, खर्क नाङ्ग्या नल्योदा गेक्वाइनिउ? 39 खर्क नजोरो उहुक गेसमारिनिउ, खर्क इयालखानाल नलिक गेचिऊहुनिउ?’ है यादोक ते, 40 नो राजाए, ‘जेलाई साचो है डादाचिज्या, डासकाव प्राईरानी जिम्ज़ा काता ज़ माल्योरालाई जेराचिऊव, नोरालाई मा:क, डालाई जेचिऊनाव मिताव ज़ लिज्या,’ है दान्या ले।

41“नकिन फरी राजाए नो ओदाबर्यादाडावरालाई, ‘ए जेफ्या:हुवर, जे डानी पुलुसूद सैतान सोनो ओचाकर्याराए जूनी जैसिउ नर्गलाव चुयाप मातान्या में:ल बाचिके। 42 डा डाकरेव बेलाक डाकरे सै:द जेमायाँके, री डाछोसो बेलाक डारीछो ब सै:द जेमायाँके,

43 डादुलिरिज्ञ्याक ब बासिउ जेमायाँके, नाडग्या डालिज्ञ्याक ब जेमाक्वाइनाके, डाजोरो उहुक सोनो झ्यालखानाल डालिज्ञ्याक ब जेमाचिऊनाके,' है ओरादोक ते, 44 नो ओदाबर्यादाडाव पापीर, 'प्रभु, खर्क करे नल्यो गेरँ:निउ, खर्क री नछोसो गेरँ:निउ, खर्क नदुलिरिज्ञ्याव गेरँ:निउ, खर्क नाडग्या नल्यो गेरँ:निउ, खर्क नजोरो उहुव सोनो झ्यालखानाल नल्यो गेरँ:निउदा गेमाचिऊनिउ?' है यादोक ते, 45 राजाए नोरालाई, 'डा जेलाई साचो है डादाचिज्ञ्या, जे डासकाव प्राइरानी जिम्जा काता ज़ माल्योरालाई जेमाराचिऊवए, डालाई जेमाचिऊनाव मिताव ज़ लिज्ञ्या,' है दान्या ले।"

46नकिन येसुए, "है जैद जे आव ब सैच्यो, नो ओदाबर्यादाडाव खर्क ज़ माउस्किधुन्या सजाल परिरिज्ञ्यार, नो ओवोर्दाडाव धर्मी भरी ते अजम्बरी जुनील बारिज्ञ्यार," है यादोक्यो।

## 26

येसुलाई सै:न्या गुमुस्ता

(मर्कुस १४:१-२; लूका २२:१-२; यूहन्ना ११:४७-५३)

1येसुए आव पाँ भरी ओखेमोत उसिसरालाई है यादोक्यो, 2 "आछिमकिन नेलात निसूतार पर्व हरिज्ञ्या। नो बेलाक ज़ डा मिँ मिनसिउलाई कुसत तडैद सै:नारिज्ञ्यार," है यादोक्यो। 3 येसुए है ओल्यो मिताव ज़ मुख्या पुजारीर सोनो यहूदीराए यासेरर तोबो कैयाफा यादोज्ञ्याव प्रधान पुजारीए उझिमक दुप्सिद, 4 येसुलाई झुकैद क्यो:द सै:न्या गुमुस्ता दोकेर। 5 खाली, "पर्व बेलाक माता, मिँर मचिन्या ओछ्यास लिज्ञ्या," है लिकेर।

येसुए ओडैत मास थीव मेंमा

(मर्कुस १४:३-९; यूहन्ना १२:१-८)

6हा: बेलाक येसु बेथानिया नाखारल तोबो सिमोन यादोज्ञ्याव कुरीए उझिमक उलिज्ञ्याव। 7 येसुए नो झिमक काँ उज्युज्ञ्याक

तोबो मेंमाए बनै चाव ज़िम्ज़ा लुँ जाल उसी डरो बनै ओए: ल्यो मास रैद येसुए ओडैत ओपो:स ज़ थीदिक्यो। <sup>8</sup> येसुए उसिसराए निताव रँ:द जाँ यारिस चोद, “आव मेंमाए काराव ना: ओए: ल्यो मास खेर ओझा:ज़्याव? <sup>9</sup> बुरू नोलाई यो:द नो पैसाए काता ज़ माल्योरालाई भा:द ओराएकिन तान्या ओल्यो,” है यालिज़्याव। <sup>10</sup> येसुए थैद, “काराव आव मेंमाए उयुँ के:द जेएज़्याव? नोए ते डाज़ूनी बनै चाव येन दोक्यो। <sup>11</sup> काता ज़ माल्योर ते जेस एकतार ज़ लिज़्यार, डा ते जेस एकतार लिन्या डामाले। <sup>12</sup> आवए डाक्याँताव थीद ओयाँव मास, डा मासिद ज़ गादैन्या छचामकावए जूनी डामोरोलाई थीद ओयाँव मिताव ज़ ताके। <sup>13</sup> है जैद डा जेलाई साचो है डादाचिज़्या, संसार भरिल जोड जोड आव चाव था यारासथैज़्यार, होड होड आव मेंमाए ओदोव येन थासूद उमिन ब रहिन्या ले।”

येसुलाई धोका याज़्याव इस्करियोत

(मर्कूस १४:१०-११; लूका २२:३-६)

<sup>14</sup>नकिन बाह्र जना उसिसरानी यहूदा इस्करियोत मुख्या पुजारीराए ल्योक बाद, <sup>15</sup> “डा येसुलाई जेकुइत पारैद डायचिकिन डालाई काता जेयाँके?” है ओरादोक ते, नोर खुसी ताद चाँदीए पैसा तीस गोता एकेर। <sup>16</sup> हा:किन नोए येसुलाई धोका यान्या मौका खिम्क्यो।

माँदा भरेस ज़्यान्या पर्व

(मर्कूस १४:१२-१६; लूका २२:७-१३)

<sup>17</sup>हा:त ज़ माँदा भरेस ज़्यान्या पर्व सुरू ओतावत उसकताव छचाम येसुए उसिसर ओल्योक हुद, “नँ कै नलिज़्या, आव पर्व मानिन्याए जूनी ज़्यावर काङ्क जैनान्या?” है यादोक ते, <sup>18</sup>येसुए, “नो सहरल बाचिकेदा, नक तोबो मिँस दैसिन्या जेले। नोलाई, ‘गेगुर्बाए है दींज़्याव, ओल बान्या बेला ताद ले दी। है जैद गे उसिसरास

आव पर्व नझिमक मानिउ पैजूयाव, है दोच्यो, है दाद यापरीक्यो।  
19 येसुए है ओरादोव मिताव ज़ उसिसराए पर्वताव ज़्याव भरी  
जैकेर।

परमेस्वरए उमिनताव भत्यार

(मर्कूस १४:१७-२६; लूका २२:१४-२३; यूहनना १३:२१-३०; १  
कोरिन्थी ११:२३-२५)

20 हो छचाम रिमक येसु बाह जना उसिसरास नो झिमल दुप्सिद  
जूयान्याए जूनी चुसिकेर। 21 ज़्यावर याजूयुजूयाक येसुए, “डा  
जेलाली साचो है डादाचिजूया, जेनी तोबोए डालाई धोका यान्या ले,”  
है ओरादोक ते, 22 उसिसर यागहरास, “डा ते माताखेहो सा, प्रभु,” है  
लिद पालास है दोकेर। 23 ना:त ज़ येसुए, “जोए डास भरेस चिपल  
छोइद ज़्युजूयाव, हो ज़। 24 डा मिँ मिन्सिउए ते धर्मसास्त्रलाव  
सर्सिउ दुखर जुनी ब सयोव ज़ परिए, खाली डालाई धोका याजूयाव  
मिँलाई ते थैए माँतकन ज़ लिजूया। निताव मिँ बुरू ओमाजर्मिकिन  
तान्या ओल्यो,” है ओरादोक ते, 25 नो धोका याव पैजूयाव यहूदा  
ओल ज़ पर्सिद, “सैँ डा ओताव, गुर्बा?” है ओदोक ते, येसुए, “हैज,  
नँ ज़ है नलिके,” है दोक्यो।

26 नकिन नो याजूयुजूयावत ज़ येसुए उकुइत भरेस तोबो रैद,  
असिक निद नो भरेसलाई के:द, “हाँ, आव ज़्युचिके। आव  
डाक्याँ ज़,” है दाद भा:द याएक्यो। 27 हो मिताव ज़ फरी  
खुरी उकुइत रैद धन्याबाद चरै:द, “जे पाइँए आव खुरीनी ज़  
ओचिके,” है लिद नोरालाई याद, 28 “आव जेओजूयाव कुधु  
मिँराए पाप क्याल्दान्याए जूनी डालोभोरिजूयाव डाली ज़। आनी  
ज़ परमेस्वरए जेस सा:रो बाचा नैद्याचिरिजूयाव। 29 डा जेलाली  
है डादाचिजूया, डा स्वर्गताव डाबाबुए ओराजूयाल जेस सिप  
गेमातावा पै आव भत्यारलाव दाखमद्य आछिमकिन ओन्या



डामाले,” है यादोक्तो। <sup>30</sup> नकिन भजन तोबो गैद ननी पुलुसुद जैतून दाँदादा बाकेर।

पत्रुसए ओयेन येसुए ड़ादा ज़ है ओदोव

(मर्कुस १४:२७-३१; लूका २२:३१-३४; यूहनना १३:३६-३८)

<sup>31</sup>नक याकेसोत येसुए उसिसरालाई, “जे आछिम रील ज़ डालाई प्राइँए रासून्या जेले। धर्मसासुत्रल इताव सर्सिउ लिज़्या, ‘बेधाराए यार्गे गावलालाई प्रोद ड़ासैःवत, बेधार चितराँ पुतराँ तारिज़्यार।’

<sup>32</sup>हैदी ब सिउनी सैसिद जेड़ादा ज़ गालीलल ड़ाबारिज़्या,” है यादोक्तो। <sup>33</sup> हाःत ज़ पत्रुसए, “उपुर्कावराए प्राइँए यारासुनिदी ब ड़ा ते नँलाई खर्क ज़ रासून्या ड़ामाले,” है ओदोक ते, <sup>34</sup> येसुए, “ड़ा नँलाई साचो है ड़ादीज़्या, आछिम रील ज़ भाल्या ओमाकोद ड़ालाई स्रोखेप ‘ड़ामासरेसे’ है दान्या नले,” है ओदोक ते, <sup>35</sup> पत्रुसए फरी, “माःक, ड़ा नँस सिन्या ओतादी ब ड़ा नँलाई ड़ामासरेसे है लिन्या ड़ामाले,” है दोक्तो। उपुर्कावराए मनी हैज़ लिकेर।

येसुए गेतसमनील ओपोखारिउ

(मर्कुस १४:३२-४२; लूका २२:३९-४६)

<sup>36</sup>नकिन येसु उसिसरास गेतसमनी यादोज़्याव बगैचाल बाद उसिसरालाई, “ड़ा जाँ होकसैकावक बाद ड़ापोखारिवा पै जे आक ज़ लिच्यो,” है दाद, <sup>37</sup> पत्रुस सोनो जब्दियाए ओज़ानी याकूब सोनो यूहननारालाई ओलस यालाँक्तो। हाःत ज़ येसु उयूर स्यासे सतेद धो थाइव तानाद, <sup>38</sup> नो सोम्लोरालाई, “ड़ायूर स्यासे तेद सिवा सिवा ताद ड़ाले। जे आक ज़ लिद ड़ास सैसिद लिचिके,” है दाद, <sup>39</sup> नोराकिन छयावा होकसै बाद नामक फुलुपुसिद अइ लिद पोखारिक्तो, “अ बाबु, आव ड़ाक्याँत हुरिज़्याव धो सहिउ दुखर भर्सकी वैद्याँके। खाली ड़ा ड़ायुँ माःक, नँ नयुँ ओताकिन वाज़,” है

लिद, 40 नो सोम्लोराए ल्योक उहुवत नोर इल्द यालिज्याव दैहुद पत्रुसलाई, “जे कै जैद डास तघन्ता पै ब जेमालिधुज्याव? 41 सैसिद पोंखारिचिके, मानी दुखराल जेमाथंरिधुया। जेयुँए ते दान्या ज़ पैज्याव, खाली पाखाताव जेक्याँए ते मासहिधुन्या ओछचास लिज्या,” है दोक्यो।

42 नकिन येसु फरी ब इदाडाव ओपोंखारिज्याव पोक बाद अइ लिद पोंखारिक्यो, “डाबाबु, आव डाक्याँत हरिज्याव धो सहिउ दुखर डा मासहिद ज़ मातान्या ओल्यो ताकिन, है नलिज्याव मिताव ज़ ओताक,” है लिद, 43 नो सोम्लोराए ल्योक उहुक फरी इल्द यालिज्याव ज़ यादैक्यो। नोराए यामीर बनै पातिद मासहिधुकेर।

44 है जैद नोरालाई ख्यानैद फरी ब इदाडाव पोक बाद इदाकिनकाव मिताव ज़ पोंखारिक्यो। 45 नकिन फरी नो सोम्लोराए याल्योक हुद, “आ:पै जेमीर मायो:ताए रो? अब ते डा मिँ मिन्सिउ पापीराए कुइत सँपिसिन्या बेला हुके। 46 च्याँ:सिचिके, गेबा। डालाई धोका याज्याव मिँ नक ज़ हुद ले,” है यादोक्यो।

येसुलाई याक्यो:हुव

(मर्कूस १४:४३-५०; लूका २२:४७-५३; यूहनना १८:३-१२)

47 येसु ओपाँज्याक ज़ नो बाह जना उसिसरानिकाव यहूदा इस्करियोत बनै माहोल्या मिँरास तरवालीर खोंतार रैद हुकेर। नोर मुख्या पुजारीर सोनो यहूदीराए यासेरराए ल्योनी हुवर याल्यो। 48 नो इस्करियोतए इदा ज़ नो क्यो:ना हुज्यावरालाई, “डा जोलाई माइँ डादोए, होलाई ज़ क्यो:च्यो,” लिद सरेस याद ओरानैज्याव। 49 है जैद बगैचाल याकेसो प्राइँना इस्करियोत येसुए ल्योक बाद, “जेरो गुर्बा,” लिद माइँ दोक्यो। 50 हा:त ज़ येसुए, “अ डानै, डाक्याँत नदान्या दोके,” है ओदोव प्राइँना ज़ नो माहोल्यार हुद

येसुलाई ताप तप क्योःकेर।

51 हाःत ज़ येसुसकाव तोबोए ओतरवाली हाइद प्रधान पुजारीए ओनोकोरलाई तँनिकाव ओर्ना पल्द सतेदिक्यो। 52 येसुए निताव रँःद, “नतरवाली उसिपल झाःके। तरवाली चलैजूयावर तरवालीनी ज़ सिरिज़्यार। 53 डा डाबाबु परमेस्वरस डान्किन बाह पल्तन ओचाकर्यार तादी ब डालाई परींघान्या ले, नो जेमासैए रो? 54 खाली निताव डान्किन आव डाक्याँत ताव परिन्या धर्मसास्त्रलाव सर्सिउ पाँर कातानी ओयोःरिजूयाव?”

55 नकिन येसुए नो क्योःना हुव माहोल्यारालाई, “काराव डालाई दाँकालाई मिताव तरवालीर खोंतार दाद जेक्योःहुनाव? डा जेलाई दिनकाव ज़ ध्यान झिमल परमेस्वरए ओपाँ डसथैचिक जेमाक्योःनाके। 56 खाली अगमबक्ताराए धर्मसास्त्रल यासरो मिताव सयोःन्याए जूनी ची इताव ताके,” है ओरादोव प्राईना उसिस भरी येसुलाई रासूद चितराँ पुतराँ धोःकेर।

येसुलाई घ्योःव कचरील यालाँव

(मर्कूस १४:५३-६५; लूका २२:५४-५५,६३-७१; यूहनना १८:१३-१४,१९-२४)

57 नकिन नो क्योःना हुवराए येसुलाई प्रधान पुजारी कैयाफाए ल्योक लाँकेर। नक सास्त्रीर सोनो यहूदीराए यासेरर दुप्सिद यालिजूयाव। 58 नो बेलाक पत्रुस जाँ तादाड याछीं याछीं हुद नो प्रधान पुजारीए ओचतराक ज़ हुद ‘येसुलाई कै याजेजूयाव ब्याँ?’ लिद पाल्याराए छचोक ज़ चुसिके। 59 नो झिमल मुख्या पुजारीर सोनो घ्योःव कचरीलाव सेर भरिए येसुए ओडैत माचाहिउ पाँर झाःद सैःन्या कर याखिमजूयाव। 60 धुत गोहाई पाँन्यार कुधु ज़ ताकेर, खाली कर ते कान्त ज़ मादैकेर।

बल्ल प्राईरानी छींनी नेब्लो हुद, 61 “आवए, ‘परमेस्वरए ओध्यान झिमलाई तैःद फरी सोलात हिताव ज़ डाजैरिजूया,’ है ओल्यो गिन

ज़ गिन्थैके,” है निरादोव प्राइँना ज़, <sup>62</sup> प्रधान पुजारी च्याँ:सिद येसुलाई, “नँ नपाँ काता ज़ ओमालिज़्याव रो? आवनी नडैत झा:द निर्ईव पाँ किताव उलिज़्याव?” है ओदोक ते, <sup>63</sup> येसुए घाइ ज़ मादोक्यो। फरी प्रधान पुजारीए, “जींदो परमेस्वरए उमिननी है डादींज़्या, नँ गेलाई है दासिके, नँ परमेस्वरए ओज़ा ख्रीस सै मा:क?” है ओदोक ते, <sup>64</sup> येसुए, “नँ है नलिज़्याव मिताव डा साचो हो ज़। तछा डा मिँ मिन्सिउलाई माहान परमेस्वरए ओवोर्दा चुसिद डालिज़्याव ब रँ:न्या जेले, सोनो स्वर्गतिन बादलरास डाहुज़्याव ब रँ:न्या जेले,” है यादोक्यो।

<sup>65</sup>हो प्राइँना ज़ प्रधान पुजारीए उरिसए ओक्वार चीए चीए, “जे ज़ जेथैके, आवए परमेस्वरए उमिन ओबले-ज़्याव। छुत गोहाई काता ओचाहिउ? <sup>66</sup> जे कै जेलिज़्या?” है ओरादोक ते, नोराए प्राइँए, “आवलाई सै:न्या ज़,” है लिद, <sup>67</sup> ख्वाराए मुत्काए प्रोकेर, ख्वाराए लप्टाए प्रोकेर, ख्वाराए तिल्केर। <sup>68</sup> नै जैज़्यावराए फरी, “नँ साचो ख्रीस ताकिन, गेलाई है दासिके, नँलाई प्रोज़्याव सु?” है लिद बरे:केर।

पत्रुसए 'येसुलाई डामासरेसे' है ओरादोव

(मर्कूस १४:६६-७२; लूका २२:५६-६२; यूहन्ना १८:१५-१८, २५-२७)

<sup>69</sup>येसुलाई नै याजैज़्याक पत्रुस चतराक ज़ चुसिद उलिज़्याव। नो बेलाक ज़ तोबो नलाव येन दाज़्याव मेंमा हुद पत्रुसलाई, “नँ मनी गालीललाव येसुस नल्यो सानी,” है ओदोक ते, <sup>70</sup> पत्रुसए प्राइँए याडाक, “नँ काता नपाँज़्याव इताव, डा ते डामासैए,” है दाद, <sup>71</sup> साँबिलाक उचुसिनाक फरी छुत तोबो येन दाज़्याव मेंमा हुद नक लिज़्यावरालाई है यादोक्यो, “आव मिँ ते नासरतलाव

येसुसकाव ज़," है ओरादोक ते, <sup>72</sup> पत्रुसए किर्या झाःद, "डा नो है नलिज़्यावलाई सरसे ज़ डामासरेसे," है दोक्यो। <sup>73</sup> फरी छचावाक नक लिज़्यावर पत्रुसए ल्योक हुद, "नँ साचो उसिसरासकाव ज़, नपाँनी ज़ गेसरेस्निज़्या," है यादोक ते, <sup>74</sup> पत्रुस बनै थल्सिद किर्या झाःद, "डा नो मिँलाई सरसे ज़ डामासरेसे," है ओरादोव प्राइँना ज़ भाल्या कोके। <sup>75</sup> नाःत ज़ डादा येसुए पत्रुसलाई, "भाल्या ओमाकोद ज़ डालाई सोंखेप 'डामासरेसे' है लिन्या नले," है ओदोव पाँ ब चेतैक्यो। नो चेतैद पत्रुस लाँःक पुलुसद् धस धस घर्के।

## 27

येसुलाई रोमी सरकारए ल्योदा यासूँपिउ

(मर्कूस १५:१; लूका २३:१-२; यूहन्ना १८:२८-३२)

<sup>1</sup>छकालन्या घग ज़ मुख्या पुजारीर स्रोनो यहूदीराए यास्रेराए येसुलाई सैःन्याए जूनी सल्ला दोकेर। <sup>2</sup> येसुलाई किद रोमी सरकारलाव पिलातसए ल्योक लाँद सूँपिकेर।

इस्करियोत झुन्दैसिद ओसैःसिउ

(ओसाचीर १:१८-१९)

<sup>3</sup>नाःत ज़ येसुलाई धोका याज़्याव यहूदा इस्करियोतए येसुलाई सैःन्या ज़ याथरैव रँःद, "डा ते मादान्या येन ची डादोव ओल्यो" लिद उयुँर माचाव दाद मुख्या पुजारीर स्रोनो यहूदीराए यास्रेराए ल्योक बाद नो यायो तीस गोता चाँदीए पैसा यालाई ज़ सोवोल्द्याद, <sup>4</sup> "डा ते कान्त ज़ ओखत माल्योलाई अनाकल ज़ धोका याद मादान्या ची डादोव ओल्यो," है ओरादोक ते, नोराए, "जो तादी ब ताधुके, गेलाई घाइ तादासियो," है यादोव प्राइँना ज़, <sup>5</sup> इस्करियोतए नो यायो चाँदीए पैसा याडाक ज़ ध्यान झिमल ओदोइद ख्यानैद ननी पुलुसद् बाद ओल ज़ झुन्दैसिद सैःसिके।

<sup>6</sup>मुख्या पुजारीराए ते नो ओख्याव पैसार तीद, "आव ते झीए ओएःलाव पैसा ची, ध्यान झिमलाव भितील थोमन्या माताए,"

लिद, <sup>7</sup> या याल सल्ला दाद नो पैसाए तादा तादानी हुव मिंरालाई यासिक गादैन्याए जूनी तोबो कुमाल्याए ओएँ: लं:केर। <sup>8</sup> है जैद हो छचामकिन ज़ नो एँ:ए उमिन 'झीए एँ:' ताके। <sup>9</sup> आनी ज़ यर्मिया अगमबक्ताए ओसरो मिताव यो:के। नोए ओसरो आव ज़, 'इस्त्राएलीए ओथोराए नोए ओक्याँताव यामुलिउ ओए: चाँदीए पैसा तीस गोताए

<sup>10</sup>परमेस्वरए है ओल्यो मितावनी ज़ कुमाल्याए ओएँ: लं:न्या लेर।'

रोमी सरकारलाव पिलातस

(मर्कूस १५:२-१५; लूका २३:३-५,१३-२५; यूहन्ना १८:३३-१९:१६)

<sup>11</sup>ना:त ज़ येसुलाई रोमी सरकारलाव पिलातसए ओझाक यासच्याँक पिलातसए येसुलाई, "नँ साचो यहूदीराए याराजा ज़ रो?" है ओदोक ते, येसुए, "नँ ज़ नथरैनाके सानी," है दोक्यो। <sup>12</sup> ना:त ज़ मुख्या पुजारीर सोनो यहूदीराए यास्सेराए येसुलाई खत यालैज्यावत ब येसुए घाइ ज़ मारादोक्यो। <sup>13</sup> निताव थैद पिलातसए येसुलाई, "काता ना: कुधु पाँर नडैत झा:द याईज्याव नमाथैए रो?" है ओदोक ते, <sup>14</sup> झन ज़ घाइ मालिद तोबो ब मापाँके। निताव रँ:द पिलातस बक्क ताके।

<sup>15</sup>नोए सालकाव तखेप निस्तार पर्वत यहूदीराए जो कैदीलाई 'रासद्यासिके' है लिज्यार, होलाई ज़ रासद ओराएज्याव। <sup>16</sup> नो बेलाक तोबो बारब्बा यादोज्याव बनै उमिन थासो कैदी इयालखानाल उलिज्याव। <sup>17</sup> है जैद माहोल्थार यादुप्सिज्याक पिलातसए, "इयालखानाल लिज्याव बारब्बालाई रासन्त्या सै ख्रीस यादोज्याव येसुलाई रासद्यान्या? जे ज़ है लिचिके," है यादोक्यो। <sup>18</sup>ओल पिलातसए ते 'आवराए येसुलाई अन्नाकल ज़ यामी तूद सँपिद नैनार' लिन्या सैद ओनैज्याव। <sup>19</sup> फालन्त्याए जूनी उच्चुसिउत

पिलातसए ओज्याए येसुए उजूनी अइ लिद तोबो था परींक्यो, “नो सैःव यापैजूयाव धर्मी मिँए उउपर्ट नँ मादान्या तादोयो। आछ्या रीलाव डामँल आव मिँए उजूनी डायुँर स्यासे तेद बनै धो थाइव डाताके,” है लिद परींक्यो। 20 मुख्या पुजारीर सोनो यहूदीराए यासेरराए ते झन मिँरालाई प्राइँ याल्योदा जैद नो इयालखानाल लिजूयाव बारब्बालाई रास्द येसुलाई सैःन्या है लिच्यो है दाद यारानैजूयाव।

21पिलातसए फरी, “नोनी काताकावलाई रासद्यान्या?” है ओरादोक ते, “बारब्बालाई रासद्यासिके,” है दोकेर। 22 पिलातसए, “हुकी नो ख्रीस यादोजूयाव येसुलाई डा कै जैन्या की?” है ओरादोक ते, नोराए प्राइँए तपाँ जैद, “क्रुसत तङ्गैद सैःन्या,” है दोकेर। 23 पिलातसए फरी, “काराव? आवए मादान्या काता दाद ओनैजूयाव?” है ओरादोक ते, नोर झन ज़ मचिद, “क्रुसत तङ्गैद सैःन्या,” है लिद बनै ज़ किकेर। 24नाःत ज़ पिलातसए, आवरालाई ते कै जैद ब माताके, झन ज़ मचिरिकेर लिद री रैद नोराए याड़ाक उकुइर हुसिद, “दे चिऊनाचिके, आव येननी डाछेसिके। आवए उड़ी डालाई तालागिस्क, जेलाई ज़ ओलागिस्क,” है ओरादोक ते, 25 नो माहोल्याराए, “नोए उड़ी ओलागिस्कन गे गेक्याँत सोनो गेज़ाराए क्याँत ज़ ओलागिस्क,” है याल्यो प्राइँना ज़, 26 पिलातसए बारब्बालाई रासद्याद येसुलाई रीःद, क्रुसत तङ्गैद सैःन्याए जूनी सिपाईरालाई ज़ यासुँपिक्यो।

सिपाईराए येसुलाई यागिल्लैव

(मर्कूस १५:१६-२०; यूहन्ना १९:२-३)

27नकिन पिलातसए उसिपाईराए येसुलाई दरबार जील लाँद रोमी पलतन भरी यारादुपकेर। 28 नोराए येसुए ओक्वार सिउःद्याद राजाराए याक्वाइसिजूयाव मिताव घ्यामो क्वा जास्द, 29 जुए

मुकुत तोबो रूंद ओडैत जासूद वोर्फताव उकुइत भाताए झुइ तोबो सक्योःद ओडाक याघूँदानी तिकिसिद, “ए यहूदीराए याराजा, जय जय ओताक,” है लिद बरेःद, <sup>30</sup> तिल्द, उकुइताव भाताए झुइए ज़ ओडैत प्रोदिकेर। <sup>31</sup> गिल्लैद गिल्लैद चिम यादोवत नो घ्यामो क्वा सिउःद्याद डादाडाव ओक्वार ज़ जासूद कुसत तङ्गैना लॉकेर।

येसुलाई कुसत यातङ्गैव

(मर्कूस १५:२१-३२; लूका २३:२६-४३; यूहन्ना १९:१७-२७)

<sup>32</sup> येसुलाई सैःना यालाँज्याक येमक तोबो कुरेनीलाव सिमोन यादोज्यावस यादैसिक नोलाई येसुए ओलाँज्याव कुस सुघुर्द, <sup>33</sup> गलगथा यादोज्यावक केस्केर। नो पोए उमिन ‘खप्पर्या पो’ है ब यादोज्याव। <sup>34</sup> नक येसुलाई काव वासः झाःसिउ दाखमद्य सवैकेर। येसुए दार्द ओव माभैःके। <sup>35</sup> येसुलाई कुसत तङ्गैद ओक्वारात गोला झाःद भाःद, <sup>36</sup> नक ज़ चुसिद येसुलाई गुद नैकेर। <sup>37</sup> ओललाई तङ्गैद यानैज्याव कुसए ओडैत, “आव यहूदीराए याराजा येसु ज़”

है लिद तोबो फल्यात ओखत सर्द चकेर। <sup>38</sup> हो छचाम नेब्लो चोरनिलाई मनी, तोबोलाई ओवोर्दा तोबोलाई ओदाबर्यादा जैद कुसत तङ्गैद यारानैज्याव।

<sup>39</sup> आनी हुनी भाल्सिना हुवराए याडैर डत डत जैद थल्द, <sup>40</sup> “नँ ध्यान झिमलाई तैःद स्रोलात डाजैरिज्या है लिज्याव मिँ, नक्याँलाई कै जैद नमाबाँचैधुज्याव? नँ साचो ज़ परमेस्वरए ओजा ताकिन नो कुसतिन झरिद हुन्के,” है दोकेर। <sup>41</sup> हिताव ज़ मुख्या पुजारी स्रोनी यहूदीराए यासैरर, सास्त्रीराए मनी येसुलाई गिल्लैद, <sup>42</sup> “आवए छुतरलाई ताकितर याबाँचैज्याव, ओल ओक्याँलाई कै जैद ओमाबाँचैधुज्याव? इस्राएलीराए याराजा है लिज्याव



नो क्रुसतिन झरिद उहुकिन वाज़ ओपाँ पतिन्या गेले। 43 आव मिँ परमेस्वरए ओक्याँत ख्यासिद लिज़्याव ओताव ताकिन परमेस्वरए ओल्योदा उयुँ थू जैद पला-हुखेहो। ओल कै जैद 'डा परमेस्वरए ओज़ा ज़' है उलिज़्याव?" है लिकेर। 44 ओलस तङ्गिसिउ चोरनी मनी नोराए है याल्यो मिताव ज़ है लिकिनी।

येसु उसिउ

(मर्कूस १५:३३-४१; लूका २३:४४-४९; यूहनना १९:२८-३०)

45नकिन अधमर लावाकिन तीन बजे पै देस भरी काल्या कले इयाके। 46 तीन बजेवाक येसु बनै चोइस, "इलोई, इलोई, लामा सबखथनी?" है लिद क्रिके। नोए ओसै, "अ डापरमेस्वर, अ डापरमेस्वर, डालाई काराव नरास्नाव?" 47 नक च्याँ:सिद लिज़्यावराए नो पाँ थैद ख्वाराए, "आवए ते एलियालाई ची उखुलज़्याव सा," है लिद, 48 तोबोए धों:नाद भाताए उतुपात थाकना पो:द सिरो दाखमद्यल छिम्द येसुए ओया:त झा:द्याद पिउ परीक्यो। 49 उपुर्कावराए ते, "अब ते चिऊद गेनैया, एलिया कातारानी हुद माहाइज़्याव?" है लिकेर। 50 ना:त ज़ येसु फरी ब बनै चोइस क्रिद उस० सफ्या:क्यो।

51हो प्राईना ज़ ध्यान झिमलाव बारिसिउ क्वा ब उतुपानी ओजराड पै ओलनी ज़ नेपरा ताद चिस्के। नामर थोनो:सिद, हॉर पा:द, 52 सिउराए याखादरर ब फुकेर। सिउ धर्मी मिँ ब कुधु सैसिद सोकेर। 53 खाली येसु सिउनी सैसिद ओसोव छीनी वाज़ नोर याखादरनी पुलुसद यरूसलेम सहरल याबावत कुधु मिँराए याड़ाक सरै:सिकेर। 54 नो येसुलाई गुज़्याव कप्तान सोनो ओलस लिज़्याव पाल्याराए निताव भोंचालोर, अचम्ब अचम्बलावर रँ:द नोर बनै छे:द, "आव ते साचो ज़ परमेस्वरए ओज़ा ची ओल्यो," है लिकेर।

55हो बेलाक गालीलनी हुव मेंमार येसुस बारिद ओसेवा दाजूयावर जाँ तादानी येसुलाई चिऊद यानैजूयाव। 56 नोरानी मरियम मग्दलिनी, याकूब स्नो योसेफनी निआमा मरियम, जब्दियाए ओज़ानी निआमा ब ओल्यो।

येसुए ओमोरो खादर पुपल याझाःव

(मर्कूस १५:४२-४७; लूका २३:५०-५६; यूहन्ना १९:३८-४२)

57र्याम्या रिमी ओइयानाक तोबो अरिमाथियालाव धनी मिँ योसेफ यादोजूयाव हुके। नो मिँ ओल मनी येसुए ओपाँत बाजूयाव मिँ ज़ ओल्यो। 58 नोए पिलातसए ल्योक बाद येसुए ओमोरो न्कियो। पिलातसए नोए ओपाँ थैद येसुए ओमोरो लाँव एक्यो। 59 है जैद योसेफए येसुलाई नो कुसतिन हाइद पालो क्वाए लुम्बैद, 60 ओल उजूनी दावन खुपिद पुप जैद ओनैजूयाव साःरो खादरल झाःद ओयामक घ्योःव लुँए कद ख्यानैक्यो। 61 योसेफए येसुलाई खादरल ओझाःजूयाव बेलाक मरियम मग्दलिनी स्नो ओनै मरियमनी नक चिऊद निनैजूयाव।

खादरक पाल्यार यारानैव

62हो पराःती नासिन्या छ्याम ओतावत मुख्या पुजारीर स्नो फरिसीर दुप्सिद पिलातसए ल्योक बाद, 63 “हाकिम सायेब, नो छुल्या ओमासिद ज़, ‘सोलात सैसिद डासोरिजूया,’ है उलिजूयाव थैद गेनै। 64 है जैद नँ नो सोला भरी ओमाखेमा पै गुन्या पाल्या खादरक नैद्याव ताके, मानी कातारानी उसिसर हुद ओमोरो हाइद लाँद मिँरलाई ‘सिउनी सैसिद सोके’ है ल्यो ब पैर्या। नै ओताकिन डादाडावकिन झन ज़ बलेस्न्या ले,” है यादोक ते, 65 पिलातसए, “सिपाईर लाँद जे ज़ नोरलाई पाथस गुव यारापरींचिके,” है ओरादोक ते, 66 नोर ननी बाद नो खादर पोक सु ज़ माबाधुन्या जैद पाल्यार नैद नो कसिउ लुँत माफैन्या छाप ब झाःकेर।

## 28

येसु सिउनी सैसिद ओसोव

(मर्कूस १६:१-८; लूका २४:१-१२; यूहन्ना २०:१-१०)

१नासिन्या छयाम ओखेमोत सातालाव उसंकाताव छयाम नम उसंनाक मरियम मग्दलिनी, ओनै मरियमस खादर पोदा चिऊनाकिनी। २ हाःत ज़ तोबो बनै घ्योःव भोंचालो हुद परमेस्वरए ओचाकर्या स्वर्गतिन झरिहुद नो कसिउ लुंलाई पल्लैद नो लुंत चुसिके। ३ नो चाकर्याए ओडाः बनै ज़ झिलिक झिलिको उलिज्याव, ओक्वार ब पोम स्यासो तक तकौर यालिज्याव। ४ नो गुज्याव पाल्यार नोलाई रँःद याछ्याचेए भुम भुम गूद धलिद सिउ स्यासो ज़ ताकेर।

५नो चाकर्याए नो मेंमानिलाई, “जिन ताछेचिन, नो कुसत तङ्गैद यासैःव येसुलाई जिन्खिमहुज्याव ज़ ताखेहो। ६ नो आल माले। ज़ादाकिनकाव है ओदाचिज्याव मिताव नो सैसिद सोधुके। अछादी आव यानैव पो चिऊचिन्केदा, ७ उसिसराए ल्योदा हतपूत ज़ बाद, ‘गेप्रभु सिउनी सैसिद सोके। जेज़ादा ज़ गालीलदा बाज्या दी, होड ज़ ओलस दैसिन्या जेले,’ है यारादोनाचिन्के,” है दाद फरी नोनिलाई, “आव भरी साचो ज़ है दाद डानैचिने,” है उनिदोव प्राइंना, ८ नोनी बनै छेःद निरेंतए चह चह ताद खादर पुपनी पुलुस्द धोंःनाद उसिसरालाई है यारादोनाकिनी। ९ निबाज्याक येमक ज़ येसु उमँःजानी निङ्गाक च्याँःसिद, “जिनयुँ होलाँ जैचिन्के,” है उनिदोव प्राइंना ज़, नोनी उखँ क्योःद धो दोकिनी। १० नकिन येसुए नोनिलाई, “ताछेचिन, नो डाभाइरालाई, ‘जे प्राइँ गालीलदा बाचिके दी, प्रभुस होड ज़ दैसिन्या जेले दी,’ है यारादोचिन,” है निदोक्यो।

पाल्यारालाई धुत पाँव यारापरीव

११नोनी येमत निबाज्याव बेलाक, येसुए ओमोरोलाई गुज्याव ख्वा पाल्यार सहरल बाद नो यारँःव भरी प्राइँ ज़ मुख्या पुजारीरालाई

है यारादोकेर। <sup>12</sup> नो पुजारीराए पाल्याराए यापाँ थैद यहूदीराए यासेररास दुप्सिद सल्ला दाद नो पाल्यारालाई, कुधु पैसार याद, <sup>13</sup> “आव जेपाँ सुलाई ज़ है तारादोच्यो। बुरू जे, ‘गे रील इल्द गेलिज़्याक उसिसर हुद गोमासैद हाइद यालाँव ओल्यो,’ है लिच्यो।” <sup>14</sup> फरी, “आव पाँर कैताराक हाकिमए ल्योक ओकेसकिन जे ताछेच्यो, जेजूनी पाँन्या गे ज़ गेलिज़्या,” है लिद यारापरीकेर। <sup>15</sup> है जैद नो पाल्याराए नो पैसार रैद नो है यारादोव मिताव ज़ है यारादोनाकेर। है जैद नो पाँ हो छचामकिन ज़ यहूदीराए खार्ल प्राइँदा ज़ फीजिके।

येसुए उसिसरालाई ओपाँ सथैव ओरापरींव

(मर्कूस १६:१४-१८; लूका २४:३६-४९; यूहनना २०:१९-२३;

ओसाचीर १:६-८)

<sup>16</sup>नकिन एघार जना येसुए उसिसर गालील खन्दल बाद येसुए है ओरादोव दाँदात बाकेर। <sup>17</sup> नड येसुस यादैसिउ प्राइँना ज़ उसिसर उखँत फुलुप्सिद धो दोकेर। तोबो नेब्लोए फरी, ‘आव ओल ज़ सै माःक ओताव’ लिद जाँ यायुँ ओमाहुपज़्याव। <sup>18</sup> नाःत ज़ येसुए, “नाम नमलाव हक भरी परमेस्वरए डाकुइत ज़ याद नैनाव। <sup>19</sup> है जैद जे बाद प्राइँ जातलाव मिँरालाई डासिसर जैद डाबाबु परमेस्वरए उमिननी, डा ओज़ाए डामिननी, छैँव पुरूसए उमिननी सछैँद, <sup>20</sup> डा जेलाई किताव किताव डापैचिउ, जे होरालाई मनी हितावनी ज़ यारापैच्यो। आव ब सैच्यो, आव जुक ओमाखेमा पै डा जेस ज़ डातारिज़्या,” है यादोक्यो।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd